

Bầu lem tiaq Luca taqmon....

1..

¹ Wì craq Thêopilo ,i bacc ngai khoe ãi q ka manoh achih hu taqmon hlai bài yiniq broq ma khoe gêh oe taqne nhên ² Tiaq wì ma hnoq qmòe enh baxêm , manòeq khoe loh mangai ma patih ka Bầu lem khoe anoe hlai ka bèn ³ Qmang aih jò khoe ngan hlai ka rabiaq rìm trong enh jò baxêm , au hêm khòh tiaq qmòe tang cadiang hu achih hlai ka ìh, ⁴ Dôq ìh loq qmòe ka cajap bầu ìh ma khoe jah hóc aih joq qnàng.

Bình plình bahia ka Xachari.....

⁵ Qnhòng Hêrôt broq bầu ãiac Juđê , i mòi eq ngai pajàu yiniq haq Xachari , tiaq dèh apah Abija , Êlisabet mai haq hadai nang noe Arôn . ⁶ Boc Plình ngan hnoq ãi baiq ka wa aih mangai taq atoq , wèq gêh geo rìm ranenh hloe xam rìm ramênh Boc Plình thê. ⁷ Wa ùh i ka kon majah qmang aih Êlisabet haq xon, èh ãi baiq ka wa khoe bàc hanam.

⁸ Jò Xachari tiaq dèh wì ma ta axong , khoe troq jò ãa haq broq pajàu dèch ramênh tadreo am ka Boc Plình , ⁹ Tiaq dèh trong bài pajàu kân xan broq, Xachari pài h panài h troq ka haq mùt ta hnim kùh waiq ãòeq bũh gahnàu xua thũm ka Boc Plình ¹⁰ Trũh jò bũh gahnàu , bài mangai bàc oe ãi enh gũng waiq kân. ¹¹ mòi eq bình plình loh enh ngèa ka Xachari, yòng enh pah qma ka nòi prang bũh gahnàu . ¹² Jò Xachari hnoq bình plình ,haq loh ka lèt rai yùq crè . ¹³ Mahaq bình plình ãoe ka haq: Xachari , ùh ãũh yùq ,bầu ìh waiq kân khoe jah tamàng , Êlisabet cãrì ìh , haq aih èh ha-uang ka ìh mòi eq ngai kon calô ,ìh yiniq ka aih Jon . ¹⁴ Kon calô aih èh broq ka ìh jah lem bùi ,bacc ngai qmòi eq hadai manè jò ha-uang qnoh haq. ¹⁵ Enh ngèa Boc Plình ,kon qyoh aih wia gucraq, yac ka alac plì nho , yac ka cleq ma loq bù ãua haq ùh ôq,haq aih jah bình halũh Yiang Hadròeh jò haq oe raq ta cliac miq. ¹⁶ Haq qnung bàc ngai Isorali wih hlai trũh ti Chuaq aih Boc Plình wì haq. ¹⁷ Èh haq lam enh ngèa ka Chuaq tiaq manoh xam kan itai qmang ãa Êli ,ãòeq broq manoh baq wih hlai dèh ta kon , èh mangai ùh qnì iu wih hlai ta kan rabiaq ãa mangai taq atoq , hu padon ãòeq ka Chuaq mòi eq nang noe khoe palauq ãòeq ta manoh.

¹⁸ Xachari bòi ch bình plình:Broq qmang leq au ma loq ka bầu ìh aih joq qnàng ? Au khoe craq , mai au khoe bàc hanam . ¹⁹ Bình plình ãoe : Au kô Gapriên ,yòng enh ngèa ka Boc Plình . Haq khoe thê au trũh bahia kan lem bùi kô . ²⁰ Manòeq kô , ìh loh ka lâu , pi hloh tapoch trũh hì loh bài yiniq qmang bầu au khoe anoe ,majah qmang aih ìh ùh lũi bầu au , aih la bầu trũh dèh jò hì xit.

²¹ Jò aih ãi q ka bài wì mangai bàc oe enh gũng gòm Xachari ãi q jaq hamài h , majah qmang aih haq oe ta hnim kùh waiq ãũnh hrìn . ²² Jò Xachari loh enh gũng , haq tapoch ùh jah ,aih wì ma hì loq haq i hnoq kan mahno tanòe hnim kùh waiq, haq yóc tì ti patiah ka wì , mahaq oe raq lâu. ²³ Jò haq khoe ãi q dèh ka hì patih, haq hlai dèh ta hnim . ²⁴ Toq biaq atì q ka aih, Êlisabet ,mai haq hì hadràp , haq cãdoc rãđeh padam khê ²⁵ haq ãoe: Chuaq khoe broq yiniq kô ka au , haq khoe haqmiang ngan au , ãòeq lèh kan camaih au oe taqne mangai bàc.

Anoe adroe hì ha uang Jesus

²⁶ Jò Êlisabet oe jiang khoe jah tadrâu khê , Boc Plinh thê bình plinh Gapriên trùh ta plài Naxaret , gùng Galili . ²⁷ Lam glàm mangai adrùh sriu yiniq haq Mari , khoe tèu bàu yôc moeq ngai radam yiniq haq Jôsep , caxi noe Đawit. ²⁸ Bình plinh trùh ajang nòe mangai adrùh aih rai doe: Manè am ka ìh ,mangai jah xôq ramot ! Chuaq oe ti ìh. ²⁹ Tàng bàu aih Mari haq hamàih , haq hèm bàu hangah qmang aih ìq qmang leq? ³⁰ Bình plinh doe: Mari ùh dùh yùq dèh, majah qmang aih ìh khoe jah kan tamèt enh nòe Boc Plinh ³¹ Kô èh ìh hadràp èh ha-uang loh moeq ngai kon calô , ìh yiniq ka haq Jesus ³² Haq aih èh wìa gucraq , jah creo Kon Yiang Dìq Jaq Haqnèh. Chuaq aih Boc Plinh jah am ka haq gèq enh kan cadraq haq aih Đawit . ³³ Haq aih èh ma wèq cwiang enh qnhèq ka nang noe Jacôp trùh mòeq òe , diac da haq ùh lùch. ³⁴ Mari padreo bàu : Au qnhòq lah qnì ka gucalô leq, wìa ka ì qmang aih? ³⁵ Bình plinh doe :Yiang Hadròeh trùh enh qnhèq ka ìh èh kan itai Yiang Dìq Jaq Haqnèh taqmàn ìh tayàp haq , dài aih ìq raq , kon hadròeh aih ha-uang loh majah ep creo kon Boc Plinh . ³⁶ Hatau ,Êlisabet mangai hadròng ìh ,hanoh oe jiang jò haq khoe craq , rìm ngai khoe loq ka haq aih xon , yàng manòeq kô haq oe jiang khoe jah tadrâu khê . ³⁷ Majah qmang aih ,ùh ì cleq Boc Plinh ma broq ùh jah. ³⁸ Mari padreo bàu : Au kô mangai hapõng Chuaq, waiq bàu ìh anoe ka au aih jah gèh! Khoe aih bình plinh hi lam.

Mari lam hmàih ka Elisabet....

³⁹ Ta bài hì aih, Mari haq drah lam trùh ta plài ma oe ta wang nòe gùng Jude , ⁴⁰ Ta aih haq mùt ta hnim Xachari rai dèch bàu manè lem bùi ka Êlisabet . ⁴¹ Êlisabet bu tàng bàu Mari ,kon nga oe ta cliac khoe canhroh , Êlisabet khoe jah bình Yiang Hadròeh ⁴² Haq dèch bàu anoe: Taqne òiq òong ka mangai gucadri ,ìh kô mangai ì xôq ramot , kon qyoh oe ta cliac hadai jah xôq ramot . ⁴³ Enh leq kô ìq au majah kan tamèt qmang kô , miq da Chuaq au trùh hmàih ka au ? ⁴⁴ Majah qmang aih òn au butàng bàu ìh , kon nga ta cliac au khoe canhroh rai lem bùi . ⁴⁵ xôq ramot ka ìh mangai khoe lùì bàu Chuaq anoe, aih bàu trùh dèh hì jah xit . ⁴⁶ Mari doe rameh :

Manoh au manè apôi Chuaq

⁴⁷ Mahua yiang au lem bùi tanòe Boc Plinh aih Chuaq dèch au .

⁴⁸ Majah qmang aih haq khoe hqmàng hnoq kan hamoq au ,mangai hapõng haq

Pang kô ta èh, rìm qnhòng òiq anoe au kô mangai ì xôq ramot.

⁴⁹ Majah qmang aih, Yiang òiq jaq haqnèh ,khoe broq biac kàn ka au.

Yiniq haq aih hadròeh.

⁵⁰ Haq loq waq ka mangai loq iu haq enh qnhòng kô trùh qnhòng tau

⁵¹ Haq yôc dèh tì kōng òe q patô qnoh deh kan itai.

Rai raliang đac trong da mangai ì manoh loq padèch rađeh.

⁵² Haq khoe caqnìh qnoh mangai ì cwiang clih enh gèq cla wì haq.

Rai dèch atóc mangai loq hamon rađeh

⁵³ Haq khoe broq ka mangai pangot jah bình dahwèq jiang

Hnan mangai kan hlài tì dech

⁵⁴ Haq khoe wiang ti Isorali , hapǒng haq.

Đòeq bahmàng hlài dèh kan loq waq haq

⁵⁵ Tìah ka bàu haq khoe doe ka kan cadraq bèn.

⁵⁶ Mari oe ti Êlisabet jah ta piq khê , khoe aih hi wìh hlài dèh ta hnim.

Ha-uang ka Jon Baptit

⁵⁷ Jò khoe trùh dèh khê Êlisabet hi ha-uang, haq ha-uang moeq ngai kon calô . ⁵⁸ Plài pla xam bài oh daq hìa Chuaq khoe òq jaq tamèt ka Êlisabet wì wiang trùh lem bùi ti haq . ⁵⁹ Trùh rahem hì , òq ka wì lam ta aih òq broq ramènh kat akia ,wì yiniq ka kon qyoh aih Xachari tiaq yiniq dèh baq ⁶⁰ Mahaq miq haq doe : Òh , ep yiniq ka haq Jon. ⁶¹ Wì doe : Òq òng ka nang noe òh òh i ka cabô leq i yiniq aih . ⁶² Wì yóc tì ti patiah hu bòch baq haq enh yiniq dèh ka kon yiniq cleq . ⁶³ Xachari thê wì yóc capiac long ban qyoh, haq achih : yiniq haq Jon .Mangai leq mangai meh hamàih òh hra. ⁶⁴ Wop hloe jò aih raq ,rapet haq jah rađah , haq tapoch rai manè apôi Boc Plinh . ⁶⁵ Òq ka wì taplài cadròt òh hra , òq ka gùng wang Galili wì anoe ka dabau toq trong aih . ⁶⁶ Cabô tàng bàu aih hanoh wê òq ta manoh rai doe : Kon nga aih òh qmang leq cadèh oq? Majah qmang aih tì Chuaq oe ti haq .

Xachari calêu....

⁶⁷ Jò aih, Xachari baq kon nga aih jah bình Yiang Hadròeh, haq tapoch pajàu rameh:

⁶⁸ Manè apôi Chuaq aih Boc Plinh Isorali,

majah qmang aih Ìh khoe trùh hmàih, rai baxon yóc hlài Isorali mangai da Ìh

⁶⁹ Ìh khoe paqnàng ka nhèn ,ta hnim Đawit hapǒng Ìh ,

moeq Ngai dèch nhèn i kwiang itai!

⁷⁰ Tìah ka Ìh khoe yóc bàu wì mangai pajàu hadròeh qnhòng calah nèh .

⁷¹ Ìh dèch nhèn khoe ka mangai tablêq ,khoe ka nòe tì kǒng wì ma tagit ka nhèn.

⁷² Ìh paqnoh kan loq waq am ka kan cadraq nhèn ,rai hmàng bàu tajap hadròeh cla Ìh .

⁷³ Tìah ka Ìh ma khoe hapah ka Apraham kan cadraq nhèn.

⁷⁴ Ìh khoe têu bàu dèch nhèn claih enh tì kǒng mangai tagit ka nhèn

Ìh am ka nhèn sôq ramot malem , ti ngèa Ìh.

⁷⁵ Đòeq yôc kan hadrôèh , kan taq atôq hu patih ka Ìh ,dìq ka qnhòng cla ùh hòq qmòe cleq

⁷⁶ Kon oq ! kô èh wì creô kon aih pajàu da Yiang Haqnèq ,

Kô èh kon lam enh ngèa ka Chuaq ,padon trong ka haq

⁷⁷ Dôq ka mangai da haq ajang nòe yiniq lui wì haq jah caqnaih aih hu canau loq kan dèch am dech,

⁷⁸ Majah qmang aih Boc Plinh nhèn tamèt ta manoh

Mat mahì enh qnhèq jah sreo qngah ka nhèn ,

⁷⁹ Đòeq sreo ka mangai hangui tanòe clam cluiq xam mangai hangui ta yàp qmù kan kachit.

Rai qnung jènh nhèn lam ta trong catèm.

⁸⁰ Kon qyoh aih yòng kàn , mahua yiang tadèh , rih oe tanòe hawit trùh hì paqnoh rađeh ka mangai Isorali.

Hauang Chuaq Jesus

2.. Jò aih Auguto ,bùa kàn qnoh bàu thê dìq ka Lamah , aih taneh diac kàn dìq jaq, ep ti rèn ngan hlài mangai ta aih jah toq leq . ² aih yàng baxèm wì ti rèn ngan hlài , wop qnhòng da Quiniri-u broq cla craq bài cwan tagùng Siri. ³ Mangai hlài đeh hra ta gùng cla đòeq achìh qmùt dèh yiniq. ⁴ Jôsep aih caxi noe Đawit , haq hanoh lam enh Naxaret , gùng Galili, loh ta gùng Judê trùh ta Bêt-le-hem. ⁵ Hu achìh qmùt dèh yiniq rađeh xam yiniq Mari , mangai khoe òq bàu yôc haq , qnang oe jiang . ⁶ Jò wa qnang oe ta aih , khoe trùh hì Mari ha-uang . ⁷ Haq ha-uang kon calô ramua , yôc mù taqmàn deh kon , ta qngùi ta atong nhat ,majah qmang aih ta hnim padài khoe dìq ka nòe. ⁸ Hadai gùng aih ,i bài mangai ban triu oe tagùng ,riù qngah ka mang đòeq wèq dèh triu . ⁹ Moeq bình plinh da Chuaq trùh ten ka wì , kan ranhòm Chuaq qngah qngiang dudan wì haq , wì crè pi cajaq ¹⁰ Bình plinh doe : Ùh yùq cleq! Hacô au bahia ka pì moeq Bàu lem , aih raq kan lem bùi am dìq ka mangai oe ta crống taneh . ¹¹ Hì cô ta plài Đawit khoe ha-uang ka pì moeq Ngai dèch mangai ,aih Christ , aih Chuaq pì. ¹² Kô oq kan hadro dōq pì hu canau ka Haq , pì hnoq moeq ngai kon qyoh taqmàn xi mù , kùì ta atong nhat. ¹³ Tajòe qmòe jò aih , raya rayùc lình plinh xam bình plinh aih calêu manè apôi Boc Plinh rameh :

¹⁴ Qngah yiniq Boc Plinh oe taplinh haqnèq.

Catèm tanòe haqneq am ka bài mangai haq loq waq.

¹⁵ Jò wì bình plinh khoe talah ka wì haq hu wìh hlài ta plinh , bài mangai ban triu doe ka dabau : Beq bèn lam ta Bêtlehem hu ngan yiniq neo loh kô ,Chuaq ma khoe doe ka bèn loq. ¹⁶ Qmang aih wì haq drah lam ka nhet ,hnoq Mari xam Jôsep xam kon qyoh qnang kùì ta atong nhat . ¹⁷ Jò khoe hnoq wì anoe hlài bàu bình plinh anoe trùh kon qyoh, wì haq ma khoe jah tàng. ¹⁸ Dìq ka mangai tamàng hamàih đeh hra ka bàu bài mangai ban triu anoe ka wì haq. ¹⁹ Mahaq Mari wê dìq đōng bài bàu aih rai hèm yôt dèh ta manoh.²⁰ Bài

mangai ban trùu tawìh hlài , rai broq qngah yiniq rai manè apôi Boc Plinh trong wì haq khoe tàng xam yiniq wì haq khoe hnoq joq tiah ka bàu ma khoe anoe ka wì haq.

²¹ Trùh rahem hì , aih hì ep broq ramènh kat akia ka kon qyoh , wì yiniq ka haq Jesus , aih yiniq bình plinh ma khoe yiniq adroe qmòe ka jò hadràp .

Dèch Jesus ka Boc Plinh....

²² Khoe diq ka hì basròeh , tiaq ranenh Moise , Jôsep xam Mari atóc kon qyoh ta Jêrusalem òe q dèch ka Boc Plinh , ²³ Qmang ka khoe achìh ta hset ranenh haq : “ Rìm ngai kon calô ramua, ep dèch ka Chuaq .” ²⁴ dèch tam baiq toq trù braih ùh meh baiq toq kon trù qyoh , qmang ka ranenh Chuaq khoe thê.

Simêon calêu manè , Anne mangai pajàu cadri.....

²⁵ Jò aih, ta Jêrusalem i moeq ngai rìh lem rìh taq atoq , yiniq haq aih Simêon , haq aih toq gòm kan alòng trùh ka Isorali , Yiang Hadròeh oe ti haq. ²⁶ Yiang Hadròeh khoe anoe ka haq loq haq ùh cachit adroe ka jah hnoq Christ da Boc plinh. ²⁷ Qmang aih, haq tiaq Yiang Hadròeh qnung , haq mùt ta hnìm kùh waiq wop troq jò wa miq baq aràng Chuaq Jesus ta aih, hu pagêh ka haq rìm trong ramnenh khoe thê. ²⁸ Haq aih hi caqmìn kon qyoh aih , haq manè apôi Boc Plinh rameh :

²⁹ Waiq Chuaq! Manòeq kô Ìh am au jah cachit ka catèm tiaq troeq bàu Ìh,

³⁰ Majah qmang aih mat au khoe hnoq kan dèch kon mangai trùh enh nòe Ìh .

³¹ Ìh ma khoe palauq qmòe dèh, òe q broq kan qngah enh ngèa rìm diac.

³² kan qngah sreo jàp ka phù cròng , broq ka Isorali Ìh jah kan ranhòm.

³³ Wa miq baq kon qyoh aih diq jaq hamàih ka bàu wì anoe trùh dèh kon. ³⁴ Simêon waiq xôq ramot am ka wa òng mai, haq doe ka Mari miq kon qyoh aih rameh : I bàu khoe têu òe q am ka Kon qyoh kô , haq broq nen ka bàc ngai Isorali tacro, èh hadai broq ka bàc ngai jah yòng , khoe têu òe q dōq haq wìa teo ka bàc ngai tarahen. ³⁵ da ìh hòm , i moeq pla chang pác hlùh ta cliac ìh . Aih èh bàc yiniq oe ta manoh bàc ngai jah paqnoh.

³⁶ Èh hòm i mangai pajàu cadri ,yiniq haq An-ne , kon da Phanu-ên, caxi noe Ase , joq khoe bàc hanam .Enh jò haq oe raq adrùh sriu, atiq ka aih haq oe dèh ti òng jah tapèh hanam , ³⁷ khoe aih haq hi hadrô. Jò aih haq khoe jah rahem jàt pôn hanam , oe toq ta hnìm kùh waiq , dahì damang patìh ka Boc Plinh , apàm ka acaq rai waiq khàn . ³⁸ Hanoh jò aih diq, haq trùh ta aih , manè apôi Boc Plinh rai anoe trùh kon qyoh ka bài mangai qnang tangèh gòm Jêrusalem jah dèch paclaih . ³⁹ Jò Jôsep xam Mari khoe broq gèh ka trong ranenh Boc Plinh thê ,wa haq tawìh hlài ta Galili, trùh dèh ta Naxaret plài cla . ⁴⁰ Kon qyoh aih yòng kàn , rai tadêh , jah bình kan rabiaq , xôq ramot Boc Plinh oe ti Haq.

Jò Jesus jah moeq jàt baiq hanam

⁴¹ Rìm hanam wa miq baq Haq tồc ta Jersalem , ðòeq lam tagop ta hì ramènħ Pancwa . ⁴² Jò khoe jah moeq jàt baiq hanam haq lam tiaq ðèħ wa miq baq tồc ta aih hu hadai tagop ta hì ramènħ qmang ka xan hmaq broq. ⁴³ Khoe ðiq ka hì ramènħ , wì haq wìħ hlài ðèħ tagùng , Chuaq Jesus oe hlài ta aih mahaq miq baq haq ùħ qnì . ⁴⁴ Hèm ðeh haq lam ti bài bua ta aih ,khoe moeq hì lam trong aih men ti bòch wì oh ðaq xam bài mangai canau. ⁴⁵ Jò chaq haq khoe pì hnoq , wa wìħ hlài ta Jerusalem ðòeq chaq ⁴⁶ Pìq hì wa men hnoq haq tanòe hnim Kùh waiq , qnang hangui taqne bài mangai hnài ,rai tamàng rai bòch hlài wì aih . ⁴⁷ Rìm ngai tàng bàu rai hnoq kan rabiaq haq wì ðiq loh ka hamàih jò haq bòch wì. ⁴⁸ Jò hì hnoq haq, wa miq baq ðiq jaq hamàih .Miq haq doe : A kon! Hagleq ma jah haòo ka ma qmang kô, ma khoe lèt oe i jaq cleq? . ⁴⁹ Haq bòch “Aih chòp chaq ðèħ ka au ? Chòp ma ùħ loq au ep oe patìħ ðèħ ta hnim Baq qmòh?”. ⁵⁰ Mahaq wa aih ùħ tem bàu haq anoe ka raðeh cleq.

⁵¹ Khoe aih haq hlài ta Naxaret ti wa miq baq rai iu broq tiaq bàu wa , mahaq bàu ða haq miq haq wê ðồng ta manoh . ⁵² Chuaq Jesus rai èħ rai rabiaq tam , chac rai èħ rai kàn , kiang èħ kiang lem manoh Boc plình xam kon mangai.

Jon Baptit

3...

Hanam moeq jàt padam qnhòng Tibêro broq bùa kàn , jò aih Bônso-philat broq cla craq bài cwan ta gùng Juðê , Herôt broq bùa qyoh ta gùng Galili , Philip oh haq broq bùa qyoh ta gùng Yturê xam tracôni , Lysania broq bùa qyoh ta gùng Abilen , ² Anne xam Caiphe broq pajàu kàn , aih i bàu Boc Plình thê Jon kon Xacahri tanòe gùng hawit ³ Jon ti lam dudan jàp ka rìm gùng cròng ðiac Jôðan, hnài wì broq ramènħ baptem ða kan loq raxach caðac trong ðù ðòeq hu jah caqnaih yiniq lui , ⁴ tìah ka bàu khoe achìħ ta hset pajàu Êsai :

I bàu creo tanòe hawit

Drah palauq trong ka Chuaq , pajang trong ða haq

⁵ Nòe jrùq tàc ðôq haq bình

Roc bui wang ,roc nòe haqnèq qnoh ðôq haq haqneq

Trong tawech pajang ðôq haq hnhoh

Trong qnhèq qneq broq ðôq haq tamang.

⁶ ðìq ðồng kon mangai jah hnoq kan ðèħ enh Boc Plình.

⁷ Jon anoe ka mangai bàc qnang trùħ ta aih ðòeq jah broq baptem : Nang noe bìh tau , cabô ma hnài pì loq wia ka kan nòeh hì atìq ? ⁸ Qmat èħ , drah wìa malem ðôq ùħ qngwan ka pì khoe loq raxach, ùħ ðùħ doe Apraham aih kan cadraq nhèn ,majah qmang aih au doe ka pì Boc Plình broq bài hmo kô loh nang noe ka Apraham jah . ⁹ Chòng khoe roh qmòe ajang xem long , waq toq long leq ùħ loh plì lem , long aih èħ koh ðòeq hu bùħ caðac .

¹⁰ Wì bòch Jon : Aih èh nhèn ep broq qmang leq ? ¹¹ Haq padreo bàu : Cabô i baiq blah eo ,yõc moeq blah am ka mangai chac dech , dahwèq acaq hadai qmang aih. ¹² I bàc ngai yõc thèq trùh hu broq baptem , wì aih bòch : Ha nhèn ep broq cleq? ¹³ Haq doe ka wì : Apa q yõc yeo bàc ka maneh khoe pajaq ¹⁴ Bài mangai linh hanoh bòch :Ha nhèn kô hòm ep broq cleq? Haq doe : apaq tacaq ka cabô , apaq qnùt cabô , jèn baha pì pang leq ,pì waq dèh pang aih.

¹⁵ Majah qmang aih wì qnang tagòm ngèh ,wì hèm dèh ta manoh ahiaq Jon kô raq Christ, ¹⁶ aih iq Jon majah doe ka wì :Au broq ka pì baptem xi diac mahaq Mangai trùh atiq ka au cwiang yeo haqnèq ka au ,au mech qnhòq wìa broq đeh magai doeh da haq caxi jep .Haq aih èh ma broq ka pì baptem xi Yiang Hadròeh xi ùnh . ¹⁷ Tì Haq wê cađap hu dè dèh qmau ta haneh ka hreo , lènh qmau haq tah ta hapom , manùh haq bùh ta ùnh ùh jò leq pat .

¹⁸ Jò Jon anoe Bàu lem , haq hadai hnài wì bàc trong qnoeq, ¹⁹ Mahaq Hêrôt bùa qyoh , Jon khoe i tapoch ùh lòh haq yõc Hêrôđia mai oh haq , hloe xam bài trong dù bùa ma broq, ²⁰ haq broq tam moeq yiniq dù hòm , aih haq rùp clêh Jon ta hnim tù .

Broq baptem ka Jesus.

²¹ Jò diq ka mangai ta aih khoe jah broq baptem , Chuaq Jesus hanoh jah broq baptem ,plinh tapèh qmòe jò haq qnang waiq khàn , ²² Yiang Hadròeh yõc chac trù loh jràp ta chac haq , tajòe qmòe jò aih i bàu enh plinh doe : “ Ìh kô kon au , mangai au loq waq deh , kon lem ka manoh au rìm trong.”

Caxi noe JesusChrist.....

²³ Jò Chuaq Jesus baxèm broq dèh trong haq broq, jò aih haq bu jah qnah ta piq jàt hanam .Tiaq manoh wì hèm haq aih kon Jôsep , Jôsep kon Hêli , ²⁴ Hêli kon Matat, Matat kon Lêwi , Lêwi kon Mên chi , Mên chi kon Jane ,Jane kon Jôsep ²⁵ Jôsep kon Mata-thia ,Mata-thia kon Amôt , Amôt kon Nahum , Nahum kon Êt-li , Êt-li kon Na-gê , ²⁶ Na gê kon Ma at ,Ma at kon Mata-lia ,Mata-lia kon Sê-me-in ,Sê-me-in kon Jô-et , Jô-et kon Jô-đa ²⁷ Jô-đa kon Jô-anan ,Jô-anan kon Rêsa ,Rêsa kon Xôro-baben , Xôro-baben kon Sala-thien ,sala-thien kon Nêri, ²⁸ Nêri kon Mênchi ,Mênchi kon A đi, A đi kon Kôsam , Kôsam kon Ên-mađan, Ên-mađan kon Ero , ²⁹ Ero kon Jêsu , Jêsu kon Êli-ese ,Êli-ese kon Jôrim ,Jôrim kon Ma-that ,Ma-that kon Lêvi , ³⁰ Lêvi kon Si-mê-on ,Si-mê-on kon Juda ,Juda kon Jôsep , Jôsep kon Jônám ,Jônám kon Êli-akim, Êli-akim Mê-lea, ³¹ Mê-lea kon Mêna , Mêna kon Mata-tha ,Mata-tha kon Nathan , Nathan kon Đawit , ³² Đawit kon Jêse , Jêse kon Jôbet , Jôbet kon Bo-ô ,Bo-ô kon sala ,Sala kon Nach-son ,Nach-son kon Ami-na-đap, ³³ Ami-na-đap kon Amin , Amin kon Arôni ,Arôni kon Et-rôm, Et-rôm kon Pharê ,Pharê kon Juda , ³⁴ Juda kon Jacôp , Jacôp kon Ysac ,Ysac kon Apraham, apraham kon Tharê ,Tharê kon Nacô , ³⁵ Nacô kon Sêruc ,Sêruc kon Ragao,Ragao kon Phalet ,Phalet kon Hêbe, Hêbe kon Sala , ³⁶ Sala kon Canam, Canam kon Abasac ,Abasac Sem ,Sem kon Noê ,Noê kon Lêmec , ³⁷ Lamec kon Mêtu-sela. Mêtu-sela kon Hê noc , Hênoc kon Jaret ,Jaret kon Mêle-le-en ,Mêle-le-en kon Cainam,³⁸ Cainam kon Enot , Enot kon Sê ,Sê kon Adam ,Adam kon Boc plinh.

Kan padô aluàn....

4...

¹ Chuaq Jesus bình Yiang Hadròeh , hlài enh cròng diac Jodan , Yiang Hadròeh aràng haq mùt tagùng hawit. ² Ta aih kiac padô aluàn haq pôn jàt hì , Ta bài hì aih haq ùh lòm acaq qmòe cleq, diq dèh ka jò haq loh qmòe ka hrah. ³ Kan kiac doe ka haq :Tàng joq ìh kon Boc Plinh , thê hmo kô wìa bênh beq .⁴ Chuaq Jesus padreo bàu : “ Khoe ì bàu achìh , kon mangai rìh ma xài canòm toq ka bênh. ⁵ Kiac atóc haq tanòe haqnèq ,qmoeq rahyàc raq haq khoe patô ka Chuaq Jesus diq dồng ka bài diac ta crống taneh. ⁶ haq doe ka Chuaq Jesus : diq dồng ka cwiàng xam ka ranhòm taqmat , khoe am dồng ka au , au enh am ka cabô leq am .⁷ Tàng ìh kùh waiq au ,aih hì jah ìh . ⁸ Chuaq Jesus pareo bàu “ I bàu achìh rameh : ìh ep kùh waiq Boc plinh ìh rai patìh toq ka haq raq ⁹ Kiac aràng haq trùh ta Jêrusalem rai dèch atóc haq oe tanòe diq jaq haqnèq ta bui hnim kùh waiq ,haq doe : Tàng joq ìh kon Boc plinh ,hadrúc beq , ¹⁰ Majah qmang aih khoe ì bàu achìh :

Haq thê dèh bình plinh wèq ìh .

¹¹ Wì aih dèch ìh tọc taxống wì haq ,

aih èh dōq jènh ìh ùh hiaq catoeh ka hmo.

¹² Chuaq Jesus padreo bàu “I bàu khoe achìh : Ùh khòh qnhro Chuaq aih Boc Plinh ìh”. ¹³ Kan kiac diq ka trong òe q hu padô Chuaq Jesus , haq hì wìa òe hòeq

Hlài ta Naxaret

¹⁴ Chuaq Jesus jah bình cwiàng atai enh Yiang Hadròeh , haq wìh hlài ta Galili , jàp gùng dudan aih khoe hìa tàng yiniq haq . ¹⁵ Haq hnài tanòe hnim tagop qyoh , mangai mannè òeh hra . ¹⁶ Haq trùh ta Naxaret , nòe haq yòng kàn . Tìah dèh Haq hmaq broq ,trùh hì Sabat haq mùt hnim tagop qyoh, èh hì yòng òc . ¹⁷ Wì am ka haq hset pajàu Êsai , haq pèh jang nòe khoe achìh:

¹⁸ Yiang Boc Plinh oe ti au.

Majah qmang aih haq khoe xùt dầu ka au , òe q hu anoe Bàu lem ka mangai pa,

¹⁹ Haq khoe thê au trùh paclaih mangai oe ta hnim tù jah loh enh gùng.

Mangai ùh xau jah hnoq ,

Mangai wì tacaq ka haq jah claih.

Rai bahìa hanam catèm da Chuaq .

²⁰ Khoe aih haq don hlài hset padreo am da ka mangai patìh ta aih khoe èh haq hì hangui. Rìm ngai ta hnim tagop qyoh aih diq haqmiang ngan haq. ²¹ Haq doe ka wì : Bàu hset hadròeh pì ma tamàng aih , hì kô khoe xit . ²² Diq ka mangai ta aih maleq ma meh diq anoe trùh haq , wì hamàih ka bàu rabiaq loh enh haq, wì doe : Haq qmat ajoq kon Jôsep ? ²³ Haq doe ka wì “ Canau pì yóc bàu cachôi qmang kô hu anoe ka au :Mangai

broq jreo, haqnauq dèh cla òeq , aleq bài yiniq ìh broq ta Cabênaum nhèn ma khoe tàng , broq nòe gùng cla kô beq.”²⁴ Haq doe ka wì “ Joq au doe ka pì , qnhòq lah i mangai pajàu leq jah gùng cla manè. ²⁵ Au anoe qnàng ka pì, qnhòng Êli , jò tróc pàđang piq hanam qne ,điđ đồng ka gùng loh ka pangot hrah , tanòe mangai Isorali i bàc mangai hadrô ,²⁶ yac ka qmang aih , aleq i thê Êli trùh hnim cabô taqne bài aih, mahaq thê haq lam ta hnim mangai cadri hadrô oe ta Sarepta gùng Sidôn.²⁷ Qnhòng da pajàu Êlisê mangai Isorali loh ka bacùn ma i palap cleq, mahaq ma i mangai leq jah brêh , enh gùng ka Na-aman ,mangai Siri . ²⁸ Maleq ma meh oe ta hnim tagop qyoh tàng bàu aih ,wì nòeh pì ka jaq cleq . ²⁹ Wì padinh yòng, hua qnoh haq loh enh gùng ka plài , qnung haq tọc ta bui wang nòe wì broq plài òeq hu caqnùt qnìh đac haq, ³⁰ Yàng haq pagat ti ngèa wì èh hi lam taqnoeq.

Broq brêh ka mangai kiac mùt ta chac

³¹ Haq loh ta Cabênaum ,oe ta gùng Gallili ,hnài ta hì Sabat . ³² Rìm ngai tamèt ta manoh jò tàng bàu haq hnài , majah qmang aih bàu haq i ang. ³³ Tanòe hnim kùh waiq i moeq ngai ta dalam chac haq i kiac mùt , breo cadêh : Jesus mangai Naxaret , ³⁴ ìh enh broq ka nhèn cleq kô ìq? ìh trùh hu raliang cadac nhèn qmòh? ìh qmat cabô, au loq : Mangai Hadròeh da Boc plình ! ³⁵ Mahaq Chuaq Jesus capoch nhang ka haq aih “Oe ma hatinh haq! Drah loh enh mangai qmat ” Hloe jò aih, taqne mangai bàc kiac rapòt mangai aih ta haqneq ,èh hi loh , ùh hìaq broq ka haq aih loh habau. ³⁶ Mangai leq mangai meh haglènh đeh hra, wì ta anoe ka dabau: Bài bàu kô qmang leq ìq! Haq yọc cwiang yọc kan dèh enh leq ma drùh qnoh kiac ,kiac ma loh hloe qmang meh . ³⁷ Diđ đồng gùng dudan ta aih wì loq đeh hra ka Haq.

Miq mai Phiero.....

³⁸ Chuaq Jesus loh enh hnim tagop qyoh ,haq lam ta hnim Simôn .Miq mai Simôn qnang tôq tanget hlàc raya . Wì canòm ka Chuaq Jesus broq brêh ka haq. ³⁹ Chuaq Jesus cachình chac ta mangai aih , haq tapoch ka kan tanget , kan tanget hi diq. Mangai aih hi padinh yòng patìh .

⁴⁰ Jò mat mahì clìh, mangai yiniq qmang leq ,mangai ùh hròc qmang leq wì aràng trùh diq ta haq ,haq yọc ti bèq tang ngai hu broq brêh ka wì. ⁴¹ Bàc kiac cadàu loh enh bàc ngai rai cajiah: ìh qmat kon Boc Plình . Mahaq Chuaq Jesus lech ùh am wì haq tapoch , majah qmang aih kiac loq ka haq aih raq Christ.

⁴² Buqngah, Chuaq Jesus loh lam tanoè hawit . Bàc mangai lam ti chaq haq . Jò hnoq haq, wì padràng haq oe ,wì ùh enh dôi haq lam taqnoeq . ⁴³ Mahaq haq doe ka wì “ Au ep lam anoe Bàu lem da Boc Plình ka wì ta qnoeq hòm , aih raq majah khoe thê au trùh. ⁴⁴ Haq ti hnài roc hnim tagop qyoh da mangai Juda.

Jesus creo ka magai tiaq hỏc ma adroe.....

5 ..

¹ I mòeq hì, jò Chuaq Jesus yòng ti haqmai hlông Gêne-saret , bài mangai bàc raya oe dudan dahnen dabau hu tamàng bàu Boc Plình ² Haq hnoq i baiq toq boang oe ti haqmai diac ,cla mangai ranang khoe loh qnheo hlàm ta diac . ³ Baiq toq boang aih haq hi tọc ta moeq toq , aih boang da Simôn, thê haq qnoh tadrùq toq bìaq ,èh haq hangui ta boang òeq hu hnài wì .

⁴ Jò khoe hêq ka hnài haq thê Simôn “ Chùng boang qnoh tanòe diac jrùq tau òeq caqnìh hlàm hu rùp ka.”
⁵ Simôn padreo bàu : Mangai hnài , nhèn broq khoe lep qngah moeq mang iq, ùh lòm jah qmòe cleq. Mahaq ìh khoe doe qmang aih , òq nhèn tang hlàm. ⁶ Wì caqnìh hlàm ta diac jah ka pi cajaq, hlàm wì haq ten tapot , ⁷ aih wì haq hi gwàih tì dèh ka bua oe ta boang qnoeq trùh, òeq wiang ti wì haq ,ka bình baiq toq boang , boang loh qmòe ka enh cram. ⁸ Jò Simôn hnoq qmang aih , haq hacùn cràng enh ngèa ka Chuaq Jesus : Chuaq au ! Ìh wia hangai ka au beq, au kô mangai bình toq yiniq lui . ⁹ Majah qmang aih haq xam bài dèh bua oe ti haq ,hnoq jah hrin ka , maleq mameh loh ka crè dõng ¹⁰ Chuaq Jesus doe ka Simôn “ Apa q yùq cleq, pang kô ta èh, ìh jah wia mangai tang hlàm mangai”. ¹¹ Khoe ka atõc boang tago , wì hi cađac òq dõng òeq hu tiaq haq.

Jesus broq brêh ka mangai bacùn....

¹² Jò Chuaq Jesus qnang oe tanòe plài tau, i moeq ngai bacùn òq tachac ,trùh bla op dèh hadrò taqneq rai dang : Waiq Chuaq, tàng ìh ma waq broq ,ìh broq au brêh. ¹³ Chuaq Jesus hnhu tì bèq haq aih,rai doe “ Au enh ,brêh beq !” Tajòe hloe jò aih kan bacùn hi brêh . ¹⁴ Chuaq Jesus tanap ka haq “ Paq anoe ka cabô loq, mahaq ìh khoe brêh qmat drah lam patô rađeh ka bài pajàu ,rai dèch ramèn tiaq bàu Môise khoe thê , òeq patô ka wì hnoq.” ¹⁵ Yiniq Chuaq Jesus chác rai èh rai hangai , bác mangai trùh hu tamàng, rai òeq haq broq ka wì jah brêh ka yiniq . ¹⁶ Mahaq Chuaq Jesus xan lam tanòe hawit òeq hu waiq khàn.

Broq brêh ka mangai pen.....

¹⁷ I mòeq hi , Chuaq Jesus qnang hnài , i bìa ngai Pharisi xam bài mangai hnài ranenh trùh hangui ta aih, wì haq loh enh bài plài tagùng Galili , gùng Judê xam Jêrusalem. Cwìang itai Boc Plinh oe ti Chuaq Jesus broq brêh ka mangai yiniq . ¹⁸ Jò aih ,wì tòng aràng moeq ngai pen kùì ta dradrah rai àu atõc haq aih ta crõng hnim, doeh kùa po ,qnhùa qnoh haq aih oe ta dradrah taqne wì mangai bác ta aih, tajang hloe ka ngèa Chuaq Jesus ²⁰ Chuaq Jesus hnoq manoh lùì wì aih , haq doe ka mangai pen “Yòiq kon ,yiniq lui kon khoe jah caqnaih. ²¹ Bài mangai hnài ranenh xam mangai Pharisi hèm dèh ta manoh : Cleq meh iq cabô ,mangai tapoch ùh hòq , enh gùng ka Boc Plinh oe i cabô majah bacłaih yiniq lui? ²² Chuaq Jesus loq ka manoh wì hèm cleq, haq bòch “ Hagleq pì majah hèm qmang aih ta manoh ? ²³ manòeq kô doe :Yiniq lui ìh khoe jah caqnaih, tàng ùh meh doe yòng lam beq, aih maleq ma yì hlàu ka capoch ? ²⁴ Mahaq au dõq pì loq Kon Mangai oe ta crõng taneh i cwìang caqnaih yiniq lui .” Haq doe ka mangai pen “ Au thê ìh ,yòng, dèch dra dra qmat hlài ta hnim beq.” ²⁵ Mangai pen padinh yòng enh ngèa ka wì hloe jò aih raq , bình dèh dradrah haq ma kùì hlài ta hnim, rai manè apôi Boc Plinh . ²⁶ Rìm ngai tadèch qmòe nòeh rai manè Boc Plinh rai crè tarit wì doe : Hi kô joq bèn khoe hnoq trong joq òq jaq halac !.

Jesus creo ka Lewi ,.....acaq moeq qmang ti mangai i yiniq lui.....

²⁷ Atiq ka aih , Chuaq Jesus loh enh gùng , hnoq moeq ngai, broq mangai yõc thèq ,yiniq haq Lêwi ,qnang haqngui tanòe hnim yõc thèq . Haq creo ka mangai aih “ Lam tiaq au.” ²⁸ Lêwi cađac òq dõng ,padinh yòng tiaq Chuaq Jesus. ²⁹ Lêwi broq yiniang kàn ta hnim rađeh padon ka Chuaq Jesus , i bác ngai yõc thèq xam bài mangai qnoeq haqngui acaq pajùm ³⁰ Bài mangai Pharisi xam mangai hnài ranenh mamùc ka mangai tiaq hõc Chuaq Jesus : Hagleq pì ma acaq pajùm ti mangai yõc thèq xam mangai i yiniq lui? ³¹ Chuaq Jesus doe ka wì “ Mangai tadèh ma i nhet ka chaq mangai broq jreo , mangai ùh hrõc ma nhet.” ³² Au

ùh xài trùh òòeq creò ka mangai taq atoq, mahaq creò ka mangai i yiniq lui . ³³ Wì anoe ka haq: Mangai tiaq hóc da Jon xan apàm ka acaq òòeq waiq khàn , èh mangai tiaq hóc da mangai Pharisi hadai , ùh xài qmang ka mangai tiaq hóc da ìh toq acaq toq ôq. ³⁴ Haq padreò bàu “ Jò cla kon òng oe raq dèh tì bua , trùh lem bùi hì yiniang haq, wìa ka pì ma thê wì apàm ka acaq? ³⁵ Mahaq trùh hì wì ma qnùng kon òng lam hangai ka wì , bài hì aih èh wì men apàm ka acaq.” ³⁶ Haq aliah ka wì qmang kô “ Ùh i cabô hit mòeq calep eo neo òòeq clep ka eo dùnh .Tàng broq qmang aih ,eo neo loh ka hyah , èh haqnech maneo hadai ùh taji ka eo dùnh . ³⁷ Hadai ùh i cabô ùc alac neo ta bau akia dùnh , broq qmang aih , alac neo broq ka bau akia dùnh hadah , alac tauc , bau akia hadai pì wìa waq . ³⁸ Alac neo ep ùc ta bau akia neo. ³⁹ Hanoh ùh i mangai leq khoe ôq alac dùnh èh bòch alac neo, majah qmang aih haq doe : alac dùnh yeo jiang”.

Prot hadròc qmau...

6..

¹ I moeq yàng ,wop hì sabat Chuaq Jesus lam pagat trong ruàng qmau , mangai tiaq hóc git hadròc qmau rai tuta hu kaq . ² Bài mangai Pharisi bòch : Hagleq pì majah broq trong ùh troq ta hì Sabat? ³ Chuaq Jesus doe ka wì “ Pì ma qnhòq òòc Đawit broq cleq jò haq xam mangai tiaq haq hadai pangot qmòh? ⁴ Haq mùt ta hnim Boc Plinh , yòc bèn h ta aih qnoh acaq rai am dèh ka bua , bèn h aih toq pajàu ma khòh acaq . ⁵ Haq doe hòm : Kon Mangai aih Chuaq hì Sabat”.

Mangai angwenh tì

⁶ Hì sabat qnoeq hòm , Chuaq Jesus mùt hnài ta hnim tagop qyoh. Ta aih i moeq ngai angwenh tì pah qma . ⁷ Bài mangai hnài ranenh xam mangai Pharisi qnang tì chaq yiniq òòeq rùp Chuaq Jesus , wì tì ngan ta hì sabat haq i broq brêh ùh . ⁸ Mahaq Chuaq Jesus loq ka wì aih qnang hèm trong leq ,haq doe ka mangai angwenh tì “ Yòng beq ,yòng oe taqne kô .” Mangai aih hì yòng oe taqne wì ta aih, ⁹ Aih èh Chuaq Jesus hì doe “ Au bòch pì : Maleq ranenh ma am broq tahì sabat , khòh broq trong lem loq broq trong qmèq? jêh ðac mangai loq dèch mangai?” ¹⁰ Haq tì ngan dudan ðiq ka wì ta aih ,khoe èh haq doe ka mangai angwenh tì “ Bahnho h tì ìh qmat.” Mangai aih broq tiaq qmang bàu , tì haq hì jah brêh . ¹¹ Mahaq mangai Pharisi xam mangai hnài ranenh wì nòeh pì cajaq, wì bòch ðabau broq qmang leq ka Jesus kô èh.

Jesus ròeh moeq Jàt baiq ngai Tiaq cla.....

¹² Oe ta bài hì aih Chuaq Jesus tó c ta wang waiq khàn ,haq rìu qngah ka mang aih òòeq waiq khàn ka Boc Plinh ¹³ Trùh qngah sroq èh ,haq creò dèh mangai tiaq hóc , haq ràih moeq jàt baiq ngai , òòeq broq mangai Tiaq cla: ¹⁴ Haq yiniq ka Simôn aih Phiero, Anrê oh Simôn , Jaco xam Jon ,Philip xam Bathê-lemi ,¹⁵ Mathio xam Thôma, Jaco kon Aphê ,Simôn wì ma creò Xêlot, ¹⁶ Juðe kon Jaco ,xam Juða Ica-riôt ,mangai ma blòq Chuaq Jesus atiq kô èh.

Sôq ramot xam kan nanxa..

¹⁷ Khoe aih , Chuaq Jesus xam mangai tiaq hóc loh enh wang , wì oe tanòe tamang ,ta aih i bàc ngai tiaq hóc xam bàc ngai trùh enh gùng Juðê , Jêrusalem ,xam trong ðiac Tiro,Siðôn ,trùh tamàng bàu haq hnài rai ðôq

haq broq wì jah brêh kan yiniq tôq.¹⁸ Bài mangai kiac mùt ta chac hadai jah brêh dồng .¹⁹ Dìq dồng ka mangai bàc ta aih ti àu bèq haq ,majah qmang aih i kan itai loh enh chac haq, broq ka bàc ngai jah brêh.

²⁰ Chuaq Jesus ngan dèh mangai tiaq hóc ,rai doe

“ Xôq ramot am ka mangai pa , majah qmang aih diac Plinh aih da pì.

²¹ Xôq ramot am ka mangai qnang pangot , majah qmang aih pì jah panàc ,

Xôq ramot ka qnang crò hmoe , majah qmang aih pì jah do lem bùi !

²² Xôq ramot am ka pì , jò wì git ka pì , hnan qnoh pì, hnap hnuq ka pì,cađac yiniq pì tiah kan amùà !Taiq pì tiaq au ²³ Hì aih, thê pì lem bùi , ti aplôh rai manè , majah qmang aih kan baha pì oe ta Plinh èh kàn haraya : Majah qmang aih , kan cadraq wì haq calah nèh hadai khoe tabroq ka bài mangai pajàu qmang aih diq.

²⁴ Mahaq habo ka pì mangai ma padrông , majah qmang aih pì khoe jah qmòe dèh kan alòng !

²⁵ Habo ka pì ,mangai qnang panàc , majah qmang aih pì jah pangot !

Habo ka pì mangai qnang lem bùi , majah qmang aih pì jah hmoe ta-oeh ka kan cachit.

²⁶ Habo ka pì mangai qnang jah bàc ngai tapoch manè , majaq qmang aih kan cadraq wì haq calah nèh hadai broq ka bài pajàu patiah qmang aih diq .

Loq waq ka mangai tagit

²⁷ Mahaq au doe ka pì aih bài mangai qnang tamàng bàu au : Thê loq waq ka mangai tablêq ka pì , broq lem ka mangai git ka pì. ²⁸ Waiq xôq ramot am ka mangai hanip pì , waiq khàn am ka mangai tapoch qmèq ka pì . ²⁹ Cabô tep da pì tabóc pah kô, hnhu hloe ka wì haq tabóc pah tau , cabô hrùiq da pì eo enh gùng , dōq haq wì yóc hloe da pì eo enh dalam. ³⁰ Tàng cabô bòch cleq ,drah am , tàng i cabô blah yóc da pì cleq ,apaq bòch yóc hlài . ³¹ Pì enh wì broq ka rađeh qmang leq , pì ep broq ka wì qmang aih.

³² Tàng pì loq waq toq mangai ma loq waq ka pì , aih ma ep pòq dòeh cleq ? Mangai i yiniq lui hadai loq waq ka mangai loq waq ka haq. ³³ Tàng pì toq hanò ka magari loq hanò ka pì , aih ma i pòq dòeh cleq? Mangai broq yiniq lui hadai qmang aih diq. ³⁴ Tàng pì am đồ ka wì qnoeq cleq , mahaq toq ngèh ka wì am hlài , aih ma i pòq dòeh cleq ? Mangai i yiniq lui hadai am ka mangai i yiniq lui ti linh, đòeq hu jah yóc hlài xam xèm xam goe. ³⁵ Mahaq thê pì loq waq ka mangai tablêq ka pì , loq hanò ka wì , loq am ka wì , apaq ngèh ka yóc hlài cleq enh wì. Aih èh kan baha ka pì kàn joq qnàng , aih pì jah broq kon da Mangai diq Jaq haqnèq , majah qmang aih haq hanò ka mangai gôpla xam mangai broq dù. ³⁶ Thê pì loq waq tiah ka Baq pì aih Mangai ma xan loq waq

³⁷ Apaq ti hadrah dèh cabô , èh pì ùh hìaq pòq kan hadrah , apaq taqmòq yiniq lui ka cabô , aih wì hadai ùh hìaq taqmòq yiniq lui ka pì. Thê cađac da wì qnoeq yiniq lui , aih wì hadai cađac da pì yiniq lui . ³⁸ Am beq , aih èh wì hadai am hlài ka pì , èh wì yóc cađap kàn , xàu dōq haq nhét ,tống qmòe ka bình , tah tam ta eo pì

,majah qmang aih pì dèch ka wì maneh leq ,wì hadai dèch hlài maneh aih. ³⁹ Haq hadai capoch aliah hu hnài wì rameh : Mangai ùh xau qnung mangai ùh xau ajah ? Ùh xài diq baiq ka wa aih clih ta ralùng qmòh?”

⁴⁰ Mangai tiaq hōc ùh yeo haqnèq ka mangai hnài , mahaq mangai tiaq hōc leq ma gēh geo , aih èh haq jah tiah dèh mangai hnài . ⁴¹ Gleq ìh hnoq ciah ta mat oh daq ìh , mahaq ùh hnoq long ban ta mat cla ? ⁴² Ìh doe dèh ka oh daq : Aleq dōq au doeh ciah ta mat ìh , mahaq ùh hnoq dèh long ban ta mat cla ! pì capoch dèh qmang leq majah ? Wùih ! bài mangai patiah toq enh gùng meh ! doeh long ban loh enh mat cla qmat adroe , aih èh men xau hnoq hu doeh ciah ta mat oh daq.

⁴³ Long loh plì qmèq aih ùh xài long lem , long loh plì lem aih ùh xài long qmèq ⁴⁴ majah qmang aih ngan plì ma canau ka long . Ùh i cabô git plì pōc ta yila , ùh i cabô git plì nho ta brech. ⁴⁵ Mangai ta manoh haq bình trong lem , hloh bàu rangot lem ,mangai dù ta manoh bình trong dù , hloh bàu dù , majah qmang aih khoe bình ta manoh men hloh ajang bàu.

⁴⁶ Hagleq pì creô ka au : Chuaq , Chuaq ,mahaq ùh dùh ka broq tiaq bàu au? ⁴⁷ Kô au patô ka pì loq mangai trùh ti au , tamàng bàu au ,broq tiaq bàu au ,aih èh haq tiah ka cabô . ⁴⁸ Haq aih tiah ka mangai broq hnem , chia jrang cajrùq, dèch hnem enh crōng hmo talech:Diac tōc ,diac dèh glàm ta hnim aih ,mahaq ùh dalac , majah qmang aih broq khoe cajap . ⁴⁹ Yàng mangai leq tàng bàu au mahaq ùh broq tiaq, haq aih tiah ka mangai broq hnim ta taneh ùh i ka xèm , diac dèh glàm ta hnim aih ,moeq ayàc raq khoe ralàih , raliang diq dōng .

Cwan oe ta Cabênaum.....

7.....

¹ Jò khoe hêq ka hnài bàu aih , Chuaq Jesus mùt ta Cabênaum ² Cwan lình tagùng aih i moeq ngai hapōng haq diq jaq loq waq ,qngang ùh hrōc ten cachit . ³ tàng wì anoe i Chuaq Jesus trùh ,cwan thê wì gucraq mangai Judà lam canòm ka Chuaq Jesus broq brêh dèh ka hapōng . ⁴ Wì aih trùh ti Chuaq Jesus ,wì doe : Cwan kô troq ka ìh dì bàu haq , ⁵ majah qmang aih haq loq waq ka mangai bèn, khoe broq am ka nhèn hnim tagop . ⁶ Chuaq Jesus lam ti wì aih . Jò ten trùh hnim , cwan aih thê dèh bua lam anoe ka Chuaq Jesus : Waiq Chuaq! Ìh ùh dùh baxa hrìn rađeh , majah qmang aih au ùh tajì ka đìh Ìh mùt dèh ta hnim . ⁷ Au hadai khoe hèm rađeh kô qnhòq tajì ka trùh ti ìh .Mahaq ìh tapoch toq bàu raq bri ka hapōng au brêh . ⁸ Majah qmang aih au kô hadai oe enh qneq ka cwiang wì qnoeq , au hanoh i lình enh qneq ka cwiang au diq , au doe ka mangai kô :Lam beq! haq aih hi lam, thê mangai qnoeq : Trùh tacô ! haq hi trùh , au thê dèh hapōng : Broq yiniq kô ! haq hi broq. ⁹ Jò Chuaq Jesus tàng bàu aih , hamàih dèh ta manoh, Haq hwi ngan bài mangai lam tiaq rađeh ,haq doe “ Au doe ka pì , oe ta Isorali , au qnhòq lah hnoq mangai leq i kan lùì kàn dāng kô.” ¹⁰ Khoe aih , bài mangai cwan ma thê wì lam aih ,wìh hlài ta hnim ,hnoq mangai hapōng khoe brêh .

¹¹ Hì atiq, Chuaq Jesus lam ta plài Na-in, mangai tiaq hōc xam bacc mangai lam tiaq haq.¹² Jò haq bu trùh gàu plài , hnoq wì tòng qnoh moeq ngai cachit , aih kon calô gucadri hadrô ta plài aih , haq i dèh moeq toq kon aih raq ,bacc ngai ta plài aih wiang lam ti mangai hadrô aih. ¹³ Jò Chuaq Jesus hnoq, tamanoh haq ha-och ka mangai miq aih ,haq doe “Apaq hmoe.” ¹⁴ Khoe aih , Chuaq Jesus thia haten ,haq bèq hom ,bài mangai tòng hanang hi yòng .Haq hi doe “ Mangai radam meh ,au thê oh yòng beq.” ¹⁵ Mangai cachit padinh hangui rai tapoch tuàng , khoe aih Chuaq Jesus hi am da miq haq .¹⁶ Mangai leq mangai meh crè đeh hra ,rai manè

apôl Boc Plinh rameh : I moeq pajàu kàn khoe loh taqne bèn. Boc Plinh khoe trùh òeq wiang dèh ti mangai da Haq. ¹⁷ Bìac aih ,wì anoe jàp cròng Judê xam gùng dudan ta aih.

¹⁸ Mangai tiaq hóc da Jon taqmon òiq òng bài yiniq aih ka Jon .¹⁹ Jon creò dèh wa baiq ngai ma tiaq hóc raðeh, thê wa lam trùh ta Chuaq Jesus hu bòch : Ìh ajoq mangai òeq trùh tacô , nhèn ahiaq ep gòm mangai qnoeq hòmh? ²⁰ Jò wa aih trùh ta Chuaq Jesus , wa doe : Jon Baptit thê ma trùh bòch : Ìh ajoq mangai òeq trùh tacô loq nhèn ep gòm mangai ma qnoeq ? ²¹ wop jò aih Chuaq Jesus broq brêh bàc ngai yiniq , ùh hróc ,mangai i kiac dù mùt ta chac , rai broq bàc ngai ùh xau jah hnoq . ²² Chuaq Jesus padreò bàu ka wa “ Hlài anoe ka Jon loq rìm yiniq chòp khoe hnoq ,khoe tàng : Mangai ùh xau jah hnoq , mangai liap jah lam , mangai bacùn jah hreo ,mangai clic jah tàng , mangai cachit jah rih hlài, mangai pa jah tamàng Bàu lem . ²³ Xòq ramot ka mangai leq ùh hiaq catoeh ka au.

²⁴ Jò wa aih khoe lam , Chuaq Jesus hi anoe trùh Jon òeq bài mangai bàc ma lam tiaq haq tàng “ Pì khoe lam ngan cleq taqnòe hawit ? pì lam ngan triang niaq cayeo ma hlui qmòh? .²⁵ ùh qmang ai pì lam ngan cleq hòmh ? ngan mangai caxùnh eo lem qmòh? Hatau wì ma caxùnh eo canaq , mangai oe acaq rahù òiq oe ta hnim bùa . ²⁶ Mahaq pì lam ngan cleq hòmh ? Mangai pajàu qmòh? Joq au anoe ka pì ùh hnau ka pajàu hòmh . ²⁷ Kò raq mangai ma khoe i bàu achih trùh haq :

Kò au thê dèh mangai wê bàu lam adroe ka Ìh ,

Haq aih èh ma palauq da ìh trong enh ngèa ka Ìh .

²⁸ Au anoe ka pì , òiq òng ka bài mangai gucadri ma hauang qnoh ,ùh i mangai leq yeo kàn ùh hnau ka Jon , mahaq oe ta òiac Boc Plinh, mangai yac ka qyoh òàng leq ,dua haq yeo kàn ùh hnau ka Jon . ²⁹ Òiq òng ka bài mangai ta aih hloe xam mangai yóc thèq khoe jah Jon broq baptem, wì tàng bàu Chuaq Jesus hnài , mangai leq mangai meh òiq doe Boc Plinh aih taq atoq.³⁰ Mahaq mangai Pharisi xam mangai hnài ranenh chàih caðac trong Boc Plinh enh taqmroq ka wì haq, majah qmang aih wì ùh waq Jon broq baptem ka òaðeh , ³¹ Chuaq Jesus doe “ Au aliah wì qnhòng kò tiah ka cabô ? ³² Wì haq tiah ka wì qyoh hangui ta nòe atech ,doe ka dabau :

Nhèn khoe hlui taliaq ,gleq pì ma ùh ti caðoeq ,

nhèn khoe ti calêu atoch gleq pì ùh crò hmoe .

³³ Jon khoe trùh ,haq ùh acaq bèn ùh ôq alac , aih pì doe :I kiac dù oe ta chac haq . ³⁴ Kon Mangai trùh , haq acaq haq ôq , aih pì doe : Meh mangai plai toq ka acaq, òaiq ka ôq , taqmùt ti bài mangai yóc thèq xam bài mangai i yiniq lui .³⁵ Mahaq kan khun rabiaq aih jah creò ka haq taq atoq canòm ajang yiniq broq da wì haq .

Mangai gucadrih ùh lem sùt òau ka Jesus.....

³⁶ I moeq ngai Pharisi akhen ka Chuaq Jesus trùh acaq dèh ta hnim , jò khoe mùt ta hnim , Chuaq Jesus hi hangui ³⁷ Tagùng aih , i moeq ngai gucadri rih ùh wìa , hia doe Chuaq Jesus qnang hangui acaq ta hnim mangai Pharisi , haq aràng moeq toq cabi ngóc tabòc enh òalam tah bình òau xua thùm . ³⁸ Haq yòng òeh

enh rù ajang nòe jènh Chuaq Jesus , crò hmoe , diac mat taclih ta jènh Chuaq Jesus , khoe èh haq yóc dèh xác gàu hi xùt , èh haq hip jènh Chuaq Jesus , khoe aih haq xùt dầu ta jènh Chuaq Jesus. ³⁹ Mangai Pharisi ma akhen ka Chuaq Jesus , hnoq qmang aih , haq hèm dèh ta manoh : Mangai kô tàng haq joq pajàu , aih wia ka haq ùh loq ka mangai gucadri ma bèq rađeh aih cabô , wia ka haq ùh loq ka gucadri qmat mangai qmang leq, qmat xài mangai binh toq yiniq lui .⁴⁰ Chuaq Jesus doe ka haq “ Simôn , au i biao nà anoe ka ìh.” Simôn padreo bàu : Mangai hnài ,ìh anoe beq. ⁴¹ I moeq ngai aih , i baiq ngai pòq dòeh haq : moeq ngai pòq padam hrinh đoniê , moeq ngai pòq padam jàt . ⁴² Dìq baiq ka wa ùh i cleq hu caqnaih dòeh , cla wì craq hi cađac đống ka wa . Taqne wa baiq ngai aih ,maleq ma loq waq ka wì craq yì bác ? ⁴³ Simôn hi têu : Au hèm mangai leq ma khoe jah cađac yeo bác aih ,haq aih loq waq yì bác . Chuaq Jesus doe “ Ìh hèm troq.” ⁴⁴ Khoe aih ,haq wìh ta gucadri rai doe ka Simôn “ Ìh i hnoq mangai gucadri kô ? Au mùt ta hnim ìh , ìh ùh qnoh qmòe diac qnheo jènh , mahaq gucadri kô yóc dèh diac mat srùh jènh au , khoe èh yóc dèh xác gàu hu xùt ⁴⁵ Ìh ùh hip au , mahaq haq kô patep haq mùt hnim ìh ,haq hip jènh au ùh hêq . ⁴⁶ Ìh ùh xùt dầu ta gàu au , yàng da haq kô yóc dầu xua thùm xùt ta jènh au . ⁴⁷ Aih ìq au majah doe ka ìh ,yiniq lui mangai gucadri kô bác joq qnàng , khoe jah caqnaih dìq đống , majah qmang aih haq khoe loq waq yeo bác , yàng da mangai jah caqnaih yeo biao ,haq loq waq yeo biao .⁴⁸ Chuaq Jesus doe ka mangai gucadri “ Yiniq lui ìh khoe jah caqnaih đống .” ⁴⁹ Bải wì ma hadai hangui acaq moeq qmang ta aih hèm ta manoh : Mangai kô ìq cabô ma doe rađeh i cwìang caqnaih yiniq lui ? ⁵⁰ Mahaq Chuaq Jesus doe ka mangai gucadri aih “ Kan lùì ìh khoe dèch ìh , lam ka catèm oq.”

Aliah ka mangai rai adrech...

8

¹ Atiq ka aih, Chuaq Jesus lam enh gùng kô trùh gùng tau ,enh plài kô trùh plài qnoeq ,anoè hnài Bàu lem lem da diac Boc Plinh .I moeq jàt baiq ngai tiaq cla oe ti haq.² Èh hadai i wì gucadri lam tiaq haq, aih la bài mangai khoe jah paclaih enh kiác dù , khoe jah brêh ka yiniq : Mari , wì ma creó Mađolen , tapèh toq kiác dù loh enh chac haq , ³ Jan-no , cadri da Chu-sa , aih cwan wèq ta hnim bùa Hêrôt ,Su-sana xam bác ngai qnoeq hòm wiàng dèch bác jènh ka haq . ⁴ Jò bài mangai bác tagop ti dabau xam mangai enh rìm plài trùh dìq ta Chuaq Jesus , haq hi yóc bàu aliah hu hnài wì : ⁵ “ I moeq ngai lam rai dèh adrech. Jò rai , moeq qnah clih ti trong , aih wì hi troq jôiq èh chìm enh qnhèq loh jôh đống . ⁶ Moeq qnah clih ta tanèh raga ,bu hon ma loq khoe croh majah qmang aih ùh i đêh toq biao hnha kan da-ìm.⁷ Maqnoeq taclih taqne xem yila , haq hon pajùm ti yila , haq toq hlac loh ka pi jah kàn . ⁸ Adrech ma qnoeq clih tanòe tanèh lem . Haq hon lem ,loh hadròc , moeq jah moeq hrinh. Jò anoe qmang aih haq doe “ Mangai leq i don, tamàng beq.”

⁹ Mangai tiaq hóc bòch haq bàu aliah aih anoe cleq.¹⁰ Haq doe “Kan hlèp tanòe diac Plinh khoe am pì loq , yàng wì qnoeq aih yóc bàu aliah hu anoe , đôq wì ngan manhaq ùh hnoq cleq , tamàng mahaq ùh qnì tàng .

¹¹ Bàu aliah aih rameh : Adrech aih bàu Boc Plinh ¹² Adrech taclih ti trong , aih bài mangai tàng bàu, yàng atiq ka aih kan kiác trùh tablah yóc bàu ta manoh cliác wì haq , yùq wì haq lùì èh loq jah dèch qmòh. ¹³ Adrech taclih nòe raga ,aih bài mangai bu tàng bàu khoe lem bùi yóc bàu aih, mahaq ùh i ka riah . Wì lùì moeq rayàc , jò i kan khech tát , wì haq hi talùi .¹⁴ Adrech taclih ta yila ,aih bài mangai tàng bàu , mahaq tiaq dèh manoh kan loq lèt kan padròng kan rìh qmòe ka hlàu toq taqnhòng kô , broq ka bàu aih pi jah chet ,

pi loh qmòe pli ma yi wia. ¹⁵ Mahaq adrech taclih tanòe taneh lem aih bài mangai i manoh cliac lem joq qnàng , bài mangai tàng bàu , rai cajak manoh wèq bàu aih hi jah loh pli.

Kan qngah

¹⁶ Ùh i cabô bủ ðen èh yỏc griang gủp cađac , tàng ùh meh cadoc ta caqnàm , mahaq dẻch tanẻ haqnhẻq , dỏq cabỏ mùt ta hnim ðiđ jah hnoq kan qngah .¹⁷ Majah qmang aih ùh i cleq hlẻp , èh ma ùh hnoq , ùh i cleq cadoc èh wì ma ùh loq , ma ùh hia ep patỏ qnoh.¹⁸ Qmang aih pì ep tamàng ma rabiaq bàu pì tàng majah qmang aih mangai khoe i , èh jah am tam , mangai leq ùh i ,aih èh jah doeh yỏc hloe yiniq cleq haq xoh ðeh khoe i

Miq xam wì oh Jesus.....

¹⁹ Jỏ aih , miq da Chuaq Jesus xam wì oh haq lam chaq haq .Yàng mangai bẻc hrẻnh , ùh jah thia haten ka haq .²⁰ I mangai lam anẻ ka haq : Miq ìh xam wì oh ìh oe enh gủng ,enh glẻm ìh . ²¹ Mahaq Chuaq Jesus padreo bàu “ Miq au xam oh ðaq au aih bài mangai tàng bàu Boc Plẻnh rai broq tiaq bàu aih” .

Bahủt tadiac.....

²² I moeq hì , Chuaq Jesus loh taboang ti mangai tiaq hỏc , haq ðoe “ Beq bẻn tỏc pah tau hlỏng .” khoe wì hi lam .²³ Jỏ boang qnang cadầu, Chuaq Jesus kủi . I bahủt trủh ta hlỏng aih , ðiac bẻnh taboang ,qnang jỏ yat ðiđ jaq . ²⁴ Mangai tiaq hỏc tủh padriủ haq : Mangai hnẻi ,mangai hnẻi , bẻn cachủt manẻeq kỏ raq! Mahaq jỏ haq bu yỏng , haq tagẻih ka cayẻo xam ðiac dỏq wa hatẻnh , aih wa hi hatẻnh hatot hloe . ²⁵ Haq ðoe ka mangai tiaq hỏc “ Manoh lủi pi taleq hỏm .” Mangai tiaq hỏc rai cre rai hamẻih ,bỏch dabau : Mangai kỏ ìq cabỏ ,jaq cayẻo xam ðiac ðiđ iủ ðỏng bàu haq?

Broq brẻh ka mangai kiac rủp

²⁶ Khoe aih wì trủh tagủng mangai Jẻrasẻ , tajaq ka gủng Galili .²⁷ Jỏ Chuaq Jesus tỏc tagỏ , tagủng aih i moeq ngai bẻc kiac tachac haq . Khoe ðủnh ,haq pì lah caxủnh eo , pì lah oe ta hnim , mahaq oe ta cadrẻng hanang . ²⁸ Bu hnoq Chuaq Jeus , haq aih cajiah ta gruẻng ,rai pacro ðađẻh anẻ jẻnh Chuaq Jesus , haq tapoch qmẻo cadẻh : Ìh enh broq ka au cleq kỏ ìq , Chuaq Jesus kon da Boc Plẻnh haqnhẻq au waiq ìh ùh ðủh baxa au ðẻh. ²⁹ Majah qmang aih , Chuaq Jesus i thẻ kiac ðủ aih loh ma khoe ka mangai kiac rủp khoe ðủnh aih . Yac ka wì tẻt haq , kẻt , clang jẻnh tì haq , ðua haq hrẻt cađac caxi mem ,wah cađac long clang , kiac qmủt haq tanẻ hawit . ³⁰ Chuaq Jesus bẻch haq “ Gẻ yiniq cleq?” haq padreo bàu : Bẻi lẻnh ,majah qmang aih bẻc toq kiac khoe mùt tachac haq.³¹ wì haq cali calo ka Chuaq Jesus apaq caqủnh wì haq kỏẻ jrủq . ³² Jỏ aih i meq calủ chủa qnang acaq tawang . Bẻi kiac bẻch Chuaq Jesus am wì haq jah mùt ðẻh ta calủ chủa aih , Chuaq hi am .³³ Bẻi kiac loh enh mangai aih ,mủt ta calủ chủa , calủ chủa oe enh bẻc haqnhẻq cadầu hatẻp gẻủ ta hlỏng cachủt ðiđ ðỏng. ³⁴ Bẻi mangai ban chủa hnoq qmang aih ,drah cadầu lam amot ,rai anẻ yiniq aih jẻp rẻm gủng rẻm plẻi ta aih.³⁵ Wì ðahrỏp loh ngan , jỏ wì haq trủh tanẻ Chuaq Jesus , hnoq mangai kiac neo loh enh haq aih qnang hangui nẻ jẻnh Chuaq Jesus , srẻp eo cwẻn , gẻủ ngoc prau prẻnh , wì yủq pi cajaq . ³⁶ Bẻi mangai ma khoe hnoq kan halac aih , anẻ ka hlẻi jẻp ka phủ crỏng loq mangai kiac rủp aih khoe jah brẻh qmang leq ,³⁷ ðiđ ðỏng mangai oe ta gủng Jẻrasẻ cali calo ðoe ka Chuaq Jesus ðẻeq

haq lam đac tagùng qnoeq, majah qmang aih wì crè pi cajaan . Haq loh taboang wìh hlài pah tau . ³⁸ Mahaq mangai kiac ma khoe cadàu loh enh chac , haq bòch tiaq Chuaq Jesus , mahaq Chuaq Jesus thê haq hlài , Chuaq Jesus doe ka haq ,³⁹ “ Hlài ta hnim hu anoe ka wì dōq wì loq Boc Plinh khoe broq am ka ìh cleq.” Qmang aih, haq hi lam rai anoe hlài rìm yiniq Boc Plinh khoe broq am ka rađeh jàp rìm gùng.

Kon cadri Jairu xam mangai gucadri dahrôq mahim.....

⁴⁰ Jò wì wìh hlài , i bacc ngai đìh Chuaq Jesus , majah qmang aih mangai leq mangai meh ngèh đeh hra ka haq. ⁴¹ I moeq ngai wèq hnim tagop qyoh yiniq haq Jairu trùh bla op nòe jènh Chuaq Jesus , cali calo canòm ka Chuaq trùh dèh ta hnim . ⁴² Majah qmang aih haq i moeq ngai kon cadri moeq jàt baiq hanam khoe ten cachit . Jò Chuaq Jesus lam ti trong bài wì dahren dudan ka haq . ⁴³ Jò aih i moeq ngai gucadri yiniq khoe moeq jàt baiq hanam dahrôq mahim , bac jènh haq khoe yam diq dōng ka bài mangai broq jreo , mahaq ùh i ka mangai leq haqnauq haq brêh , ⁴⁴ haq trùh enh rù bèq haqmai eo Chuaq Jesus , tajòe qmòe mahim haq hi xốt . ⁴⁵ Chuaq Jesus doe “Cabô khoe bèq au ?” mangai leq mangai meh haqngah đeh hra , Phiero xam bua haq doe :Mangai hnài ,mangai bacc ti dudan rai hnen ìh . ⁴⁶ Chuaq Jesus doe “ I mangai khoe bèq au , au tàng i padren loh enh chac au .⁴⁷ Mangai cadri aih hnoq dađeh cadôc pi hlèp , haq tarit thia bla op dađeh ta haqneq ajang nòe jènh Chuaq Jesus enh ngèa mangai bacc , haq anoe dōng hagleq đeh majah bèq haqmai eo Chuaq Jesus , èh manòeq rađeh khoe jah brêh qmang leq . ⁴⁸ Mahaq Chuaq Jesus doe ka haq “ Yôiq kon cadri au , manoh lùì kon khoe broq kon jah brêh , lam ma catèm beq.”

⁴⁹ Chuaq Jesus oe raq capoch , i mangai loh enh hnim Jairu ,craq wèq hnimtagop qyoh doe ka haq : Kon cadri ìh khoe cachit , oe pangài dèh ka haq qmat hòm . ⁵⁰ Tàng bàu aih, mahaq Chuaq Jesus doe ka Jairu “Apaq yùq ! toq lùì raq, aih èh kon ìh hi jah brêh.” ⁵¹ Jò khoe trùh ta hnim , Chuaq Jesus am toq Phiero ,Jaco ,Jon xam wa miq baq kon qyoh aih mùt tiaq haq . ⁵² Jò meh diq ka mangai ta aih ta-oeh ti atoch ka kon mangai aih , Chuaq Jesus doe “ Hêq pi dùh hmoe ! kon mangai kô ùh xài haq kachit , haq qnang kùì .” ⁵³ Wì do ka haq, majah qmang aih wì loq kon mangai aih joq khoe cachit . ⁵⁴ Mahaq Chuaq Jesus carùp ti kon cadri qyoh aih rai doe “ Kon au , yòng beq !” . ⁵⁵ Mahua yang mùt hlài tachac ,haq hi padinh yòng . Khoe aih Chuaq Jesus thê wì qmì kon qyoh aih acaq . ⁵⁶ Miq baq kon qyoh aih diq jaq hamàih ta manoh , mahaq Chuaq Jesus ùh lòh wa anoe ka cabô loq yiniq aih .

Moeq jàt baiq ngai Tiaq cla loh lam.....

9

¹ Chuaq Jesus creò ka wì moeq jàt baiq ngai , haq am ka wì padren cwàng itai òeq drùh hnan kiacc chōc, broq brêh ka mangai yiniq ² khoe aih haq thê wì loh lam anoe hnài trong diac Boc Plinh rai broq ka mangai ùh hrōc jah brêh .³ Haq tanap ka wì “ Jò pì lam ùh dùh wê cleq , yac ka long dùi ,yac ka ayôp, yac ka bēnh , bacc jènh , apaq wê racop baiq blah eo .” ⁴ Pì mùt hnim leq ,pì oe ta aih trùh jò loh enh plài aih , ⁵ tàng wì ùh đìh ùh pachùh pì , loh enh plài aih pì hapùih blo top tajènh pì òeq broq kan pagau am ka wì haq hnoq.” ⁶ Moeq jàt baiq ngai tiaq cla , loh lam enh plài kô trùh plài tau , anoe Bàu lem rìm nòe rai broq ka bacc ngai jah brêh ka yiniq.

Hêrôt yùq crè....

⁷ Jò aih , bùa Herôt hĩa wì anoe rìm yiniq Chuaq Jesus ma khoe broq , haq loh ka rawè ,hèm pi hlùh ,majah qmang aih i ngai doe : aih Jon, khoe rih hlài enh cachit . ⁸ mangai qnoeq doe :Êli khoe loh , mangai qnoeq hò m doe : taqne bài pajàu dùnh calah nẻh i moeq ngai khoe rih hlài . ⁹ Mahaq Hêrôt doe: Au khoe thê wì pốt ranống Jon , mangai kô aih cabô hò m ,gleq au ma jah tàng bàc trong haq broq? Bùa Herôt hi ti chaq nen hu glàm Chuaq Jesus.

Jesus qmì padam muàn mangai acaq.....

¹⁰ Moeq jà t baiq ngai tiaq cla wìh hlài taqmon ka Chuaq Jesus rìm yiniq wì haq khoe broq , haq qnong wì aih tiaq haq , wì lam đeh crài haten ka plài Bêtsaïđa . ¹¹ Mahaq bài mangai ta aih wì tàng , wì hi lam tiaq haq . Chuaq Jesus đìh wì aih , hnài đòq wì loq ka diac Boc Plình rai broq ka mangai yiniq jah brêh . ¹² Trùh mat mahi ten clih , mòeq jà t baiq mangai tiaq cla thia haten ka Chuaq , wì doe : Ìh thê wì hlài beq ,đòq wì haq ti mù t roc gùng roc plài ten dudan tacô , hu chaq nòe padài rai chaq dahwèq acaq , majaq qmang aih bèn kô qnang oe tanòe hawit . ¹³ Mahaq haq doe ka wì “ Pì raq mangai hu qmì ka wì acaq!” Moeq jà t baiq ngai tiaq cla têu : Tàng joq nhèn ùh lam rot dahwèq acaq am diq ka wì tacô , nhèn i padam toq bẻnh xam baiq pliang ka raq , ¹⁴ (Jah padam muàn mangai gualô ta aih) Chuaq Jesus doe ka mangai tiaq hỏc “ Thê wì hangui tang brong padam jà t ngai . ¹⁵ Mangai tiaq hỏc broq tiaq bàu aih , thê diq đởng wì hangui . ¹⁶ Èh Chuaq Jesus yỏc padam toq bẻnh xam baiq pliang ka , haq qngỏc ngan ta plình , manẻ apôi Boc Plình khoe aih goh bẻnh . Haq am ka mangai tiaq hỏc ti axong ka mangai ta aih . ¹⁷ Mangai leq mangai meh acaq panàc đeh hra , wì toch hlài bài haqnech rah jah moeq jà t baiq rajo.

Phiero doe Jesus aih Christ

¹⁸ I moeq hì , jò Chuaq Jesus qnang waiq khàn đeh moeq ngai, mangai tiaq hỏc tagop dudan ka haq .Haq bỏch “ Diq ka bài mangai bàc doe au kô ìq cabô? ¹⁹ Wì padreo bàu : Mangai kô doe Jon Baptit , mangai tau doe Êli , mangai qnoeq hò m doe moeq ngai pajàu qnhò ng calah nẻh rih hlài. ²⁰ Haq bỏch hò m “ Ha pì , pì doe au cabô ? Phiero doe : Ìh kô Christ , kon da Boc Plình . ²¹ Chuaq Jesus ùh lòh wì mangai tiaq hỏc anoe yiniq aih ka cabô loq , ²² Haq doe tam ka wì “ Kon mangai ep glàm bàc kan xalep , bài wì gucraq ,bài pajàu xam mangai hnài ranenh kẻh qnoh cađac haq , wì jẻh cađac haq , piq hì èh haq hi rih hlài . ²³ Khoe aih ,haq doe “ Tàng mangai leq enh tiaq au , ep cađac rađeh , rìm hì xủi dẻh long pagat lam tiaq au .” ²⁴ Majah qmang aih , cabô enh wẻq dẻh kan rih , aih èh hnhung , mangai leq cađac dẻh kan rih đòeq tiaq au , haq aih èh jah dẻch . ²⁵ I jah cleq ka mangai jah diq đởng crỏ ng taneh kô mahaq cla haq aih raliang hnhung . ²⁶ Mangai leq camaih đac ka au xam bàu au ,aih èh Kon mangai hadai camaih chau ka wì aih , jò haq trùh hangui dẻh ta kan ranhò m cla haq, kan ranhò m Baq xam kan ranhò m bẻnh plình hadrẻh . ²⁷ Joq qnàng au doe diq ka pì mangai qnang yỏ ng tacô ,i ngai ùh cachit adroe ka wì jah hnoq diac plình” .

Jesus hatuàng ka Môise sam Êli.

²⁸ Qnah ta rahem hì atiq ka anoe bàu aih , Chuaq Jesus qnong Phiero , Jon xam Jaco tiaq haq tỏc tawang đòeq waiq khàn . ²⁹ Jò qnang waiq khàn , hadrò haq loh ka crài , eo haq loh ka taboc camla . ³⁰ I Môise xam Êli oe ta kan ranhò m loh hatuàng ti haq . ³¹ Wì hatuàng trùh biac Chuaq Jesus cachit, aih trong haq ep broq gẻh ta Jêrusalem . ³² Phiero xam bua haq enh kủi pì cajaq , mahaq jò bu cadrat , wì hnoq kan ranhò m Chuaq Jesus xam baiq ngai qnang yỏ ng ti haq . ³³ Jò wa aih bu talah ka Chuaq Jesus, Phiero doe ka haq : Mangai

hnài , bèn oe tacô lem joq qnàng , beq bèn broq piq toq hapom tacô ,moeq toq ka ìh , moeq toq ka Môise , moeq toq ka Êli .(Haq ùh qnì ka rađeh khoe anoe cleq) ³⁴ Jò haq oe raq anoe , i moeq cato yùc trùh glom ñiq ka wì haq ,bài mangai tiaq hõc crè pi cajaq .³⁵ Jò aih i bàu enh yùc doe : “Kô Kon da au , Mangai au khoe ràih dèh, drah tamàng bàu haq” . ³⁶ Jò bàu aih atêh loh ,wì haq hnoq moeq ngai Chuaq Jesus raq. Mangai tiaq hõc oe aiq hatinh , ùh anoe ka cabô loq ñeh khoe hnoq cleq .

Mangai kiac rùp

³⁷ Hi atìq , jò wì loh enh bui wang , pi cajaq mangai lam ñih haq .³⁸ Ta aih i moeq ngai creò cadêh : Mangai hnài ! au cali calo ñeh ka ìh , lam ngan bìa da au kon , au i dèh moeq toq haq aih raq .³⁹ Moeq toq kiac rùp haq oe hi cachech cachaiq cadêh , kiac aih rapôh rapàt haq ñiq jaq , hacùng loh toq ñiac hai camùh, chac haq hech hoch men waq loh .⁴⁰ Au khoe canòm ka mangai tiaq hõc ìh ñrùh qnoh kiac aih ,mahaq wì ñrùh ùh jah .⁴¹ Chuaq Jesus doe “ Wùih ! caxi noe ùh qnì lùì rai gôpla tau , au oe ti pì , au àt ka pì trùh pang leq kô èh ? Drah aràng kon ìh lam acô” . ⁴² Mangai kon calô aih bu thia haten , kiac caqnùt haq tacro ta haqneq , rai ranhùq haq .Mahaq Chuaq Jesus lech ka kiac aih, khoe èh haq broq brêh ka kon qyoh aih èh hi am hlài da baq haq

Jesus anoe trùh dèh hi kachit.....

⁴³ Mangai leq mangai meh hamàih ñeh hra kan itai Boc Plinh. Jò ñiq ka wì ta aih oe raq manè trong Chuaq Jesus ma broq , haq doe dèh ka mangai tiaq hõc ⁴⁴ “ Pì tamàng ma rabiaq haq bàu au anoe ka pì kô èh : Kon mangai kô èh mùt ta ti kông wì .” ⁴⁵ Mahaq mangai tiaq hõc ùh qnì tàng , bàu aih khoe cadoc ka wì haq ñôq wì haq ùh loq ,wì hadai ùh hùà bòch haq bàu aih . ⁴⁶ Bài mangai tiaq hõc tarahen ti dabau hu ngan taqne wì haq kô èh mangai leq ma yeo kàn ñông . ⁴⁷ Mahaq Chuaq Jesus loq ta manoh bài mangai tiaq hõc , haq yõc moeq ngai kon qyoh ñòeq oe haten ka haq , ⁴⁸ Haq doe “ Enh dalam ka yiniq au cabô ñih kon qyoh kô, aih haq ñih au ,cabô leq ñih au,aih haq ñih Mangai khoe thê au .Majah qmang aih taqne pì mangai leq ma yeo qyoh ñông , aih raq mangai ma yeo kàn ñông .

⁴⁹ Jon doe : Mangai hnài ,nhèn i hnoq mangai yõc yiniq ìh ñòeq hnan qnoh kan kiac , nhèn khoe tàt haq ,majah qmang aih haq ùh pajùm moeq qmang ti bèn .⁵⁰ Chuaq Jesus padreò bàu “ Apa q tàt haq, majah qmang aih mangai leq ùh tablêq ka pì , aih haq hatroq ti pì” .

Jesus tõi ta Jerusalem

⁵¹ Khoe ten trùh dèh jò Chuaq Jesus pi oe ta crõng taneh , dua haq waq ka tõi ta Jerusalem .⁵² Haq thê mangai lam bahìa adroe . Wì aih loh lam , mùt ta plài mangai Samari ñòeq hu padon hnim padài ka haq .⁵³ Mahaq mangai Samari ùh waq ñih haq , majah qmang aih haq tõi ta Jerusalem . ⁵⁴ Jò mangai tiaq hõc aih la Jaco xam Jon ,hnoq qmang aih ,wa doe : Chuaq au , ìh i enh ma creò ka ùnh enh plinh loh bùh ñac wì qmat loq ùh ? ⁵⁵ Mahaq Chuaq Jesus tawìh ta wa , haq tagàih “ chòp ùh qnì cleq ma jrôq chiu rađeh qmat.” ⁵⁶ Khoe aih haq xam mangai tiaq hõc hi lam ta plài qnoeq .

Broq qmang leq men jah tiaq Jesus.....

⁵⁷ Jò qnang lam ti trong , i mangai doe ka haq : Waiq Chaq , Ìh lam pang leq au tiaq pang aih .⁵⁸ Chuaq Jesus tèu haq “ Chôn i cabôc ,chìm i pù ,mahaq Kon mangai ùh i nòe hu angèn gàu .” ⁵⁹ Haq doe ka mangai qnoeq hòem “ Ìh lam tiaq au beq !” Mangai aih tèu bàu : Ìh dôq au hlài catùh hanang deh baq òeq .⁶⁰ Mahaq Chuaq Jesus doe “ Dôq da mangai cachit catùh dèh mangai cachit , ìh lam tiaq au hu anoe trong diac Plinh.” ⁶¹ Mangai qnoeq hòem doe : Bri ka au tiaq ìh , mahaq adroe aih ìh dôq au hlài hangah dèh kan cadraq òeq. ⁶² Chuaq Jesus padreo bàu “ Cabô ti khoe cadop long kai ma oe raq hwi ngan enh rù , mangai ùh tajì ka diac Boc Plinh.” .

Tapèh jàt ngai tiaq hõc lam anoe diac plinh .

10 .. ¹ Atiq ka aih , Chuaq Jesus raih yõc tapèh jàt ngai tiaq hõc maqnoeq hòem , khoe èh haq thê wì lam racop baiq ngai , baiq ngai ,lam adroe ka raðeh ,trùh rìm nòe haq padon lam . ² Haq doe ka mangai tiaq hõc “ Qmau trùh khoe bàc , yàng mangai gat aih toq biaq . Qmang aih , drah bòch cla wì craq qnoh tam bình gat hòem . ³ Drah lam beq , meh au thê pì lam ,i crài cleq ka kon trùu oe qne koq yiang . ⁴ Apa q wê cayôp bac , apa q wê bau , jai , roc trong apa q kùh gàu ka cabô . ⁵ Jò pì mùt hnim cabô , adroe aih pì doe : waiq kan catèm am ka hnim kô! ⁶ Tàng joq hnim aih i mangai tajì ka jah kan catèm , aih èh kan catèm enh pì loh oe ti mangai aih , tàng ùh qmang aih , kan catèm wih hlài ta cla pì . ⁷ Pì oe ta hnim aih, acaq dahwèq wì qnoh ka pì ,majah qmang aih mangai patìh ùh qngwan ka jah kùng baha . Apa q rangòt lam hawàt enh hnim kô trùh hnim tau . ⁸ Jò pì mùt gùng leq , wì gùng aih pachùh adràc , wì padon cleq ,pì acaq ka aih . ⁹ Broq brèh ka mangai yiniq ta aih ,rai doe ka wì : Diac Boc Plinh trùh khoe haten ti pì . ¹⁰ Mahaq jò pì mùt ta plài leq , yàng wì ta aih ùh ðìh pì mùt , pì loh roc trong rai doe : ¹¹ Pì ngan kô ,blo plài pì ma top ta jènh , nhèn ha pùih ðac ðòeq chôn pariaq pì hnoq , mahaq pì ep loq rameh Diac plinh khoe trùh haten ka pì . ¹² Au doe ka pì , trùh hì ma atiq lùch èh , gùng Sôðom pòq kan hadrah yi biaq ka gùng aih .

¹³ Habo ka gè , Côrasin .habo ka gè Bêtsaida , majah qmang aih tàng joq kan halac khoe broq taqne pì qmat aràng broq ta gùng Tiro xam Sidôn , wa aih khoe caxùnh eo briang ,kui blo tanùh , khoe raxach, tawìh hlài khoe dùnh .¹⁴ Aih èh ,trùh hì hadrah , plài Tiro xam Sôðom pòq kan hadrah yi biaq ka pì . ¹⁵ Da gè hòem , Cabènaum , gè jah dèch atõc trùh ta plinh qmòh? Ùh ðòh , gè qmat èh jah qnìh caðac trùh qmòe ta hwinh . ¹⁶ Cabô tamàng pì ,aih tamàng au , cabô caðac pì ,aih caðac au, cabô caðac au aih ca ðac Mangai ma khoe thê au .

¹⁷ Tapèh jàt ngai tiaq hõc wìh hlài rai lem bùi rai doe : Chuaq! Enh dalam yiniq Ìh ,jaq kan kiac dua iu bàu nhèn. ¹⁸ Chuaq Jesus padreo bàu “ Au hnoq Satan clìh tiah ka kan camlet enh plinh .¹⁹ Au khoe am ka pì cwiang itai hu jôi q padit bìh , agôt hloe xam cwiang mangai tagit ka pì. Ùh i mangai leq hlàt broq ka pì raliang. ²⁰ Qmang aih ,ùh dùh lem bùi jò kiac iu bàu pì , mahaq lem bùi jò yiniq pì khoe jah achìh ta diac plinh. ²¹ Jò aih ,Chuaq Jesus diq jaq lem bùi ta Yiang Hadròeh ,haq doe “ Waiq Baq ! Cra q da plinh crõng taneh , au manè apôi Ìh ,majah qmang aih ìh khoe cadoc yiniq kô ka mangai rabiaq , mangai i hõc , mahaq patô qnoh ka kon qyoh . Baq ôi ,joq qnàng qmang aih ,majah qmang aih ìh khoe hnoq biac aih lem. ²² Baq khoe jao ðõng rìm yiniq ka au , enh gùng ka Baq ùh i cabô loq ka Kon , enh gùng ka Kon , xam mangai leq kon enh mahno am ,hadaì ùh i mangai leq loq ka Baq aih cabô. ²³ Khoe aih , Chuaq Jesus hwi ngan mangai tiaq hõc rai doe “ Xôq ramot ka mat jah hnoq trong pì hnoq ! ²⁴ majah qmang aih au anoe ka pì , bàc ngai

pajàu xam bùa tangèh jah hnoq trong pì hnoq , mahaq ùh jah hnoq , tangèh ka jah tàng trong pì tàng mahaq ùh jah tàng .

Mangai samari loq hanò

²⁵ I moeq ngai hnài ranenh , yòng bòch ðòeq hu qnhro ngan Chuaq Jesus ,haq doe rameh : Mangai hnài , au ep broq cleq ðòeq hu jah kan rih halinh mòeq ðòe ? ²⁶ Chuaq Jesus bòch “ Ta hset ranenh achìh cleq? .Ìh ðòc cleq ta aih?” ²⁷ Haq aih têu bàu : Ìh ep ðiq ka manoh , ðiq ka mahua yiang , ðiq ka padren ,ðiq ka gàu ngoc loq iu Chuaq aih Boc Plinh ìh, rai loq waq ka mangai haten hatia ka ìh . ²⁸ Chuaq Jesus doe ka haq “ Ìh têu khoe troq , broq qmang aih beq , ìh hi jah rih .²⁹ Mahaq mangai hnài ranenh aih enh doe raðeh aih mangai taq atòq , haq bòch Chuaq Jesus : Mangai haten hatia ka au aih cabô? ³⁰ Chuaq Jesus padreo bàu “ I moeq ngai enh Jêrusalem loh ta Jêrico , ti trong glàm bài mangai atùng , wì blah yòc ðiq ðồng da haq bac jèn , jêh haq habau habùa ta chac ,khoe cla wì hi lam caðac haq oe ti aih ten cachit ten rih . ³¹ Jò aih , i moeq ngai pajàu loh trong aih , hnoq mangai aih , haq wia pah tau trong èh lam hloe .³² Èh hòm , i moeq ngai Lêwi hadai trùh jang aih , thia haten ,ngan hnoq qmang aih , èh hanoh lam hloe . ³³ Mahaq i moeq ngai samari lam ti trong , thia haten hnoq qmang aih , ta manoh haq ha-och ka mangai aih . ³⁴ Haq yòc dầu , yòc alac qnheo teo habau ,khoe èh ti kàt palauq ,khoe aih , dèch atòc enh crống lùa aràng trùh hnim padài ,hu wèq ngan . ³⁵ Trùh hi atìq , yòc baiq ðoniê am ka craq hnim padài rai tanap : Ìh wèq ngan mangai kô oq , tàng loq yam ùh hnau , jò au wih hlài i au caqnaih . ³⁶ Taqne piq ngai aih ,ìh hèm beq ,mangai leq ma haten hatia ka mangai wì ma atùng aih ?” ³⁷ Mangai hnài ranenh aih padreo bàu : Aih mangai ma khoe i manoh loq waq , khoe loq hanò ka haq .Chuaq Jesus doe “ Drah lam beq ,broq tiaq qmang aih”

Mathê sam Mari

³⁸ Jò Chuaq Jesus xam mangai tiaq hóc lam ti trong , trùh ta plài tau , i moeq ngai gucadri yiniq haq Mathê ðih Chuaq Jesus mùt dèh ta hnim . ³⁹ Haq aih i moeq ngai oh cadri ,yiniq haq Mari , haqngui nòe jènh Chuaq Jesus hu tamàng bàu Chuaq. ⁴⁰ Mathê toq ti hawet jiang patih , trùh anoe ka Chuaq Jesus : Chuaq au ! oh au ðòeq au patih ðeh moeq ngai , ìh doe ka haq wiang patih ti au ðiq . ⁴¹ Chuaq Jesus padreo bàu “Mathê , Mathê ,ìh chiùq lep rai hèm bàc trong ⁴² mahaq i moeq yiniq raq ma nhet .Mari khoe ràih yòc ka ðadeh yiniq aih , ùh i cabô jah blah yòc da haq”.

Jesus hnài waiq khăn ...

11 ..

¹ I moeq hi , Chuaq Jesus qnang waiq khăn tanòe aih , jò khoe hêq ka waiq khăn , moeq ngai tiaq hóc doe ka haq : Chuaq ôi , Ìh hnài nhèn waiq khăn qmang ka Jon khoe hnài dèh mangai tiaq hóc ðiq . ² Chuaq Jesus doe “ Jò waiq khăn pì anoe qmang kô : “Waiq Baq , Yiniq Baq jah hadròeh , ðiac Baq jah trùh , ³ Am ka nhèn dahwèq acaq hi leq qnang lem hi meh , ⁴ Caqnaih da nhèn yiniq lui , majah qmang aih nhèn hadai caqnaih yiniq lui ka mangai ma broq yiniq ka nhèn , ùh dùh aràng nhèn tanòe padô qnùt” .

⁵ Khoe aih , haq doe ka wì mangai tiaq hóc “ Tàng taqne pì i moeq ngai i dèh bua qne mang trùh creò : Ê ðaq , am ðò ka au piq toq bèn. ⁶ majah qmang aih i bua au neo trùh enh hangai , au ùh i ka dahwèq hu qnoh

ka haq acaq . ⁷ Tàng joq mangai oe ta hnim doe : Apa q pangài ka au , qmang khoe clên , wì kon xam cla au diq khoe kùi , ùh jah yòng yỏc bẻnh ka ìh , ⁸ Au doe ka pì , yac ka mangai ùh enh yòng yỏc bẻnh am dẻh ka bua , mahaq pàng mangai aih xan bẻch yỏt , ẻh dua haq yòng am dẻh ka bua haq rìm yiniq bua haq qnang nhet ka waq . ⁹ Au anoe tam ka pì : Bẻch beq , yiniq aih jah am ka pì , chaq beq pì hi hnoq , clỏq beq qmang hi tapẻh am ka pì . ¹⁰ Majah qmang aih mangai leq bẻch , mangai aih jah , mangai leq chaq , mangai aih hnoq , ẻh mangai leq clỏq , qmang hi ta pẻh am ka mangai aih . ¹¹ Diq ka pì ma broq baq qmat , i cabỏ jỏ kon cla bẻch bẻnh yàng aih am hmo ? ùh meh bẻch ka mahaq am bẻh ? ¹² Tàng ùh meh bẻch catap mahaq am agỏt ? ¹³ Qmang aih , pì qmat mangai qmẻq mahaq oe loq am dẻh ka kon yiniq lem , ùh dẻh dẻh ka Baq pì oe ta plẻnh ma ùh am Yiang Hadrẻh ka mangai creo dang haq!”

Jesus sam Ben xẻ bun

¹⁴ Chuaq Jesus hnan qnoh moeq toq kiac lằu , jỏ kiac khoe loh , mangai lằu aih hi jah capoch . Mangai leq mangai meh hamẻh đẻh hra . ¹⁵ Mahaq i qnah ngai doe : Mangai kỏ canỏm ka Bẻ-en xẻbun , craq kiac đẻeq drẻh kiac . ¹⁶ Mangai ma qnoeq hỏm enh qnhro ngan haq , wì bẻch haq am wì hnoq kan halac loh enh plẻnh . ¹⁷ Chuaq Jesus loq ka manoh wì , haq doe “ Diac leq to hit rẻđẻh , diac aih raliang , hnim leq cla to lah dabau , hnim aih ẻh tacro . ¹⁸ Qmang aih tàng joq kiac Satan hit rẻđẻh , diac haq ma oe drẻng , majah qmang aih pì doe au canỏm ka Bẻ-en xẻbun đẻeq drẻh qnoh kan kiac ? ¹⁹ Tàng joq au canỏm ka Ben xẻ bun đẻeq drẻh kiac , aih ẻh kon pì canỏm ka cabỏ đẻeq drẻh kiac ? Aih ìq raq , kon pì ma jah broq mangai hadrah cla pì . ²⁰ Mahaq tàng joq au canỏm ka hadrang tì Boc Plẻnh đẻeq drẻh hnan kan kiac , aih diac Boc plẻnh trẻh khoe haten ka pì . ²¹ Jỏ mangai đẻh padren wẻ ranac wẻq dẻh hnim cla , aih ẻh kẻng hang ta hnim haq jah cajap . ²² Yàng i mangai ma yeo đẻh ka haq , trẻh blẻq haq , blah yỏc ranac haq ma canỏm xam diq kẻng hang haq aih . ²³ Mangai leq ùh oe ti au , mangai aih tablẻq ka au , mangai leq ùh pajủm ti au , mangai aih ẻh haprah hapriang . ²⁴ Jỏ kiac dẻ loh enh chac moeq ngai , haq lam rangỏt tanẻ croh crẻnh ti chaq nẻ padẻi . Chaq ùh jah , haq hi doe : Hẻq au hlẻi đẻ tanẻ au ma neo loh . ²⁵ Haq wẻh hlẻi , hnoq hnim hwit khoe hreo , rìm yiniq ta hnim khoe don palauq qmẻ calem , ²⁶ haq hi lam adrẻ tam tapẻh toq kiac qnoeq yeo dẻ ùh hnau ka haq mủt oe ta hnim aih , aih ẻh , mangai aih yeo hamỏ ùh hnau ka adroe hỏm . ²⁷ Jỏ Chuaq Jesus qnang anoe bằu aih , i moeq ngai gucadri oe taqne mangai bẻc ta aih đẻh bằu doe : Xỏq ramot ka mangai miq khoe ha-uang ìh , ma khoe ta-ủq ìh . ²⁸ Chuaq Jesus padreo bằu “ Mangai leq tàng bằu Boc plẻnh rai iu bằu aih , jah xỏq ramot ùh hnau ka aih hỏm . ”

²⁹ Bẻi mangai tagop dabau ta aih ẻh rai bẻc , Chuaq Jesus doe “Caxi noe kỏ xinoe dẻ , wì haq bẻch ngan teo halac , mahaq ùh am ka wì haq teo halac qnoeq enh gẻng ka teo halac da Jỏna . ³⁰ Majah qmang aih , Jỏna aih raq kan halac ka plẻi Ninive , hadai qmang aih , Kon mangai hadai kan halac am ka xinoe kỏ . ³¹ Trẻh hi tah hadrah , bằu cadri enh pah qma mat mahẻ loh , yẻng hadrah ka xinoe kỏ , majah qmang aih haq oe enh gẻng haqmai lẻch crẻng taneh khoe trẻh hu tamẻng bằu rabiaq da bằu Salomỏn , mahaq , oe tacỏ i moeq Ngai kản ùh hnau ka Salomỏn . ³² Trẻh hi tah hadrah , mangai oe ta Ninive wì haq yẻng pajủm hu hadrah caxi noe kỏ , majah qmang aih wì haq tàng bằu Jỏna , wì haq khoe loq raxach , mahaq , ajang kỏ i moeq Ngai yeo kản ùh hnau ka Jỏna . ³³ ùh i cabỏ bẻh đẻn mahaq đẻeq tanẻ hanẻ , tanẻ caqnẻm , mahaq wì dẻch đẻeq tanẻ haqnẻq , đỏq mangai mủt ta hnim jah hnoq kan qngah . ³⁴ Mat aih đẻn ta chac hamac , tàng joq mat ìh tadẻh , diq ka chac ìh jah qngah , tàng joq mat ìh ùh nẻn , diq ka chac ìh oe ta clam . ³⁵ Qmang aih

,ngan oq , kan qngah ta pì loq loh kan clam .³⁶ Tàng joq diq tachac pì qngah qngai , ùh i nòe leq clam jah qngah diq dǝng , aih hadai tiaha ka jò i ðen sreoa qngah am ka pì diq .”

Bàu hnài am ka mangai Pharisi...

³⁷ Jò Chuaq Jesus anoe bàu aih bu diq , i moeq ngai Pharisi akhen ka Chuaq Jesus hlài acaq dèh ta hnim . Chuaq hangui acaq .³⁸ Mangai Pharisi hnoq Chuaq Jesus ùh qnheo ti adroe ka acaq , haq hamàih ³⁹ Chuaq Jesus doe ka haq “ Diq ka bài pì aih mangai Pharisi , pì haliang dǝt doe hreo toq enh gùng , mahaq enh dalam bình toq kan atùng xam kan dù .⁴⁰ Wùih ! mangai ratùt , Mangai ma khoe broq enh gùng , ma ùh joq haq broq hloe enh dalam qmòh? ⁴¹ Xan pì yǝc dèh hang pì ma i aih, ti am ka mangai pa , aih èh rìm yiniq hi lem hreo am ka pì . ⁴² Mahaq ,hàbo ka pì ,mangai Pharisi , majah qmang aih pì dèch ka Boc Plinh mòeq phàn mòeq jàt cachiq bǝc ha , cachiq xang, xam rìm bài cachiq qnoeq , mahaq trong taq atoq ,trong loq iu Boc plinh aih pì cađac ! Aih bài yiniq pì ma ep broq , mahaq hadai ùh dùh cađac bài yiniq tau . ⁴³ Hàbo ka pì , mangai Pharisi , majah qmang aih pì enh haqngui nòe yeo haqnheq tanòe hnim tagop , enh mangai qnoeq kùh gàu ka rađeh taqne nòe padreo ! ⁴⁴ Hàbo ka pì ,majah qmang aih pì tiaha ka ralùng hanang khoe cađac klui, wì jǝiq enh qnhèq mahaq ùh canau!” . ⁴⁵ I moeq ngai hnài ranenh doe : Mangai hnài ,ìh capoch qmang aih ma ùh joq ìh broq ka nhèn kan xep . ⁴⁶ Chuaq Jesus padreo bàu “ hadai hàbo ka ìh qmang aih diq , mangai rabiaq toq ka hnài ranenh , pì dèch taqmòq ka mangai qnoeq kan trap , kan tawac , cla pì aih ùh tadroq qmòe moeq hadrang ti ! ⁴⁷ Hàbo ka pì , majah qmang aih pì bunn ralùng hanang wì pajàu kan cadraq pì ma khoe jèh đac nèh haq ! ⁴⁸ Qmang aih ajoq pì patô qnoh pì khoe mòeq manoh dèh ka trong kan cadraq pì broq , majah qmang aih wì haq khoe jèh cađac pajàu Boc Plinh , pì aih mangai bunn ralùng .⁴⁹ Aih ìq raq , kan rabiaq Boc plinh i doe : Au the dèh mangai pajàu xam mangai pòq bàu trùh ti wì haq , wì haq jèh cađac mangai kô rùp mangai tau , ⁵⁰ Dôq mahim rìm ngai pajàu khoe ta-ùc enh jò baxèm broq plinh crǝng taneh, jah taboe diq ka nang noe kô , ⁵¹ Patep enh mahim da Abèn trùh mahim Xachari ,mangai wì ma khoe jèh cađac ta adreo prang tadreo xam hnim kùh waiq , joq , au anoe ka pì , mahim wì aih èh , bǝch hlài diq ajang nang noe kô èh. ⁵² Hàbo ka pì ,mangai hnài ranenh ,majah qmang aih pì ta qmiaq yǝc long gahlòng da kan rabiaq ,cla pì aih ùh waq mùt , mangai qnoeq aih enh mùt , aih pì ùh lòh!”

⁵³ Jò Chuaq Jesus khoe loh enh gùng , mangai Pharisi xam mangai hnài ranenh diq jaq àu tablêq ka haq, wì bǝch bacc trong hu dakhwàiq haq, ⁵⁴ chaq trong ðòeq bahlac haq ta bàu tapoch .

12 ..Bàu pariaq mangai tiaq hǝc.....

¹ Jò aih ,mangai ta aih tagop ti dabau hi bình qmòe ka mùan , loh qmòe ka tajǝiq dabau , Chuaq Jesus chǝnh anoe dèh ka mangai tiaq hǝc “ Ngan oq ! wèq rađeh apaq top blo da mangai Pharisi , aih kan ti patiaha toq enh gùng . ² ùh i cleq cadoc èh ma ùh hnoq ,ùh i yiniq cleq hlèp èh wì ma ùh qnì . ³ Qmang aih rìm trong pì anoe tanòe clam cluiq , jah tàng diq tanòeh qngah qngai , rìm yiniq pì ta bahech tabluàng hlèp , aih èh jah paqnoh ta kùa po .⁴ Au anoe ka pì aih mangai bua da au , apaq yùq ka mangai jèh đac toq chac pì khoe aih pì jah broq cleq hòm .⁵ Mahaq au patô am ka pì khòh yùq ka cabô : Khòh yùq crè ka Mangai jò khoe jèh cađac chac hamac ,èh haq i cwàng tèm caqnìh ta hwinh , joq qnàng au doe ka pì : aih Mangai pì ep yùq crè! ⁶ Ma ùh joq padam toq chìm xê wì tech baiq hliac bac raq qmòh ? Mahaq moeq toq ta aih dua Boc plinh ùh hèt. ⁷ Xàc ta gàu pì qmat hadai rènkh khoe diq . apaq yùq dèh! Majah qmang aih pì canaq ùh hnau ka chìm xê.

⁸ Au anoe ka pì : mangai leq doe ðeh canau loq ka au enh ngèa wì phù cròng , aih èh Kon mangai hadai doe ðeh canau loq ka yiniq haq enh ngèa ka bình plình Boc plình. ⁹ Mahaq mangai leq hangah ðeh ùh canau ka au enh ngèa phù cròng, aih èh enh ngèa ka bình plình da Boc plình , au hadai doe ðeh ùh qnì ka yiniq haq aih. ¹⁰ Mangai leq tapoch tablêq ka Kon mangai , yiniq lui aih oe jah caqnaih ,mahaq mangai leq tapoch ùh hòq ka Yiang Hadròeh , yiniq lui haq aih èh pì oe jah caqnaih .¹¹ Jò wì aràng pì trùh enh ngèa hnim tagop , qnoh pì enh ngèa cwan hadrah ,cwan wèq cwìang , aih pì apaq hèm ðeh anoe qmang leq, anoe cleq hu cwaih doeh raðeh , ¹² majah qmang aih ,wop jò aih raq Yiang Hadròeh hnài pì bàu ma troq ka tapoch .

Mangai pagrông mahaq blùng.....

¹³ Jò aih, taqne mangai bàc i moeq ngai dèch bàu doe : Mangai hnài , ih anoe bìaq ka daq au dōq haq axong kùng hang ka au diq .¹⁴ Mahaq Chuaq Jesus padreo bàu “ Wùih mangai meh , cabô dèch au broq mangai hadrah yiniq , broq mangai axong da pì kùng hang ?” ¹⁵ Khoe aih, haq doe ka wì ta aih “ Rabiaq haq oq ! apaq daiq cadèh , mangai kô rìh ùh xài canòm ajang nòe bàc kùng hang” .¹⁶ Haq aliah ka wì bàu kô “ I moeq ngai pagrông , ruàng haq jah qmau pì cajaq , ¹⁷ haq aih hèm dèh ta manoh : Au broq qmang leq kô èh ? Pì i qmòe ka nòe anòh hu don ðòeq qmau , ¹⁸ Haq doe dèh raq : Au broq qmang kô èh , raliang dōng hapom ma dùnh , broq ònh ma qnoeq yì kàn , tah ðòeq qmau xam bài dahwèq ta aih , ¹⁹ khoe aih anoe dèh ka mahua yiang cla : Gè i qmau khoe bàc, hu acaq bàc hanam , hêq, padài beq , acaq, ôq , rai bùi hyòq diq . ²⁰ Mahaq Boc plình doe ka haq “Wùih mangai blùng , mahua yiang gè au yōc hlài mang kô raq . Aih èh kùng hang gè khoe padon ka daðeh qmat èh jah cabô?” ²¹ Mangai leq toq ti gop ðòeq ka raðeh mahaq ùh pagrông kan nòe Boc plình ,qmang aih èh diq .”

Trong loq lèt

²² Chuaq Jesus doe dèh ka mangai tiaq hōc “ Qmang aih ,au doe ka pì ,apaq crè ka kan rih pì kô èh acaq cleq , hadai ùh dùh yùq ka chac pì kô èh caxùnh cleq . ²³ Kan rih yeo kàn ka dahwèq acaq , chac hamac yeo kàn ka dahwèq caxùnh atàc . ²⁴ Haqmiang ngan ac : haq ùh i rai adrech ,ùh i gat , hadai ùh i ka bùaq , ùh i ka hapom , mahaq dua Boc plình wèq ban haq , pì aih ajoq yeo canaq ùh hnau ka ac ? ²⁵ I ka cabô oe taqne pì qmat canòm kan loq lèt majah broq ka raðeh halinh tam toq bìaq ùh? ²⁶ Tàng biac qyoh dāng aih pì broq ùh jah , meh pì oe lèt dèh trong qnoeq ? ²⁷ Ngan riang tacreo hon qmang leq? Haq ùh i abroq xalep, hadai ùh i caxênh brai , mahaq au doe ka pì : Qnhac ka bùa Salomôn ranhòm dāng leq , dua ùh jah caxùnh eo lem tiah ka bài riang aih . ²⁸ Wùih ! bài mangai bìaq kan lùì , tàng joq bài nhat oe ta gùng aih hì kô oe rìh , hì da èh bùh ta ralùng , mahaq Boc plình oe am haq caxùnh lem qmang aih , ùh dùh dèh ka pì ! ²⁹ Qmang aih, manoh cliac pì paq hèm acaq cleq , ôq cleq , ùh dùh lèt dèh trong aih .³⁰ Majah qmang aih , wì mangai enh gùng oe ta crōng taneh kô jò leq ma ùh cadàu tiaq bài yiniq aih , èh Baq pì oe ta plình khoe loq pì nan ðeh ka bài yiniq aih ³¹ Mahaq chaq diac Haq òeq , bài yiniq aih troq jò èh brì ka haq am tam ka pì .³² Yôiq wì kon qyoh, apaq yùq cadèh ,majah qmang aih Baq pì khoe lem manoh hu am ka pì Diac plình . ³³ Tech kùng hang pì beq hu am ka mangai ma hamoq ,palauq ðòeq ka raðeh balet tah bac ma ùh hìaq loq hyah xam kùng hang canaq ùh hìaq loq racòch oe ta plình , aih nòe ùh i ka mangai atùng jah thia haten ,ùh i ka hadrùng , ùh i catia kap bahech .³⁴ Majah qmang aih kùng hang pì oe taleq, manoh cliac pì hadai oe ta aih .

Bàu pariaq thê loq hamang

³⁵ Caxi caqnam pì ep kàt , ðen bùh ðôq haq qngah yôt ,³⁶ Qmang ka magai hapõng gòm ðèh wì craq hnim hlài enh acaq yiniang , waq toq wì craq hi clôq qmang , haq khoe drah pèh qmòe carênh. ³⁷ Xôq ramot ka mangai hapõng aih ,jò wì craq hlài hnoq wì haq hmàng riu gòm ! Joq qnàng au doe ka pì , craq aih kàt ðèh caxi caqnam , am mangai hapõng hangui ti cabõng , khoe haq hi patih hlài ka wì . ³⁸ Joq xôq ramot am ka mangai hapõng jò wì craq hlài hnoq wì haq riu gòm qmang aih , yac ka jò qne mang , yac ka jò ia rông . ³⁹ Loq maro qmang kô ! tàng joq cla wì craq hnim khoe loq jò leq i mangai atùng trùh , aih èh haq hamang ðòeq hu rap , ùh ðôq mangai atùng chia da haq panàt hnim. ⁴⁰ Pì hadai qmang aih ðiq ,hmàng gòm rap qmòe oq , majah qmang aih Kon mangai trùh wop qmòe jò pì ùh ùac ngèh .⁴¹ Phiero bòch : Chuaq au , bàu aliah kô ìh anoe ka nhèn , loq ìh anoe xam mangai qnoeq ? ⁴² Chuaq Jesus doe “ Cabô ma i manoh ùh hìaq gôpla rai rabiaq ka taqmroq , craq hnim ðèch haq broq mangai wèq ðiq ka hapõng ta hnim , ðòeq trùh jò hu ti axong ka wì aih dahwèq acaq ? ⁴³ Xôq ramot ka mangai hapõng aih jò wì craq wìh hlài , hnoq haq broq qmang aih ! ⁴⁴ Joq qnàng au anoe ka pì , aih èh craq hnim am haq wèq ðiq kùng hang ta hnim .⁴⁵ Mahaq tàng joq mangai hapõng aih hèm ðèh ta manoh : Craq au oe dùnh men trùh , èh haq ti jêh bài mangai hapõng calô ,hapõng cadri , rai acaq ôq bù bia , ⁴⁶ aih èh craq haq trùh wop hì haq ùh tangèh , wop qmòe jò haq ta ùac , yôc long roe blai haq hyah hyoch ka akia , khoe aih caðac haq oe moeq qmang ti bài mangai manoh gôpla . ⁴⁷ Mangai hapõng kô khoe loq ka manoh cla wì craq , mahaq ùh padon ùh broq tiaq manoh aih , haq jah jìq yeo bàc .⁴⁸ Yàng mangai hapõng ma ùh qnì ka manoh cla wì craq , haq broq ùh troq ka manoh wì craq , aih èh jah jìq yeo bìa . Majah qmang aih mangai leq khoe jah am yeo bàc , aih èh wì craq bòch hlài yeo bàc , mangai leq khoe jah jao yeo bàc èh wì craq bòch hlài yeo bàc hòm.

Bàu hnài qnoeq hòm.....

⁴⁹ Au khoe trùh hu caqnih ùnh ta crõng taneh , tàng joq haq khoe jah cheo cadèh , aih au oe tangèh cleq loe ka aih hòm ! ⁵⁰ I moeq baptem au ep pòq , au mangò xalep oe i jaq cleq men trùh hì baptem aih jah gèh ! ⁵¹ Pì xoh au trùh au trùh hu aràng kan catèm ka crõng tanenh qmòh? Au anoe ka pì : ùh ! mahaq aràng kan talah .⁵² Majah qmang aih ,pang kô ta èh , tàng padam ngai oe pajùm moeq hnim , bài aih èh talah ka dabau , piq ngai tablêq ka baiq ngai , baiq ngai tablêq ka piq ngai , ⁵³ baq tablêq ðèh ka kon calô , kon calô tablêq ðèh ka baq , miq tablêq ðèh ka kon cadri , kon cadri tablêq ðèh ka miq , yaq tablêq ðèh ka kon mai ,kon mai tablêq ðèh ka yaq.” ⁵⁴ Haq doe ka bài mangai bàc ta aih “ Jò pì hnoq yùc yòng enh apah mat mahì clih , pì doe : Hì kô èh loq i mè , èh joq qnàng qmang aih . ⁵⁵ Èh i cayeo hlui enh pah qma mat mahì loh pì doe : Hì kô èh tôq , èh joq i qmang aih, ⁵⁶ Wùih ! bài mangai patiah toq enh gùng tau ! Pì loq hadro ngan ta trõc ,hadro ngan ta taneh , òq hagleq pì ùh qnì hadro ngan qnhòng kô? ⁵⁷ Hagleq cla pì ùh ti ngan deh trong leq ma taq atoq ?

⁵⁸ Qmang aih , jò pì lam ti bài mangai ma qnoh pì tanòe hadrah , roc trong drah àu hatroq ka wì , yùq èh wì dùì pì trùh enh ngèa cwan hadrah , cwan aih qmùt pì tanòe cwan wèq hnim cadrong , cwan aih clêh pì , ⁵⁹ Au doe ka pì : Pì caqnaih yac ka oe pòq moeq hliac raq dua pì qnhòq jah loh enh aih” .

13 ...

Bài mangai Galili wì ma jêh ðac

¹ Hadai jò aih raq ,i bài mangai anoe hlài ka Chuaq Jesus loq Philat khoe jêh đac toq leq ngai Galili ,yôc mahim clai ta ngè tadreo .² Chuaq Jesus doe ka wì haq “ Pì xoh đeh bài mangai Galili aih broq yiniq lui cleq yeo qmêq ùh hnau ka mangai Galili qnoeq qmòh , dài wì majah glàm kan habo qmang aih ? ³ Au doe ka pì loq : Ùh xài , mahaq tàng pì ùh qnì raxach , èh diq ka pì hanoh lùng pac qmang aih diq . ⁴ Tàng ùh qmang aih , moeq jàt rahem ngai cachit ka hnim haqnêq Siloê tùc , aih pì hèm wì haq broq yiniq lui yeo qmêq ka mangai oe ta Jêrusalem qmòh ? ⁵ Au doe ka pì : Ùh ! Mahaq tàng pì ùh raxach , diq ka pì hadai cachit lùch qmang aih èh .

⁶ Khoe aih haq hi aliah bàu kô : “ I moeq ngai pìt dèh ta wuàn pìl nho moeq xem long póc , haq loh chaq git pìl ta aih mahaq chaq ùh lòm hnoq, ⁷ Haq doe ka bài wì mangai pìt nho :Khoe piq hanam au loh git pìl nòe xem long póc kô mahaq ùh lah i qmòe pìl , kau cađac long qmat , gleq majah ðòeq haq tawac ngwan toq ka taneh ? ⁸ Mangai pìt nho padreo bàu : Wì craq, ìh ðòeq tam moeq hanam kô hòm , ðôq au bôc dudan taxèm haq khoe aih tah phàn .⁹ Broq braiq atiq èh haq loh pìl , ùh qmang aih èh ìh hi koh cađac .

Haqnauq brêh ka mangai yiniq ta hì Sabat

¹⁰ I moeq hì sabat , Chuaq Jesus mùt hnài tanòe hnim tagop qyoh . ¹¹ Ta aih i moeq ngai gucadrì , loh ka pen khoe moeq jàt rahim hanam , majah qmang aih kiác rùp baxa haq . Haq kôc crông ùh jah yòng ka qnhoh . ¹² Bu hnoq haq , Chuaq Jesus khoe creò doe : “Yôiq ! mangai gucadrì tau ,ìh khoe jah brêh ka yiniq” , ¹³ Chuaq Jesus hi yôc tì bèq chac haq . Tajòe hloe , haq aih jah yòng cajang , rai dèch bàu manè apôi Boc plình .¹⁴ Jò aih ,mangai wèq hnim tagop qyoh hnoq Chuaq Jesus broq brêh ka mangai yiniq ta hì sabat ,haq aih tapoch hloe ka mangai bàc ta aih : I tadràu hì hu abroq , pì trùh ta bài hì aih ðòeq hu jah broq brêh ka yiniq ùh hróc , ùh dùh trùh dèh hì sabat . ¹⁵ Mahaq Chuaq Jesus têu haq “ Wùih! Mangai patiah toq enh gùng tau , hì sabat pì ma ùh caqnaih bô , caqnaih lùa loh enh cadrong hu tiaq aràng haq lam ôq diac qmòh? ¹⁶ Kon cadri da Apraham kô , satan khoe rùp kàt haq moeq jàt rahim hanam, ta hì sabat ma ùh khòh lêh caqnaih haq qmòh? ” ¹⁷ Haq tapoch qmang aih bài mangai ma tagit ka haq loh ðong ka camaih ,yàng da mangai bàc ta aih lem bùi ka trong halac haq khoe broq.

Adrech habài xam blo cadroh.....

¹⁸ Chuaq Jesus doe “ Diac Boc plình qmang leq , au yôc cleq hu aliah ?¹⁹ Diac aih tiàh ka moeq pliang clong habài ,i moeq ngai aih haq rai deh ta wia , jah hon hi wìa long kàn , chìm trùh broq pù ta hamenh haq.” ²⁰ Haq anoe hòm “ Au aliah diac Boc plình ti cleq kô hòm ?²¹ Diac aih tiàh ka blo , i moeqngai gucad rì yôc jràu ta piq cađap dác, trùh dèh jò dác hi rêu ðong .

Qmang haqnop.....

²² Khoe aih Chuaq Jesus tồc ta Jêrusalem ,haq lam pagat enh bài plài qyoh trùh plài kàn , rai lam haq hnài wì.²³ I mangai bôch haq : Waiq Chuaq ! Ajoq toq biao ngai raq ma jah dèch qmòh? ²⁴ Haq doe ka wì “ Ep ran diq ka paden ðòeq àu mùt ta qmang chit , majah qmang aih au doe ka pì , bàc ngai àu chaq trong hu mùt mahaq ùh jah .” ²⁵ Jò cla wì craq ta hnim yòng clenq qmang , pì yòng enh gùng clôq qmang rai creò : waiq Chuaq ! pèh ka nhèn qmang diq. Mahaq cla wì craq doe : Au ùh qnì ka pì trùh enh leq .²⁶ Jò aih èh pì doe : Nhèn khoe acaq, khoe ôq pajùm ti ìh , ti trong ti chòq ìh khoe hnài nhèn . ²⁷ Mahaq wì craq doe hòm : Au

doe ka pì ,au ùh qnì ka pì trùh enh leq ,dìq dǒng bài mangai broq dù tau , drah wia dǒng ma khoe ka au beq!
²⁸ Jò aih èh ,pì hnoq Apraham , Ysac xam Jacôp hloe xam dìq dǒng bài mangai pajàu tanòe diac Boc plinh ,
mahaq pì èh jah khwênh qnoh cađac enh gùng , tanòe aih toq crò hmoe xam cadrit hanenh . ²⁹ Yàng èh , enh
gùng mahì loh ,enh gùng mahì mùt , enh gùng pah qma ,enh gùng pah qngeo , wì trùh hangui ta aniang hu
acaq yiniang ta diac Boc Plinh. ³⁰ Aih èh ,i mangai atiq jah loh angoe , mangai adroe jah loh ka atiq.”

Herôt enh jêh đac Jesus....

³¹ Hadai jò aih ,i mangai Pharisi lam doe ka Chuaq Jesus : Ìh pì dùh oe tacô chaq lam taqnoeq beq, Herôt
enh jêh đac Ìh , ³² Chuaq Jesus padreo bàu “ Lam anoe ka chôn aih : Hì kô ,hì da èh ,au oe drùh hnan kan
kiac rai broq brêh kan hiniq tôq , trùh hì mòe , aih èh qnhòng rih da au hì òq . ³³ Mahaq hì kô ,hì da èh ,
xam hì mòe au ep lam , majah qmang aih wia ka mangai pajàu ma cachit enh gùng ka Jêrusalem .

³⁴ Wùih ! Jêrusalem, Jêrusalem, gè jêh cađac bài mangai pajàu, yǒc hmo hìbùq bài mangai wê bàu trùh ti gè
, bàc yàng au enh hacom haqmon pì qmang ka ia kan creò àm dèh kon ta panan , mahaq pì ùh waq! ³⁵ Kô èh
, hnim pì wia hnim catù . Au doe qmòe ka pì ,kô èh pì pì hnoq au hòm trùh hì ma hì doe : Xôq ramot am ka
Mangai trùh enh dalam ka Yiniq Chuaq.”

Jesus acaq ta hnim mangai Pharisi..../

14

¹ I moeq hì sabat , Chuaq Jesus mùt acaq ta hnim mangai gucraq Pharisi , bài mangai ta aih ti achop ngan
haq , ² I moeq ngai liu ten padah oe enh ngèa haq . ³ Chuaq Jesus bòch mangai Pharisi xam mangai hnài
ranenh “Tiaq qmang ka ranenh ta hì sabat akhòh broq brêh ka mangai yiniq, loq ùh khòh ?” ⁴ Mahaq wì oe
hatinh ùh padreo bàu . Chuaq Jesus dèch mangai yiniq yòng ,broq brêh ka haq ,khoe aih thê haq hlài . ⁵
Khoe aih haq bòch wì “ taqne pì qmat i ka mangai leq wop hì sabat, i dèh moeq ngai kon lô qyoh , tàng ùh
meh i dèh moeq toq ò cìh ta ralùng , pì ma ùh drah loh dèch qmòh?” ⁶ Trong aih wì têu ùh jah .

⁷ Jò haq hnoq bài mangai ma jah akhen trùh acaq ta aih , wì toq raih ka rađeh nòe haqngui ma haqnèq
ranhòm ,haq hì aliah ka wì ⁸ “ Jò wì akhen ka ìh trùh acaq yiniang ǒng mai , apaq raih hanqgui nòe rahù,
tabeq i tamoe ma yeo kàn ka ìh ⁹ Mangai akhen lam doe ka ìh : Dôq haq meh hangui ajang kô , aih ajoq ìh
xep ka rađeh ep loh hangui enh qneq qmòh. ¹⁰ Mahaq jò ìh jah akhen, ìh hangui đeh enh nòe haqneq raq ,
aih èh cla wì craq trùh , haq doe ka ìh : Ê daq! tǒc hangui enh qnhèq kô .Aih ajoq broq bàc ngai hadai jah
akhen jah ta-iu ka ìh . ¹¹ Qmang aih cabô padèch rađeh , haq aih èh jah qnoh haqneq , mangai leq paqnoh
rađeh haqneq, haq aih èh jah dèch atǒc” .

¹² khoe aih Chuaq Jesus anoe ka mangai ma akhen ka haq “ Jò ìh i yiniq akhen wì acaq ôq qne hì qnì, di xèq
qnì ,apaq akhen toq deh ka bua , deh ka oh daq calô ,oh daq cadri , xam wì plài pla ma kan padrǒng , yùq èh
wì loq akhen hlài ka ìh òeq hu caqnaih dèh . ¹³ Mahaq jò ìh i yiniq acaq ôq ,akhen ka mangai pa ,mangai
angwenh , mangai liap ,mangai lua mat , ¹⁴ aih èh majah xôq ramot . Hiloq wì haq ùh hlàt akhen hlài ka ìh ,
mahaq trùh jò mangai taq atôq jah rih hlài , aih èh hì jah padreo hlài ka ìh.

Aliah trong acaq yineang kàn

¹⁵ I moeq ngai hangui acaq moeq qmang ti haq, tàng bàu aih hi têu: Xôq ramot am ka mangai ma jah acaq bênh tanòe diac Plinh! ¹⁶ Mahaq Chuaq Jesus padreo bàu rameh “ I mangai aih haq padon yineang kàn ,akhen ka bằc ngai lam acaq ¹⁷ Trùh jò acaq, thê dềh hapống lam anoe ka bằi mangai ma khoe jah akhen : Trùh beq , rìm yiniq ãi q khoe jah padon .¹⁸ Mahaq ãi q ãong ka wì pajùm moeq bàu hangah . Mangai baxèm doe : Au i rot moeq haqnech ruàng , ep lam ngan , apaq ãa yo oq. ¹⁹ Mangai qnoeq doe : Au i rot moeq jàt toq bo , au ep lam ngan qmang leq cadềh , apaq ãa yo oq .²⁰ Mangai maqnoeq hò m doe : Au neo yốc mai ,au lam ùh jah. ²¹ Mangai hapống wìh hlài anoe dềh ka wì craq. Khoe aih craq hnim aih plồh nồeh , thê dềh hapống “ Drah loh roc trong ,roc hanom taplài ,aràng bằi mangai pa , mangai angwenh , mangai lua xam mangai cwê mùt tacô .²² Khoe aih ,hapống anoe : Wì craq bàu ìh thê nhèn khoe broq , mahaq nồe rah oe raq bằc .²³ Mangai craq hnim doe ãeh ka hapống “ Loh lam roc plài roc gùng , hnoq mangai leq, pa-àu wì mùt , aih ãôq haq bình ka hnim au .²⁴ Majah qmang aih au doe ka pì : ãi q ãong ka mangai ma khoe jah akhen adroe , aih ùh i mangai leq ma oe jah acaq yiniang ta hnim au” .

Đòeq tajì ka jah tiaqJeus....

²⁵ I bằi mangai bằc haraya lam ti tiaq , haq hwi ngan wì aih rai doe .²⁶ “ Tàng joq i mangai leq trùh ti au mahaq ùh git ãeh ka miq baq , cadrì , kon , oh ãaq cadrì ,calô ,git hloe kan rìh ãeh cla , haq aih ùh jah broq mangai tiaq hỏc au . ²⁷ Mangai leq ùh xùì ãeh long pagat tiaq au mangai aih hadai ùh wìa broq mangai tiaq hỏc au .

²⁸ I mangai leq oe taqne pì enh broq moeq toq hnim haqnheq kàn. Ma ùh joq baxèm aih haq hangui òeq hu ngan ãi q toq leq , ãòeq ngan rađềh àtau bac ãòeq pagềh hnim aih ùh? ²⁹ Majah qmang aih jò haq khoe broq xèm èh ùh lênh gềh ka chac hnim , aih rìm ngai hnoq ajoq wì loq ão .³⁰ wì doe : Mangai kô khoe broq , mahaq ùh lênh gềh” .

³¹ I ka bùa leq lam tajềh ka bùa qnoe, ma ùh ãùh hangui hatình ngan òeq , ãòeq ngan rađềh qnung moeq muàn lình , ahlàt tablêq ka bùa tau ma wê baiq muàn lình loq ùh? ³² Tàng joq haq hnoq ãềh ùh blêq , jò bùa tau oe raq hangai haq khoe thê ãeh mangai hadrah chồnh lam ãòeq ti alia aclai chaq trong hatroq . ³³ Hadai qmang aih , tàng joq pì ùh cađac ãềh rìm yiniq pì ma i , pì ùh jah broq mangai tiaq hỏc Au.

³⁴ Boh aih lem ,mahaq tàng haq hnhung ãềh kan xang, aih yốc cleq broq ãôq haq xang hlài hò m? ³⁵ Yac ka qnoh ta ruàng ãua pì wìa, broq phàn ãua piloh cleq . wì ep ùc qnoh cađac enh gùng .Cabô i don tamàng ,drah tamàng beq !”

Bàu alìah trùh: kon trùu hnhung , bac hnhung ,

15 ..ãi q ãong ka bằi mangai yốc thềq xam bằi mangai i yiniq lui thia haten ka Chuaq Jesus hu tamàng bàu haq hnài .² Mahaq mangai Pharisì xam bằi mangai hnài ranenh , bahech ka dabau : Mangai kô ãìh toq bằi mangai i yiniq lui rai acaq moeq qmang ka wì ³ Haq hi alìah ka wì: ⁴ “ Taqne pì qmat, mangai leq ma i moeq hrình toq trùu mahaq hnhung moeq toq raq, haq ma ùh ãòeq ãềh hachìn hachìn toq oe tanòe hawit , ãòeq hu chaq trùu ma hnhung aih waq qmòe ka hnoq qmòh?⁵ Èh jò khoe hnoq, haq bùi pì cajaq ,bình ãềh trùu aih taplềh .⁶ hlài ta hnim . Khoe aih ,haq creò ãeh ka bằi bua xam wì plài ,haq doe : Beq lem bùi ti au, majah

qmang aih kon trùu au ma hnhung, au chaq hoe hnoq deh. ⁷ Au doe ka pì :Hadai qmang aih diq ,ta plình lem bùi jò moeq ngai i yiniq lui loq raxach ,ùh hnau ka hachìn jàt hachìn ngai taq atoq ùh ep raxach.”

⁸ Patìah haq, i moeq ngai gucadrì i moeq jàt hliac bac, hnhung moeq hliac bac raq, haq ma ùh bùh đen , hwit hnim rai chaq qmòe ka da adia waq qmòe ka hnoq qmòh? ⁹ Èh trùh jò haq chaq khoe hnoq , haq creò deh ka bua xam wì plài haten ,haq doe : Lem bùi ti au beq , majah qmang aih bac au ma hnhung au chaq khoe hnoq .¹⁰ Au doe ka pì : Enh ngèa bình plình Boc Plình hadai qmang aih , wì lem bùi ka mangai i yiniq lui loq raxach .”

kon calô loq racaih.....

¹¹ Haq anoe hòm “ I moeq ngai tau haq i baiq ngai kon calô .¹² Mangai kon ma qyoh doe deh ka baq : Baq , hang leq ma axong ka au ,am da au .Mangai baq hi axong deh kùng hang am ka wa kon. ¹³ Atiq ka aih bìa hì ,mangai oh yôc dõng deh kùng hang ,lam ka hangai , ta aih ,haq rih loh ka pi wìa cleq ,acaq racaih hreo dõng deh kùng hang . ¹⁴ Jò haq racaih khoe òi dõng kùng hang , gùng aih i kan pangot kàn ,haq loh ka nan pa .¹⁵ haq hi lam patih ka wì gùng aih, wì thê haq lam ban chùa tagùng .¹⁶ Haq enh yôc ðeh caqnah tòh ðòeq chem chùa hu acaq ðeh ka panàc ,mahaq dua wì ùh am .

¹⁷ jò aih haq men cadrat don , haq doe : Ta hnim baq au , oe i jaq cleq mangai patih jah acaq ùh òi ùh dài ,tacô aih au cachit ka hrah .¹⁸ Au kô èh yòng hu wih hlài ðeh ta baq rai anoe ka haq: Baq!Au khoe broq yiniq lui ka plình xam ka ìh . ¹⁹ Au pi oe wìa creò kon ìh hòm , ìh ngan au tiaha ka wì ma patih ka ìh diq. ²⁰ Haq hi padinh yòng hlài ðeh ta baq . Jò oe raq enh hangai , hnoq deh kon baq haq tadêch qmòe nòeh ,tùh loh yôc ti kwat ðeh kon raih hip haq. ²¹ Haq doe deh ka baq : Baq !au khoe i yiniq lui ka tróc ka ìh ,pi oe wìa ka creò kon ìh hòm . ²² Mahaq baq haq doe ka bài mangai hapõng : Rênh haq! Draha aràng eo ma òi jaq lem caxùnh am ka haq, asràng nhàn ajang hadrang ti haq, tõi ka haq jep. ²³ Draha rùp kon òo ma bit lem hu broq jam . Beq! bèn acaq lem bùi , ²⁴ majah qmang aih kon au kô khoe cachit mahaq manòeq khoe rih hlài , khoe hnhung mahaq manòeq kô khoe hnoq hlài. Khoe aih ,òiq ka wì hi lem bùi” .

²⁵ Jò aih ,mangai daq ramua qnang oe ta gùng . Jò haq hlài ten trùh hnim , tàng atêh broc tàng bàu calêu . ²⁶ haq hi creò ka moeq ngai hapõng hu bòch ngan i yiniq cleq . ²⁷ Hapõng aih padreò bàu : Oh ìh khoe hlài ,aih òi baq ìh majah khoe bùh kon òo bit , majah qmang aih ,hnoq oh ìh hlài jah tadêh .²⁸ Mangai kon ramua plôh nòeh , pi waq mùt ta hnim . Baq haq hi loh padô haq mùt . ²⁹ Mahaq haq doe : Ngan kô ,au patih ka ìh khoe toq leq hanam ,qn hòq lah i yàng leq broq ùh troq ka manoh ìh , aleq ìh malah am ka au moeq toq kon bubi qyoh au hu acaq lem bùi deh ti bua. ³⁰ Yàng manòeq kô ,kon ìh mangai ma khoe racaih dõng kùng hang ìh ti bài gucadrì hadoh , manòeq haq wih hlài aih ìh bùh qmòe kon òo bit . ³¹ Baq haq doe : Akon! Kon oe yôt ti baq , òi dõng kùng hang baq aih xài kùng hang kon . ³² Mahaq bèn joq khòh acaq yiniang lem bùi ,majah qmang aih oh kon khoe cachit mahaq manòeq khoe rih hlài , khoe hnhung mahaq khoe hnoq hlài /.

16 .. *Mangai wèq kùng hang.....*

1 Chuaq Jêsu anoe hòm ka bài mangai tiaq hõc “ Mangai padrõng tau i moeq ngai hapõng wèq da haq kùng hang , i wì lam anoe ka haq :Wì craq ! haq aih racaih dõng hang wì craq. ² Aih wì craq hi creò ka mangai aih mùt rai bòch : Ìh broq cleq ! hagleq au majah tàng wì anoe qmang aih òi? Ìh wèq kùng hang qmang leq

,anoe beq !majah qmang aih,pang kô èh ìh pì oe jah wèq kùng hang au hòim. ³ Mangai wèq kùng hang aih hèm :Wì craq pì am au broq hòim ,broq qmang leq kô èh ? abèq ruàng au ùh i ka padren ,lam chaq acaq aih camaih hrìn . ⁴ Au khoe loq broq qmang leq ,đòeq jò wì craq pì am broq ,oe i mangai ãh ahlài au ta hnìim . ⁵ Haq hi creò ka tang ngai pòq dòeh wì craq trùh ,haq bòch mangai adroe : Ìh pòq dòeh craq au toq leq ? ⁶ mangai aih doe : Moeq hrinh thùng dàu . Mangai wèq kùng hang thê : Drah yòc jàiq hangui aqmat achìh beq : Padam jàt . ⁷ Èh haq bòch mangai tau : Ha ìh qmat pòq dòeh craq au toq leq ? Haq padreò bàu doe : Moeq hrinh ateo qmau .Mangai wèq kùng hang doe : Drah achìh jàiq dòeh : Rahem jàt . ⁸ Craq haq hi manè mangai wèq kùng hang loq gòpla trong haq rabiaq ka broq qmang aih . Majah qmang aih kon da qnhòng kô yeò rabiaq ùh hnau ka kon da kan qngah trong taqmùt ti dabau. ⁹ Au anoe ka pì : Yòc ma ãiq ka hang gòpla aih hu taqmùt chaq bua beq , ãòq jò hang aih khoe ãiq ,wì hu ãh qmùt pì tanòe oe hloe . ¹⁰ Mangai leq ùh tablòq manoh trong yiniq qyoh ,haq aih hadai ùh tablòq manoh trong yiniq kàn ,mangai leq gòpla trong yiniq qyoh ,hadai gòpla trong yiniq kàn . ¹¹ Qmang aih tàng kùng qnhòng kô, pì khoe ùh ãiq ka manoh, aih èh cabò ma tùt am ka pì wèq kùng hang joq qnàng ta ãiac plình ?¹² Tàng joq khoe pì wìa ka lùì pì trong kùng hang mangai qnoeq, aih cabò oe ãòq pì jah wèq ãeh kùng hang ãa ? ¹³ Ùh i ka hapõng leq jah patìh ka baiq toq craq ,majah qmang aih haq loq waq ka mangai kô mahaq git ka mangai tau ,ãiq manoh ka mangai kô mahaq hnoq mangai tau ùh loh ãeq. Pì ùh jah broq hapõng Boc hlinh rai broq hapõng Mamòn hòim.”

¹⁴ Mangai Pharisi aih bàì ma plai ka bac jèn , tàng ãiq bàu aih , wì haq halê Jesus . ¹⁵ Haq tapoch ka wì “ pì broq ãeh taq atòq ãòq mangai qnoe ùh qnì, mahaq Boc plình loq ka manoh pì , majah qmang aih trong leq kon mangai pì hnoq ãeh lem , aih kan amùa ramòt enh ngèa ka Boc plình .¹⁶ Ranenh xam bàu pajàu trùh pang qnhòng da Jon raq hi ãiq , pang aih Bàu lem ãiac da Boc Plình jah anoe qnoh , mangai leq mangai meh ep àu ãiq ka padren hujah mùt ta aih . ¹⁷ Plình crõng taneh kô hnhung yì hlàu ùh hnau ka ãađac moeq chù ,moeq teo yì qyoh ta hset ranenh .¹⁸ Cabò ãađac ãeh mai lam yòc ãadrì qnoeq , mangai aih pòq yiniq lui tango , mangai leq yòc gucadrì õng haq ãađac ,hadai pòq yiniq lui tango.

Mangai padrõng sam Laxaro

¹⁹ I moq ngai padrõng kan , caxùnh toq eo gòh ãrinh broq xi bai lem , rìm hì rìh acaq oe ta kan rahù. ²⁰ I moeq ngai pa yiniq haq Laxaro , kùì ajang qmang ngo mangai padrõng aih , tachac haq xìa ãõng kan talêh bachùng ²¹ Haq toq ngèh ãeh jah toch acaq ãiac bàì cràc taclìh enh cabõng mangai padrõng , hadai i koq liah da haq rahenh . ²² Trùh jò mangai pa cachìt , bìnìh plình aràng haq qmùt oe ta achong Apraham . Mangai padrõng hadai cachìt , wì lam catùh . ²³ Mangai padrõng oe tanòe mangai kachìt , qnang chiuq salep , enh hangai haq qngoc ngan ,hnoq Laxaro oe ta achong Apraham, ²⁴ haq drah creò ãađeh : Apraham kan cadraq au! Ha-och ka au ãiq, thê Laxaro lùac hadrang tì tadiac ãòeq broq ka rapet au jah hangèp ãeh toq bìa, majah qmang aih au tòq lep pì cajaq ta ùnh kô . ²⁵ Mahaq Apraham doe : A kon ! Hmàng hlài beq ,jò oe rìh kon khoe jah waq ãeh kan lem , yàng Laxaro aih glàm toq trong qmèq, Yàng manòeq oe tacò haq jah alòng, da kon jah oe tanòe baxa . ²⁶ Qnah hòim , ta adreo bèn i moeq toq kòe jrùq , yac ka i cabò oe pah kô enh tọc pah qmat ãua ùh jah , cabò enh pah qmat enh tọc pah kô hadai ùh jah . ²⁷ Mangai padrõng aih anoe: Kan cadraq au ! Ìh thê Laxaro lam ta hnìim baq au, ²⁸ majah qmang aih au i padam ngai oh ãaq , ãòeq haq doe ka wì loq yiniq kô ,tàng ùh qmang aih, yùq èh wì hadai loh tanòe xalep kô ãiq. ²⁹ Apraham padreò bàu : Wì haq khoe i Môìse xam bòe pajàu , wì haq ep tamàng bàu wì aih .³⁰ Mangai padrõng anoe : Apraham kan cadraq au, ùh xài qmang aih, tàng joq i mangai cachìt rìh hlài trùh ta wì haq, aih èh wì haq hi raxach.³¹

Mahaq Apraham doe tàng joq ùh tamàng Môise xam bài pajàu , yac ka i mangai cachit rih hải ,dua wì haq ùh lùì”.

Bòe bàu hnaì maqnoeq.....

17 ..Chuaq Jesus doe ka magai tiaq hõc “ Bài yiniq ðòeq broq ka mangai qnoeq catoeh tacro aih ùh jê , mahaq habo ka raðeh mangai ma broq trong aih. 2 Tàng joq mangai leq broq ka moeq ngai kon mangai qyoh kô cro ta yiniq lui ,yõc apau hmo kàt ajang ranõng haq aih hu khwênh caqnìh caðac ta diac raxìq aih xan ka ùh hnau hòm . 3 Pì ep wêq raðeh. Tàng joq i oh daq ìh broq yiniq lui ka ìh ,drah tagàih ka haq , tàng joq wì haq loq raxach , drah caðac yiniq lui ka wì haq. 4 Yac ka moeq hì , wì loh yiniq ka ìh tapèh yàng , tapèh yàng wì haq wih hlài doe : Au raxach , aih drah caqnaih yiniq lui wì haq .

5 Bài mangai tiaq cla doe ka haq : Tam ka nhèn manoh lùì . 6 Chuaq Jesus doe “ Tàng joq pì i manoh lùì qyoh budàng clong habài , pì doe ka long pòh kô : Tabùiq enh kô hu loh pìt tadiac raxìq chàm , aih dua haq iu bàu 7 Taqne pì qmat i mangai leq i hapõng lam kai ruàng , lam ban triu , jò haq hlài enh gùng pì doe ka haq : Drah thia hangui tacô hu acaq qmòh? 8 Ma ùh xài pì thê haq : Padon ka au acaq , kàt caxi caqnam patih ka au hòeq , trùh jò leq au hêq ka acaq ,khoe aih pì hi acaq diq qmòh? 9 Hapõng iu tiaq bàu , craq haq i ep cleq ka manè haq ? 10 Pì hadai qmang aih , jò broq gêh trong thê pì broq , pì doe rameh : Nhèn kô bài hapõng ùh loh cleq ,nhèn broq toq trong nhèn ma ep broq.

Mòeq jàt ngai bacùn....

11 Manòeq Chuaq Jesus qnang lam trong tõi ta Jêrusalem , Haq lam tiaq roc acang taqne gùng Samari xam gùng Galili .12 wop jò haq mùt taplài aih, i moeq jàt ngai bacùn ðih haq , wì haq yòng enh hangai ,13 wì creo : Wì craq ! ha-och ka nhèn diq.

14 Jò bu hnoq wì aih , Chuaq Jesus doe “ Lam beq ! lam patô raðeh ka bài pajàu .” Jò wì aih qnang lam, diq ka wì haq jah brêh. 15 I moeq ngai ,hnoq raðeh jah brêh ,haq wih hlài , rai dêh bàu manè apôi Boc plinh .16 mangai aih caqnìh raðeh ajang jênh Chuaq rai manè haq . Kô aih mangai Samari. 17 Chuaq Jesus bòch “ Ùh xài moeq jàt ngai jah brêh ðõng qmòh? Hachin ngai tau taleq hòm? 18 Hagleq ùh i moeq ngai leq wih hlài manè apôi Boc plinh enh gùng ka mangai diac wì kô”. 19 Khoe èh, haq doe ka mangai aih “ Yòng lam beq ! manoh lùì ìh khoe broq ìh brêh lem.”

Jò diac plinh trùh....

20 Mangai Pharisi bòch Chuaq Jesus jò leq diac Plinh ma trùh, haq padreo bàu “ Diac plinh trùh ùh tiah ka yiniq jah hnoq xam mat . 21 ùh i cabô jah doe : Oe tacô loq oe hatau , majah qmang aih diac plinh oe ta pì .22 Haq doe ðeh ka mangai tiaq hõc “ Kô èh i jò pì ma tangêh jah hnoq ðeh mòeq hì da Kon mangai ,mahaq ùh jah . 23 Èh i wì doe ka pì : Haq oe tacô loq oe ta tau , mahaq apaq lam , paq tiaq wì. 24 Majah qmang aih tiah ka camlet enh caqnàm plinh kô trùh ta caqnàm plinh tau qmang leq , Kon Mangai trùh ðêh hì cla haq hanoh qmang aih. 25 Mahaq adroe aih , Kon mangai ep xalep bàc trong, èh kon mangai qnhòng kô kwaih ùh waq ðac haq .26 Bìac ma khoe loh ta hì Noê nèh qmang leq,hi da Kon Mangai trùh hadai qmang aih : 27 Wì acaq ,òq , ban õng, yõc mai , trùh hì Noê hi mùt ta boang ,diac kàn trùh, palùng diq ðõng phù cròng . 28 Yiniq ma

khoe loh ta hi da Lot nèh hadai, wì acaq ôq , wì tapadro , wì pìt , wì broq hnim .²⁹ Mahaq hi Lot loh khoe enh gùng Sôdom , aih i mè ngia ùnh clih enh plình jêh dõng mangai ta plài aih .³⁰ Hi Kon mangai loh hadai qmang aih ,³¹ Hi aih èh , cabô oe ta kùa po , i dahwèq ta hnim , ùh dùh loh qnhon, cabô oe tagùng , hanoh ùh dùh wìh hlài dèh .³² Hmàng hlài cadrì Lot beq ! ³³ Mangai leq chaq trong hu dèch dèh kan rih , aih èh hnhung , mangai leq cađac deh kan rih , aih èh jah yõc hlài.³⁴ Au doe ka pì , mang aih , baiq ngai kùì moeq aniang , mòeq ngai jah dèch atõc , mòeq ngai rong ðòeq hlài. ³⁵ Baiq ngai gucadrì pêh pajùm mòeq toq apau qmau , mòeq ngai jah dèch atõc , mòeq ngai jah rong ðòeq hlài.³⁶ Baiq ngai gualô oe tagùng , mòeq ngai jah dèch atõc , mòeq ngai jah rong ðòeq hlài. ³⁷ Mangai tiaq hõc bòch: Chuaq nhèn ! yiniq aih èh loh taleq ? Haq padreo bàu “ Taleq i hanang cachit , cliang kèn tagop dabau ta aih”.

Bàu aliah trùh kwan hadrah ùh taq atoq.....

18..

¹ Chuaq Jesus aliah ka mangai tiaq hõc mòeq yiniq , dõq wì loq ep waiq khàn yõt , ùh dùh tagah lep : ² Tagùng aih, i mòeq ngai cwan ùh yùq ka Boc Plình , rai ùh camaih qmòe ka cabô. ³ Tagùng aih hadai i mòeq ngai gucadrì hadrô , trùh anoe ka cwan :Au canòm chiac ka ìh ,hadrah taq atoq am ka au xam mangai tagit ka au.⁴ Cwan aih ùh tamàng khoe dùnh .Yàng khoe ka aih haq hèm: Hiloq ka au ùh yùq ka Boc plình , ùh camaih qmòe ka cabô ,⁵ mahaq mangai gucadrì kô lam pangài yõt qmòe ka au, hêq au tamàng dõng ka haq kan taq atoq, dõq haq pì hiaq trùh yõt broq ka au loh qmòe ka jìq gàu. ⁶ Khoe aih ,haq bòch wì “ pì atàng bàu cwan hadrah ùh taq atoq aih khoe anoe cleq ùh? ⁷ Qmang aih yilaiq Boc plình ma ùh hadrah taq atoq ka mangai ma khoe jah raih , aih bài mangai dahì damang toq creo dang haq ,wì ka haq xòe ka trùh hu dèch wì aih qmòh? ⁸ Au doe ka pì : Haq drah rênh tamàng kan taq atoq ka wì .Mahaq èh jò Kon mangai hi trùh haq i hnoq manoh lùì oe ta crõng taneh loq ùh?

Aliah ka mangai Pharisi sam mangai yõc thèq

⁹ Haq aliah bàu kô ka bài mangai loq doe rađeh taq atoq èh hnoq mangai qnoeq ùh loh cleq:¹⁰ “I baiq ngai tõi ta hnim kùh waiq hu waiq khàn : mòeq ngai Pharisi ,mòeq ngai yõc thèq .¹¹ Mangai Pharisi yòng waiq khàn ta manoh qmang kô :Waiq Boc plình ,au manè apôi ìh , majah qmang aih au ùh hiaq tiah ka wì qnoeq: loq atùng , broq dù ,loq tango , ùh hiaq tiah ka mangai yõc thèq meh. ¹² mòeq tuàn au apàm ka acaq baiq yàng , tarim yiniq au i, mòeq jàt phàn au dèch mòeq.

¹³ Mahaq mangai yõc thèq yòng chiac enh hangai, haq ùh lùì qngoc taplình , haq tùc dèh rada rai anoe : Boc plình ,ha-och ka au diq , au mangai i yiniq lui.

¹⁴ Au doe ka pì , enh ngèa ka Boc plình ,mangai kô wìh hlài deh ta hnim jah kan taq atoq ùh hnau ka mangai tau. Majah qmang aih , mangai leq chaq trong padèch atõc rađeh , aih èh jah caqnih qnoh haqneq, mangai leq paqnoh rađeh , aih èh jah dèch atõc ka haqnhèq”.

Bòe kon qyoh....

¹⁵ Wì hadai aràng bài kon qyoh trùh ti Chuaq Jesus, dõq haq yõc tì bèq wì qyoh aih .Mangai tiaq hõc hnoq qmang aih , hi lech ka bài mangai aràng . ¹⁶ Mahaq Chuaq Jesus crêu anoe ka wì “ Dahaq wì qyoh trùh ti au

, apaq tət ,majah qmang aih mangai hatiah bài kon qyoh qmat majah diac Boc plinh .¹⁷ Joq qnàng au doe ka pì , cabô ùh waq yôc diac Boc plinh tiah ka mòi eq ngai kon qyoh , haq aih ùh jah mùt diac Plinh”.

Mangai guradam padrông kan

¹⁸ Jò aih i mòi eq ngan cwan bôch Chuaq Jesus : Mangai hnài lem, au ep broq cleq òeq hu jah kan rih halinh mòi eq òeq ? ¹⁹ Haq padreo bàu “ Hagleq ìh majah creò ka au mangai lem . Ùh i ka mangai leq lem enh gùng ka mòi eq ngai Boc plinh .” ²⁰ Ìh khoe loq bài ranenh kô: Ìh apaq tango ,apaq jêh đac mangai , apaq atùng ,apaq wiang yòng òeq capoch dech ka mangai qnoeq. Ep i loq hêm dèh ka miq baq”. ²¹ Mangai aih doe : Diq dồng rìm yiniq aih au khoe wèq qmòi enh jò oe qyoh nêh raq.²² Chuaq Jesus tàng qmang aih ,hi doe ka haq “ Ìh oe raq i mòi eq yiniq hòm . Tech dồng kùng hang ìh beq , axong am ka mangai pa èh ìh hi jah hang oe ta plinh , khoe aih ìh trùh, hu lam tiaq au .” ²³ Jò tàng qmang aih , mangai radam aih loh ka mangò ,majah qmang aih haq padrông pì cajaq.²⁴ Chuaq Jesus ngan ta haq rai doe “ Mangai padrông mùt diac Boc plinh joq xa . ²⁵ Lỗcđà mùt trom jrùm yeo hlài ka mangai kan mùt diac Plinh” ²⁶ Bài mangai tàng bàu aih ,wì bôch : Qmang aih èh cabô majah dèch? ²⁷ Haq padreo bàu “ Trong leq mangai broq ùh jah ,aih Boc plinh broq jah .” ²⁸ Phiero bôch : Hacô nhèn khoe cađac diq dồng yiniq nhèn i òeq hu tiaq ìh ,aih èh nhèn jah cleq?²⁹ Chuaq Jesus padreo bàu “ Joq qnàng au doe ka pì , mangai leq taiq diac Plinh loh qmòi ka cađac deh hnim , miq baq, oh daq ,cadri kon , ³⁰ oe ta qnhòng kô haq jah hlài yeo bàc , qnhòng atiq jah kan rih halinh mòi eq òeq.

Yàng piq Jesus anoe trùh trong haq cachit.

³¹ Chuaq Jesus qnong wì mòi eq jàt baiq ngai lam crài ti rađeh ,haq doe ka wì “ Kô èh bèn tọc ta Jêrusalem , rìm yiniq bài pajàu ma khoe achìh trùh Kon mangai èh hi jah xit .³² Majah qmang aih wì rùp haq am ka mangai diac wì . Wì halê haq ,hanip haq rai cachôh ka haq.³³ Khoe ka wì blai haq wì hi jêh cađac haq. Trùh hì piq,haq hi rih hlài .³⁴ Mahaq bài mangai tiaq hóc ùh qnì tàng , bàu aih enh anoe cleq majah qmang aih khoe cadoc ka bài mangai tiaq hóc ,dài wì haq majah ùh qnì Chuaq Jesus anoe cleq.

Mangai lua mat oe ta Jêrico....

³⁵ Jò Chuaq Jesus ten trùh ta Jêrico ,i mòi eq ngai lua mat hangui ti trong òeq hu ti axin acaq .³⁶ Jò haq tàng i bài mangai bàc lam trong aih , haq bôch i yiniq cleq . ³⁷ wì doe ka haq : Chuaq Jesus mangai Naxaret lam trong kô . ³⁸ Haq crêu cadêh : Waiq Kon bùa Đawit , ha-och ka au diq!⁴⁰ Chuaq Jesus hi yòng rai thê wì aràng mangai aih trùh . Jò mangai lua mat trùh ten jang aih, haq hi bôch ⁴¹ “ Ìh enh au broq ka ìh cleq?” mangai aih doe: Waiq Chuaq ! au enh jah xau hnoq! ⁴² Chuaq Jesus doe ka haq “ Xau hnoq hlài beq!” ⁴³ Tajòe qmòi jò aih raq, haq jah xau hnoq hlài, haq hi lam tiaq Chuaq Jesus rai manè apôi Boc plinh . Diq ka mangai hnoq qmang aih wì hadai manè apôi Boc plinh.

Jesus mùt ta hnim Xachê.....

19 ..

¹ Chuaq Jesus mùt ta Jêrico , haq pagat ti trong . ² Ta aih i mòi eq ngai yiniq haq Xachê , broq gàu bài mangai yôc thèq , padrông pì cajaq. ³ Haq aih enh hnoq Chuaq Jesus aih mangai qmang leq, mahaq ùh jah,

majah qmang aih mangai bàc hrinh ,èh haq aih mangai đêq .4 Haq cadàu adroe ,heo tồc goe long pồc đòeq hu jah ngan Chuaq Jesus , majah qmang aih Chuaq Jesus lam trong aih. 5 Chuaq Jesus trùh ajang aih, qngoc ngan rai crêu “ Xachê ! drah loh beq , majah qmang aih hì kô au mùt hnim ìh.”⁶ Xachê drah loh qmòe ka rênh , rai đìh Chuaq Jesus rai lem bùi .7 Đìq đổng mangai hnoq qmang aih, wì bahech ka dabau: Mangai kô ka doe mùt oe ta hnim mangai i tuiq . 8 Mahaq Xachê padinh yòng rai anoe : Waiq Chuaq! Au yồc deh moeq haqne hang cla au hu đòeq axong ka mangai pa ,tàng joq au i broq habo ka cabô yiniq cleq ùh loe , au padreo hlài loe pôn yàng. 9 Chuaq Jesus doe “ Hì kô , kan dèch khoe mùt ta hnim kô, majah qmang aih haq kô hadai kon xau Apraham . 10 Majah qmang aih Kon mangai trùh hu chaq dèch mangai ma khoe hnhung” .

Aliah trùh bàc.....

¹¹ Jò wì oe raq tamàng bàu aih , Chuaq Jesus tam mòeq aliah ka wì hòim ,majah qmang aih haq khoe ten trùh Jêrusalem ,wì xoh dèh diac Boc plinh loh hloe draq drinh jò aih raq. ¹² Haq doe rameh “I mòeq ngai kon bùa lam hangai đòeq hujah dèch broq bùa khoe èh hì wìh hlài. ¹³ haq hì crêu dèh moeq jàt ngai hapống , am ka wì aih moeq jàt capiac bac ,rai tanap :Yồc bàc kô abroq dồq haq loh tam trùh hì au wìh hlài . ¹⁴ Mahaq mangai gùng aih git ka haq, wì thê mòeq mangai wê bàu atiq ka haq hu doe :Nhèn ùh enh mangai kô broq bùa wèq nhèn.

¹⁵ Jò haq khoe jah dèch broq bùa, haq wìh hlài, crêu ka bòe mangai khoe yồc bàc trùh ta haq, đòeq hu ngan mòeq ngai wì broq jah toq leq. ¹⁶ Mangai adroe trùh doe : Wì craq! bàc ìh khoe loh tam mòeq jàt capiac qnoeq hòim . ¹⁷ Wì craq doe: Joq wìa qnàng ,mangai hapống lem da au, trong qyoh ìh khoe đìq ka manoh, ìh kô èh jah wèq mòeq jàt gùng ¹⁸ Hapống ma hatia trùh doe: Wì craq ! bàc ìh am , au khoe broq jahtam padam capiac hòim .¹⁹ Wì craq doe : Ìh jah wèq padam gùng. ²⁰ Mangai qnoeq hòim trùh doe : Wì craq ! Hacô bàc ìh ,au khoe caxop don đòeq ta mù ,²¹ majah qmang aih au crê ka ìh ,au loq ìh kô mangai nhang ùh palap cleq , yồc tanòe ìh ùh i đòeq , gat tanòe ùh i rai .²² Wì craq doe : Wùih ! mangai hapống dù tau, au tiaq bàu cla ìh raq đòeq hu hadrah ka ìh , ìh khoe loq ka au mangai nhang ,yồc toq taqnòe ùh i đòeq ,gat toq tanòe ùh i rai , ²³ hagleq ùh yồc bàc aih tah ta hnim padro bàc ? jò au hlài au hu yồc dèh xam xèm xam goe . ²⁴ Wì craq doe ka bài mangai ma yòng ta aih: yồc bàc haq qmat ,am ka mangai ma khoe i moeq jàt capiac bac. ²⁵ Wì doe : Wì craq ! haq aih khoe jah mòeq jàt capiac bac .²⁶ Au doe ka pì : mangai leq khoe i , aih èh jah am tam , mangai leq ùh i , aih èh yồc hloe cleq wì haq ma khoe i .²⁷ Mahaq bài mangai leq ma tagit ka au , ùh enh ka au broq bùa enh qnhèq ka wì haq , qnoh wì haq tacô , jêh cađac enh ngèa au kô

Jesus mùt ta Jêrusalem qmang ka bùa

²⁸ Atiq ka Chuaq Jesus tapoch qmang aih, haq lam enh ngoe ka wì , tồc ta Jerusalem , ²⁹ Jò haq ten trùh ta plài Bêpha-jê xam plài Bêthani ajang wang Ôliu , haq thê deh baiq ngai tiaq hỏc lam ,³⁰ rai tanap “Lam ta plài enh ngèa chỏp qmat , Jò mùt ta plài chỏp hnoq mòeq toq lùa kon wì kàt ,qnhỏq lah i cabô kỏe , caqnaih caxi dùi ahlài tacô ka au .³¹ Tàng i cabô bỏch chỏp : gleq chỏp majah caqnaih haq? Chỏp doe : Chuaq i yiniq waq ka haq”.

³² Baiq ngai loh lam, glàm tiah ka bàu Chuaq Jesus khoe doe.³³ Jò qnang caqnaih lùa kon aih, cla mangai ban lùa aih bỏch : Hagleq majah caqnaih lùa mat , ³⁴ wa padreo bàu : Chuaq i yiniq waq .³⁵ Wa aih tiaq lùa aih ahlài ka Chuaq khoe èh yồc deh eo hlèch ta cởng lùa , dèch Chuaq tồc hangui enh qnhèq. ³⁶ Jò Chuaq

Jesus qnang tǒc ti trong , bǎc ngai qyǒc dēh eo hlēch ti trong lam. ³⁷ Jò ten trùh criang Ôliu ,dìq dǒng mangai tiaq hǒc manè pì cǎjaq, wì dēh bǎu manè apôi Boc plính rím trong halac wì haq ma khoe hnoq.

³⁸ “Xôq ramot am ka búa trùh ma trùh enh dalam ka Yiniq Chuaq

Kan catēm tanòe diac Plính ,kan ra nhòm tanòe dìq jaq haqnèq”

³⁹ I bài mangai Pharisai oe ta mangai bǎc ta aih anoe ka Chuaq Jesus: Mangai hnài , ìh tagàih bài mangai hǒc tiaq ìh qmat . ⁴⁰ Chuaq Jesus padreo bǎu “ Au doe ka pì , tàng joq wì qmat hatinh , bài hmo qmat èh hi cachech ”.

⁴¹ Jò Chuaq Jesus haten ngan hnoq Jêrusalem ,haq hmoe ka Jêrusalem .⁴² Haq doe “ Au ngēh hì kô ,gè loq yiniq cleq aràng am ka gè kan catēm ,mahaq yiniq aih hì kô khoe gahnáp ,mat gè ùh xau hnoq .⁴³ Majah qmang aih i mòeq hì trùh ti gè , jò wì ma tagit ka gè bǒc lì wa wēnh ka gè , dudan ka gè tap bè .⁴⁴ wì raliang jēh cǎdac dìq dǒng ,xam cla xam wì kon ma oe taqne gè qmat . Wì ùh ðòeq mòeq pliang hmo leq oe jah raxon enh qnhèq ka dabau, majah qmang aih , gè khoe ùh canau jò Boc plính trùh ti dǎdēh”.

Jesus ta hnim kùh waiq.....

⁴⁵ Jò Chuaq Jesus mùt ta hamlang hnim kùh waiq, haq drùh qnoh dǒng bài mangai padreo ta aih.⁴⁶ Haq doe “ I bǎu achih :Hnim au kô hnim waiq khàn ,mahaq pì broq haq wia pù atùng.” ⁴⁷ Rím hì haq hnài ta hnim kùh waiq.Bài pajàu kàn,bài mangai hnài ranenh xam bài gucraq gùng aih ,chaq trong jēh đac haq ,⁴⁸ Mahaq wì ùh qnì chaq trong leq ,majah qmang aih dìq dǒng mangai ta aih ùh talic ka tamàng bǎu haq.

Wì bòch Jesus yǒc cwiàng enh leq..../

20..

¹ I mòeq hì ta bài hì aih Chuaq Jesus qnang hnài wì tanòe hnim kùh waiq rai anoe ka wì trong Bǎu lem , i bài pajàu kàn ,bài mangai hnài ranenh, taqmùt ti bài gucraq trùh ta haq . ² Wì bòch : Anoe ka nhèn cwiàng enh leq ìh majah broq qmang kô, cabô ma am ka ìh cwiàng aih? ³ Haq padreo bǎu “ Au hanoh bòch pì mòeq bǎu . Drah anoe ka au ⁴ Baptem da Jon trùh enh Plính loq loh enh mangai ? ⁵ Wì aih ta hatinh ka dabau : Tàng bèn doe : Trùh enh Plính ,aih èh haq bòch bèn :Qmang aih gleq pì ma ùh lúi bǎu haq? ⁶ Tàng bèn doe : Loh enh mangai , aih èh dìq ka mangai bǎc wì yǒc hmo ðáp bèn , majah qmang aih wì khoe lúi Jon aih joq mangai pajàu . ⁷ Qmang aih wì padreo bǎu doe :Nhèn ùh qnì haq loh enh leq. ⁸ Chuaq Jesus doe “ Au hadai ùh doe ka pì loq cwiàng enh leq au ma broq bòe yiniq kô.”

Bǎu patìah trùh mangai pìt nho....

⁹ Haq aliah hloe ka wì qmang kô “ I mòeq ngai pìt mòeq wuàn plì nho, am ka wì broq axong wuàn nho aih khoe èh cla haq lam gùng hangai dūnh hì . ¹⁰ Trùh jò git plì ,cla haq thē deh mòeq ngai hapǒng trùh ta bài pìt nho hu ta axon yǒc plì ,mahaq bài mangai pìt nho jēh hapǒng aih ,hnan haq hlài tì dech. ¹¹ Wì craq thē hapǒng maqnoeq hòm , mahaq wì hadai jēh , hanip , èh hnan haq aih hlài tì dech .¹² Wì craq thē hapǒng yàng piq , wì hadai jēh haq aih loh habau rai hnan đac .¹³ Craq wuàn nho aih doe : Au broq qmang leq kô?

Au the deh kon calô au ma loq waq, lam , broq braiq wì camaih iu ka haq.”¹⁴ Mahaq jò bài mangai pít nho hnoq kon calô aih trùh , wì hatuàng ka dabau : Hatau mangai kon majah waq đồng kùng hang, beq bèn jêh cađac haq, aih êh kùng hang haq jah đồng bèn. ¹⁵ Wì hi khwênh qnoh haq enh gùng ka wuàn nho rai jêh cađac hloe. Aih êh craq wuàn nho broq cleq ka bài aih? ¹⁶ Haq trùh jêh đồng bài mangai pít nho aih khoe êh yôc wuàn aih am ka mangai qnoeq abêq . Bài mangai ma tàng bàu aih wì doe : Boc Plình ùh i manaq taleq!
¹⁷ Chuaq Jesus ngan wì haq rai bôch “ Tàng qmang aih bàu ma achih :

Hmo mangai thòq broq hnim cađac ,

Khoe wìa hmo mùm hnim , bàu aih anoe cleq?

¹⁸ Mangai leq ta clih ta hmo kô êh, hech loh dác , hmo kô tùc troq cabô , mangai aih êh hech hoch đồng. ¹⁹ Wop jò aih , bài pajàu kàn xam bài mangai hnài ranenh chaq trong jêh cađac haq , majah qmang aih wì loq bàu Chuaq Jesus aliah aih anoe trùh wì haq raq. Mahaq wì ùh hùh ka bài mangai bác ta aih.

Am Thèq ka Sêsa.....

²⁰ wì ti hanhoe ngan haq, wì the bài mangai ti rinh broq patìah mangai khôn khuq, òđeq chaq trong hu goh haq ajang bàu tapoch , hu rùp haq am ka bài mangai i cwìang , mangai gàu bài cwan. ²¹ Wì aih bôch Chuaq Jesus bàu kô : Mangai hnài ! nhèn loq trong bàu tapoch , trong hnài da ìh tiaq trong jang , ùh loq waq tang ngai, yôc bàu joq qnàng òđeq hnài trong Boc plình . ²² Nhèn akhòh am thèq ka Sêsa ùh ? ²³ Mahaq Chuaq Jesus loq ka manoh wì , haq doe : ²⁴ “ Am ka au ngan mòeq đò-ni-ê beq , Kô ìq qmù cabô , yiniq cabô?” wì padreo bàu : Sêsa. ²⁵ Haq doe ka wì “ Padreo da Sêsa yiniq cleq da Sêsa , am da Boc Plình yiniq cleq da Boc Plình.” ²⁶ Enh ngèa mangai bác wì bahlac bàu haq ùh jah .Toq hamàih ka bàu haq ta hatèu , wì hi loh ka hatinh .

Jò rìh hlài

²⁷ I qnah ngai Sađusê , aih bài mangai loq doe ùh i kan rìh hlài, wì trùh haten ka Chuaq Jesus rai bôch :²⁸ Mangai hnài , Môise khoe òđeq ka nhèn ranenh qmang kô : Tàng mangai i daq yôc mai, khoe haq cachit , ùh i ðeh kon, mangai oh aih ep yôc mai deh daq aih òđeq haqmot hlài xinoe ka daq haq. ²⁹ Qmang aih , i tapèh ngai oh daq .Mangai daq ramua yôc mai , êh cachit qnhòq i kon.³⁰ Mangai hatìa yôc mai aih ,³¹ êh trùh mangai atiq , ðiq đồng wì tapèh ngai ðiq yôc mangai aih , wì ðiq cachit mahaq ùh lòm i kon .³² Pulùch , mangai cadri aih hanoh cachit.³³ Qmang aih êh trùh hì rìh hlài gucadri aih broq mai cabô? Majah qmang aih ðiq đồng tapèh ngai aih hanoh khoe yôc gucadri aih broq mai . ³⁴ Chuaq Jesus doe “ Mangai qnhòng kô yôc òng yôc mai ,³⁵ mahaq bài mangai ma khoe troq ka jah kan rìh hlài qnhòng atiq , jò rìh hlài enh kan cachit, aih pi i yôc òng yôc mai hòm .³⁶ Majah qmang aih wì haq pi cachit hòm , wì haq tìah ka bình plình , wì haq aih kon Boc Plình , aih kon da kan rìh hlài. ³⁷ Mahaq da mangai cachit rìh hlài aih Môise khoe am loq jò anoe hlài ùnh cheo ramù yila , jò haq doe Chuaq aih Boc Plình da Apraham , Boc Plình da Ysac ,Boc Plình da Jacôp. ³⁸ Haq ùh xài Boc Plình da mangai cachit ,mahaq da mangai rìh , majah qmang aih rìm ngai ðiq rìh ka haq . ³⁹ I bài mangai hnài ranenh anoe ka haq: Mangai hnài, bàu ìh anoe ðiq jaq troq. ⁴⁰ Wì pi hùh bôch tam haq mòeq bàu leq hòm.

Christ aih kon cabô....

⁴¹ Khoe aih Chuaq Jesus bôch wì haq “ Hagleq wì ma doe Christ aih kon bùa Đawit ? ⁴² majah qmang aih cla Đawit raq khoe anoe ta hset calêu plinh rameh :

Boc Plinh doe ka Chuaq au :

Hangui enh apah qma ka au ,

⁴³ trùh jò au rùp mangai tagit ka ìh broq radua roh jènh ìh.

⁴⁴ Đawit khoe crêu ka haq aih Chuaq , atiq ka aih haq wìa kon Đawit qmang leq ?”

⁴⁵ Jò ãiđ ãông ka wì ta aih qnang tamàng, Chuaq Jesus doe ka mangai tiaq hõc , ⁴⁶ “Ngan oq ! bài mangai hnài ranenh , aih bài mangai enh toq caxùnh eo yôh , ti lam dauq hawàt, enh wì kùh gàu ka rađeh taqne chòq , ta hnim tagop enh toq hangui nòe yi haqnheq , jò acaq yiniang enh toq hangui enh qnhèq. ⁴⁷ waiq khàn broq deh waq ka yôh , mahaq lõnh apom hnim gucadrì hadrô. Bài aih èh Boc plinh taqmòq kan baxa ka wì haq yeo bàc.”

Mangai gucadrì hadrô craq tah bac....

21 ..Jò Chuaq Jesus haqmiang ngan ,hnoq bài mangai padrông tah bac ta hnim kùh waiq. ² èh hadai hnoq mòeq ngai gucadrì hadrô tah baiq hliac bac . ³ Haq doe “Joq qnàng au doe ka pì ,mangai hadrô pa qmat tah yeo bàc ãông ka wì qnoeq , ⁴ majah qmang aih bài mangai padrông tau tah toq bac rah, yàng mangai hadrô qmat joq nan pa ,mahaq khoe tah ãông deh bac ãòeq haq ban rađeh.

Hnim kùh waiq raliang ,

⁵ I qnah ngai anoe trùh hnim kùh waiq, xam bài hmo lem xam bài dahwèq dèch ka Boc Plinh . Chuaq Jesus doe : ⁶ “ Tangèa kô èh ,rìm yiniq pì ngan hnoq qmat èh taclìh ãông ãiđ pì oe i mòeq pliang hmo leq oe jah raxon crõng hmo leq . ⁷ Wì hi bôch haq: Mangai hnài , bài yiniq aih jò leq men trùh? I cleq pateo ka am ka mangai loq bài yiniq aih khoe ten trùh?. ⁸ Haq padreo bàu “ Pì ngan oq ! apaq ãòq wì padô qnùt pì, majah qmang aih i bàc ngai patiah yiniq au ,trùh doe ka pì : Au kô raq Christ ! jò atiq lùch khoe ten trùh. Ùh ãùh tiaq wì haq. ⁹ Jò pì tàng ràu trùh trong tajêh tablah , apaq yùq hrìn, majah qmang aih bài yiniq aih ep trùh adroe ,mahaq kan atiq lùch qnhòq trùh hloe draq ãrinh .

¹⁰ Khoe aih haq anoe ka wì “ Gùng kô yòng tagit gùng tau . Diac kô tagit ka diac tau . ¹¹ Èh i kan ralàng kàn ,pangot hrah ,xam bàc kan jìq ãài ,i bài kan ramòt halac kàn oe ta trõc .¹² Mahaq adroe ka bài yiniq aih trùh, taiq yiniq au kô èh wì phù cròng majah ti canàt rùp baxa pì ,aràng pì ta hnim tagop rai clêh pì , qnoh pì yòng enh ngèa ka bùa xam mangai broq craq cwan . ¹³ Aih ãòeq pì yòng anoe ãòq wì loq ka au . ¹⁴ qmang aih pì ep hmàng ta gàu, apaq lèt kô èh ãèh anoe cleq hu aclai ka rađeh .¹⁵ Majah qmang aih ,i au am ka pì bàu capoch xam kan rabiaq ãòeq mangai git ka pì ùh hlàt tablêq ,ùh i trong hu goh pì . ¹⁶ kô èh, ra-ùng haq ,miq baq ,daq oh, hadròng , trùh hloe bua cla pì hadai blòq pì, broq ka bàc ngai taqne pì ep cachit . ¹⁷ Taiq au kô èh rìm ngai majah git ka pì . ¹⁸ Mahaq mòeq hadrang xàc tagàu pì ãua ùh hnhung . ¹⁹ Yòng ma cajap haq

oq , aih èh pì jah kan rih . ²⁰ Jò pì hnoq bài linh canàt tap danh ka Jêrusalem , aih pì loq kan raliang da haq khoe ten trùh. ²¹ Jò aih cabô oe ta gùng Judê drah cadàu tồc tawang . Cabô oe ta plài drah ca dàu loh enh gùng. Cabô oe tagùng ùh dùh wih mùt taplài . ²² Majah qmang aih bòe aih jò òeq hu patem chau , òeq xit qmang ka rìm bàu khoe achih . ²³ Bài hì aih èh, habo ka mangai cadrì oe jiang xam gucadrì ta-ùq kon ! I kan ranàc kàn ,kan panòeh ka mangai gùng kô. ²⁴ Wì haq cro enh qneq ka pla chang ,èh wì rùp qnong wì haq lam broq díc ta diac qnoeq .Èh mangai diac qnoeq jôiq padit Jêrusalem , trùh jò da mangai diac qnoeq jah gêh . ²⁵ Èh i kan halac ta mat mahi , mat khê xam bài halông , bài mangai ta taneh loh ka mangò yùq crè majah qmang aih diac raxìq loh atêh tagruàng tagrât . ²⁶ jò aih kon mangai hnoq trong dù trùh ta crông taneh , loh ka pi i qmòe mahua yiang , majah qmang aih bài cwiàng ta trồc tì hadai ka dalàc. ²⁷ Jò aih èh phù crông ma hi hnoq Kon Mangai yỏc cwiàng yỏc kan ranhòm kàn hangui taqne yùc plình hu trùh. ²⁸ Jò bài yiniq kô bu trùh, drah yòng majang , gàu rai qngỏc , hì baxon yỏc ahlài pì trùh khoe ten ²⁹ Haq aliah ka wì qmang kô “ Pì ngan long pỏc xam bài long qnoeq . ³⁰ jò haq plỏh hamỏng , pì hnoq qmang aih ,pì loq ðeh khoe ten trùh jò padrang . ³¹ Hadai qmang aih ,jò hnoq khoe loh bài yiniq kô ,aih pì loq diac Boc Plình khoe ten trùh. ³² Au anoe qnàng ka pì , nang noe kô ùh lùch adroe ka bài yiniq aih trùh . ³³ Plình crông taneh kô èh hnhung ,mahaq bàu au anoe kô èh ùh jò leq hnhung.³⁴ Qmang aih ep wẻq raðeh , yùq èh trong acaq ôq ,trong bù bia xam kan loq lẻt taqnhông kô broq ka manoh pì loh ka pi hmàng, èh hì aih trùh tapì tiah taiq ka jeo gùp . ³⁵ majah qmang aih, hì aih hadai trùh ka rìm ngai oe ta crông taneh. ³⁶ Qmang aih pì ep hamang rai waiq khàn yỏt ,òeq pì jah puplech ka bài kan ranàc aih ,hu jah yòng enh ngẻa Kon mangai.

³⁷ Rìm hì haq hnài ta hnim kùh waiq, rìm mang haq tỏc ta wang Oliu kùì padài ta aih .³⁸ Èh bu qngah bài mangai bằc khoe trùh ta hnim kùh waiq hu tamàng bàu haq.

Juđa òq bàu tech Jesus....

22 ..

¹ Hì Ramẻnh Bẻnh ùh tah blo , aih la hì ramẻnh Pancwa . ² Bài pajàu kàn xam bài mangai hnài ranenh chaq trong hu jẻh caðac Chuaq Jesus, majah qmang aih wì ùh hủa ka mangai bằc ta aih. ³ Kiac Satan khoe mùt enh dalam ka Juđa , ma creo Icari-ỏt, haq hadai mangai oe ta Mỏeq jắt baiq ngai. ⁴ haq lam chaq bài mangai pajàu kàn xam bài craq linh ma wẻq hnim kùh waiq, haq ta hatĩnh ti wì hu chaq trong leq òeq rùp Chuaq Jesus am ka wì.⁵ Wì aih manẻ pi cajaq , ðiq ka wì wiang òq bàu am ka haq bằc. ⁶ Haq khoe mòeq manoh ka wì , chaq jò hatroq hu rùp Chuaq Jesus am ka wì , mahaq ùh òeq mangai bằc loq .

⁷ Trùh hì Ramẻnh acaq bẻnh ùh tah blo, hì aih ep jẻh kon triu broq tadreo hì ramẻnh Pancwa, ⁸ Chuaq Jesus thẻ xam Phiero xam Jon lam rai tanap “ Lam padon ka bẻn acaq ramẻnh Pancwa .” ⁹ Wa aih ðoe : Ìh enh nhẻn padon ramẻnh aih taleq?. ¹⁰ Haq padreo bàu “ Jò chỏp mùt taplài , hnoq mòeq ngai wẻ abỏq diac, chỏp drah tiaq haq aih mùt ta hnim , ¹¹ Chỏp ðoe ka craq hnim aih , Mangai hnài nhẻn ðoe ka ìh : Aniang kàn nẻ au acaq ramẻnh pajùm ðeh ti mangai tiaq hỏc oe taleq? ¹² craq hnim aih hì patỏ am ka chỏp mòeq adủq kàn oe enh qnhẻq , ta aih rìm yiniq khoe palauq qmỏe, pì padon ta aih” . ¹³ Wa aih hi lam ,joq qnàng wa glàm tiah ka bàu Chuaq Jesus khoe ðoe , wa hi padon ramẻnh Pancwa ta aih.

¹⁴ Trùh jò ,Chuaq Jesus xam bài mangai tiaq cla hangui acaq ti haq. ¹⁵ Haq ðoe “ Au ðiq jaq enh acaq ramẻnh Pancwa kô ti pì adroe ka au chiủq xalep . ¹⁶ Majah qmang aih ,au pi acaq ramẻnh kô hỏm trùh hì

ramènh aih jah gèh ta diac Boc Plinh” . ¹⁷ Khoe aih haq dèch doe chrõng , manè apôi ,hi khoe haq doe “ Yõc chrõng kô pì qnèp ka dabau . ¹⁸ Majah qmang aih au doe ka pì , pang kô ta èh au pì ôq diac pli nho kô hòmh trùh jò leq diac Boc Plinh jah trùh” . ¹⁹ Khoe aih ,haq yõc bèngh , manè apôi , khoe èh goh bèngh axong am ka mangai tiaq hõc ,rai doe “ Kô chach au ,khoe am ka pì , pì broq qmang kô hu hmàng trùh au .” ²⁰ Acaq hi khoe , hanoh qmang aih , haq yõc chrõng qnèp ka mangai tiaq hõc rai doe “ Doe chrõng kô aih tajao maneo oe ta mahim au ,mahim khoe ta ùc qnoh am ka pì . ²¹ mahaq tì kõng da mangai ma padon blòq au hadai oe ta cabõng kô tì tì au . ²² Kon Mangai kô èh lam, tiah ka bàu khoe thê .Mahaq habo ka mangai ma blòq haq.” ²³ Mangai tiaq hõc bòch dabau , taqne wì haq mangai leq ma broq trong aih.

Mangai tiaq hõc tarahen.....

²⁴ Mangai tiaq hõc tarahen ti dabau ,đòeq hu ngan mangai leq ta wì haq èh majah broq yeo kàn dõng . ²⁵ Chuaq Jesus doe ka wì “ Bài bùa diac wì yõc deh cwìang enh cla đòeq hu hmet mangai qnoeq , bài mangai broq gàu yõc cwìang padit mangai qnoeq ,mahaq creo ka rađeh aih mangai broq lem. ²⁶ Mahaq pì ùh dùh qmang aih ,taqne pì mangai leq ma yeo kàn ep tiah qmang ka mangai yeo qyoh, mangai leq broq gàu ep broq tiah ka mangai patih .²⁷ Majah qmang aih moeq ngai haqngui acaq xam moeq ngai yòng patih mangai maleq ma yeo kàn ? axài mangai haqngui acaq loq ùh ? Mahaq oe taqne pì au tiah ka mangai patih ²⁸ Pì bài mangai ma khoe cajap manoh yòng ti au jò wì tah hadrah ka au ²⁹ aih èh au am ka pì diac au, tiah ka Baq au ma khoe am ka au ³⁰ dõq pì jah acaq ôq pajùm ti au ta diac au, jah hangui ta gèq hu hadrah mòeq jàt baiq xinoe Isorali.

³¹ Simôn ,Simôn ! Kiac Satan khoe bàc yàng bòch ùm ìh tiah ka ùm qmau . ³² Mahaq au khoe waiq khàn ka ìh , dõq manoh lùì ìh ùh hìaq capòch . Qmang aih ,jò ìh khoe hwi hlài , drah broq ka cajap manoh oh daq” . ³³ Phiero doe : Chuaq au ! yac ka wì rùp clèh au , yac ka au cachit , dua au tiaq ìh. ³⁴ Chuaq Jesus padreo bàu “ Phiero ,au doe ka ìh , hi kô èh ,adroe ka ia rõng ìh khoe piq yàng hangah đeh ùh qnì ka au .” ³⁵ Khoe aih Chuaq Jesus bòch wì haq “ Jò au thê pì lam ùh wê bac , bàu , ùh i qmòe ka jep , pì ahìaq thiùq cleq ùh?” wì padreo bàu : ùh hìaq! .³⁶ Haq doe ka wì “ Mahaq manòeq kô , tàng pì i bac , wê beq ,maleq i bàu ,hadai qmang aih . Maleq ùh i ka chang , lam tech eo yôh qmat đòeq hu rot . ³⁷ Majah qmang aih, kô au anoe ka pì loq ,i bàu khoe achìh rameh: wì alùh haq pajùm ti bài mangai dù .Bàu aih ep xit trùh ka au . Joq qmang aih , rìm yiniq khoe patô trùh au qnang jah xit .” . ³⁸ Mangai tiaq hõc doe : Ìh ngan kô , nhèn i baiq pla chang . Haq doe “ Toq aih khoe qnang lem.”

Jesus waiq khàn ta wang Ôliu

³⁹ Khoe aih , Chuaq Jesus tõi ta wang Ôliu , qmang ka haq ma loq lam dèh yôt, bài mangai tiaq hõc lam tiaq deh haq . ⁴⁰ Jò khoe trùh nòe , haq doe ka mangai tiaq hõc “Waiq khàn beq , dõq pì ùh hìaq taclìh ta kan padô qnùt . ⁴¹ Khoe aih haq lam yeo hangai bu mòeq atèm hmo , rai hacùn cràng rai waiq khàn . ⁴² Rameh “ Waiq Baq ! Tàng joq lem manoh ìh , dèch chrõng kô khoe ka tì au. Hnoq doe qmang aih apaq dì manoh au mahaq tiaq manoh ìh .” ⁴³ I mòeq bình plinh loh enh plinh trùh jang haq ,tam padren ka haq. ⁴⁴ Jò diq jaq mangò aih , haq waiq khàn yeo crialq hòmh , pa-ùh haq loh tiah qmòe ka mahim, catôh ta taneh. ⁴⁵ Hêh ka waiq khàn haq wih hlài ajang nòe bài mangai tiaq hõc hnoq wì kùì pì hmàng ta kan mangò. ⁴⁶ Haq bòch wì “ Hagleq pì majah kùì ? Drah yòng beq hu waiq khàn dõq pì ùh hìaq clih ta kan padô qnùt .”

Wì rùp Jesus

⁴⁷ Jò haq oe raq anoe , mòeq calùh mangai trùh , Juda haq hadai oe ta mòeq jàt baiq ngai , lam qmòe adroe hu qnong wì . Juda trùh ka haten hìp Chuaq Jesus . ⁴⁸ Mahaq Chuaq Jesus bòch haq “ Juda ,ìh blòq cađac Kon mangai xi mòeq qmang hìp kô raq qmòh?” ⁴⁹ Jò mangai tiaq Chuaq Jesus hnoq khoe padon loh yiniq , wì bòch : Nhèn yòc chang nhèn jêh khòh ùh? ⁵⁰ I mòeq ngai ta bòe mangai tiaq hóc jêh mangai hapõng pajàu haqnèq , pot catech da haq aih don pah qma . ⁵¹ Mahaq Chuaq Jesus doe “ Hêq pi dùh broq qmang kô .” Èh Haq yòc tì bèq don mangai aih rai broq brêh . ⁵² Khoe aih Chuaq Jesus tapoch ka bài pajàu kàn ,bài cwan wèq hnìm tagop xam bài gucraq ma lam rùp haq “Pì wê chang , wê long lam rùp au tìah ka lam rùp mangai atùng . ⁵³ Rìm hì au oe tì pì tanòe hnìm kùh waiq , pì ùh rùp au .Mahaq manòeq kô jò da pì , jò da diac clam cluiq” .

Phiero hangah ðeh ùh qnì ka Jesus

⁵⁴ Khoe aih wì hì rùp Chuaq Jesus , qnong haq trùh hnìm mangai pajàu haq nhèq, Phiero ti taqyoe enh hangai . ⁵⁵ Jò aih i qnah ngai patep ùnh qne hamlang , wì hangui qnhia ùnh ti dabau ,Phiero hadai hangui ti wì aih . ⁵⁶ I mòeq ngai hapõng cadri hnoq Phiero hangui qnhia ùnh , haq chrìh ngan ka haten rai doe : Mangai kô hadai mòeq bua ti haq tau . ⁵⁷ Mahaq Phiero hangah : Mangai cadri meh, au ma i loq ka haq aih. ⁵⁸ Atìq ka aih mòeq ahyàc , i mangai qnoeq hnoq Phiero ,haq doe : Ìh hadai taqmùt ti haq tau . Phiero doe : Cleq kô ! Au ùh i taqmùt ti wì aih . ⁵⁹ Jah mòeq jò atìq ka aih ,i mangai qnoeq hòm doe : Cleq kô, hì loq ka mangai taqmùt ti haq tau , majah qmang aih ìh kô mangai Galili. ⁶⁰ Phiero padreo bàu : Mangai kô ! Au ùh qnì tàng ìh doe cleq . Jò Phiero qnang anoe ,ia rǒng hloe jò aih raq . ⁶¹ Chuaq Jesus hwi enh rù rai ngan tajang ka Phiero .Aih Phiero ma hì hmàng hlài bàu haq ma khoe doe ka rađeh “ Hì kô èh ,adroe ka ia rǒng ,ìh khoe piq yàng hangah ðeh ùh loq ka au .” ⁶² Haq hì loh enh gùng rai hmoe ua ac.

⁶³ Bài mangai ti rap ngan Chuaq Jesus halê rai jêh haq,⁶⁴ wì bàng mat haq raih bòch :Tapoch pajàu beq ! cabô jêh ìh ? ⁶⁵ Wì hnáp ka haq bàc trong qnoeq hòm. ⁶⁶ Qngah sroq eh , bài gucraq gùng aih xam bòe mangai pajàu kàn hloe xam bài mangai hnài ranenh , wì tagop ti dabau , thê qnoh Chuaq Jesus loh enh ngèa wì haq. ⁶⁷ Wì doe : Tàng joq ìh qmat Christ , ìh drah anoe ka nhèn beq! Haq padreo bàu “ Yac ka au doe cleq, dua pì ùh lùì, ⁶⁸ tàng joq au bòch pì ,aih dua pì ùh têu bàu. ⁶⁹ Mahaq pang kô ta èh ,Kon mangai hì hangui pah qma cwiàng itai Boc Plinh” .⁷⁰ Rìm ngai wiàng bòch :Tàng qmang aih ìh qmat ma kon Boc Plinh qmòh? Haq padreo bàu “ Pì raq khoe doe au kon haq” ⁷¹ Khoe aih wì doe : Bèn ep gòm cabô anoe cleq ka bèn hòm? Bèn khoe tàng qmòe bàu enh cla haq qmat raq.

Jesus yòng enh ngèa Philat.....

23 ..Khoe aih òiq dǒng mangai wiàng tah hadrah padinh yòng aràng haq trùh enh ngèa Philat .² Wì tapoch bàu hu taqmòq yiniq lui ka haq: Nhèn khoe hnoq mangai kô patùt mangai bèn broq ùh troq , ùh lòh am thèq ka Sêsa , haq doe rađeh kô Mêsia , aih la bùa.³ Philat àu bòch haq : Ìh kô ajoq bùa mangai Juda? Chuaq Jesus padreo bàu “ Joq qmang ka bàu ìh khoe doe” ⁴ Philat doe ka bài pajàu kàn xam òiq ka mangai ta aih : Au ùh i hnoq qmòe mangai kô i yiniq lui cleq . ⁵Mahaq dua wì àu waq ka jah : Haq kô baxrùq òiq ka mangai ta gùng Juda xi bàu haq hnài . Haq baxèm qmòe enh gùng Galili trùh hloe ta kô. ⁶ Tàng bàu aih, Philat bòch : mangai kô ajoq mangai Galili ? ⁷Jò Philat khoe loq Chuaq Jesus oe tanòe cwiàng bùa Hêrot ,

hi aràng haq trùh ta bùa Hêrot , jò aih bùa Hêrot hadai oe ta Jêrusalem . ⁸ Jò Hêrot hnoq Chuaq Jesus ,haq manè pì cajaq , majah qmang aih haq ngèh ka jah hnoq Chuq Jesus khoe dùnh .Haq khoe tàng wì anoe trùh Chuaq Jesus , haq enh hnoq kan halac . ⁹ Hêrot bòch bacc trong ,mahaq Chuaq Jesus ùh têu .¹⁰ Bài pajàu kàn xam mangai hnài ranenh yòng ta aih , chaq trong taqmòq yiniq lui ka haq nhang haraya .¹¹ Jò aih Hêrot xam bài linh haq, ngan Chuaq Jesus ùh loh cleq ,toq ti halê haq, caxùnh ka haq eo yôh lem khoe hi padreo ahlài da Philat . ¹² Nèh haq , wa Philat wa Hêrot tagit ka dabau , mahaq pang hì aih wa hi loh ka hatroq .

¹³ Philat creo ka bài pajàu kàn xam bài cwan hadrah xam diq ka mangai ta aih oe mòeq nòe, ¹⁴ haq doe ka wì : Pì aràng ka au mangai kô pì doe haq baxrùq wì hu yòng tablêq ka Sêsa. Enh ngèa ka pì au khoe ti bòch haq ,au ùh hnoq haq i yiniq lui cleq tiah bàu pì ma anoe. ¹⁵ yac ka bùa Hêrot hadai ,majah qmang aih , hacô haq khoe padreo ahlài mangai kô ka bèn, pì hanoh hnoq . Mangai kô ùh i yiniq lui cleq ma troq ka cachit ,¹⁶ qmang aih au thê wì blai haq khoe èh hi caqnaih haq^(*) ¹⁸ Dìq ka wì wiang cachech :Jêh cađac mangai kô, caqnaih da nhên Baraba ! ¹⁹ (Baraba aih mangai pagàu yòng tablêq ka Sêsa ,haq i jêh đac mangai .) ²⁰ Philat enh caqnaih Chuaq Jesus ,haq majah bòch hòm wì , ²¹ Mahaq kiang wì cachech cadêh : Tiang đình haq talong pagat beq!Tiang đình haq talong pagat beq ! ²² Philat doe hòm yàng piq : Mahaq mangai kô khoe broq cleq ma dù ? Au ùh i hnoq haq i qmòe yiniq lui cleq ma troq ka cachit . Qmang aih au blai haq khoe èh caqnaih haq. ²³ Mahaq dua wì àu cachech cadêh : Ep tiang đình haq talong pagat ! bàu cachech wì haq jah blêq. ²⁴ Philat hi thê broq tiaq qmang ka bàu wì bòch .²⁵ Philat caqnaih mangai haq ma khoe clêh , aih mangai jêh đac mangai rai baxrùq wì yòng tablêq ka Sêsa ,tiaq bàu wì bòch , khoe aih am Chuaq Jesus ka wì haq tiaq manoh wì ma enh.

Tiang đình Jesus talong pagat

²⁶ Jò bài linh qnong Chuaq Jesus lam ,hnoq mòeq ngai gùng Siren ,yiniq haq Simôn hlài enh ruàng. Wì rùp haq aih thê xùi long pagat lam atiq ka Chuaq Jesus .²⁷ Raya mangai lam tiaq Chuaq Jesus , i qnah ngai gucadrì rai tùc dèh nòeh rai crò hmoe ka haq . ²⁸ Chuaq Jesus hwi ngan rai doe ka wì haq “ Yôiq bài kon gucadrì Jêrusalem , ùh dùh hmoe dèh ka au , hmoe ka cla pì xam bài kon pì . ²⁹ Majah qmang aih ta ngèa kô èh jò pì ma hi doe : Xôq ramot ka gucadrì xon , xôq ramot ka cliac ma ùh lah hauang xam tôh ma ùh lah ta-ùq! ³⁰ Jò aih èh wì doe ka bui wang : Ta-ùc enh qnhèq ka nhên kô beq ! doe ka go : Gùp enh qnhèq ka nhên beq!³¹ Tàng joq wì broq bài yiniq aih ka long rih , long croh èh qmang leq?”³² Wì hadai qnong baiq ngai qnoeq hòm, wa aih mangai atùng , ðòeq hujêh pajùm ti haq ³³ Jò wì khoe trùh tanòe wì ma creo go Cadôh, ta aih wì tiang đình haq talong pagat ti wa mangai atùng – mòeq ngai apah qma , mòeq ngai apah qngeo. ³⁴ Mahaq Chuaq Jesus waiq khàn “ Waiq Baq! Ìh caqnaih da wì yiniq lui,majah qmang aih wì ùh qnì rađeh broq cleq.” Khoe èh , wì pàih panàih hu ngan maleq majah eo haq. ³⁵ Wì mangai bacc yòng haqmiang ngan ta aih . Wì mangai ma i cwiang do halê haq .Wì doe : Haq khoe dèch mangai qnoeq,tàng joq haq qmat Mêsia Boc Plinh ma khoe ràih, ðòq cla haq doeh rađeh beq.! ³⁶ Bài linh hadai racaih blia ka haq , lam haten ka haq yôc ðiac panhòq am haq ôq , ³⁷ rai doe rameh: Tàng ìh joq bùa Judà, doeh rađeh beq! ³⁸ Enh qnhèq ka gàu haq wì achih : Mangai kô bùa Judà.

³⁹ Mòeq ngai atùng wì ma tiang đình hadai hnáp ka haq :Ìh qmat ùh xài Christ qmòh? Dèch rađeh beq khoe aih dèch nhên diq! ⁴⁰ Mahaq mangai matau lech ka mangai aih, haq doe : Ìh hadai khoe qmang qmat ,gleq ma ùh crè ka Boc Plinh ⁴¹ Da ba kô, khoe troq tiaq kan taq atoq, kan baxa ba ùh i qngwan ka trong dù ba

broq ,mahaq mangai kô haq ùh lah broq qmòe yiniq cleq ma qmèq . ⁴² Khoe èh ,haq doe : Chuaq Jesus ! jò Ìh hlài dèh diac Plinh , hmàng trùh au diq. ⁴³ Chuaq Jesus doe ka haq “ Joq qnàng au doe ka ìh , hì kô raq ìh jah oe ta au ta Paradi .”

Jesus cachit

⁴⁴ Jò aih wop qne hì, diq ta gùng aih loh dǒng ka clam trùh hloe piq jò dixèq.⁴⁵ Mat mahì loh ka clam cluiq , èh bai prình ta hnim kùh waiq loh ka dahit broq baiq apah . ⁴⁶ Chuaq Jesus creo cadêh “ Baq ! au qnèp deh mahua yiang ta tì kǒng ìh .” Atiq ka bàu aih ,haq hì pat hì hèm.

⁴⁷ Cla craq bài linh hnoq qmang aih , haq dèch bàu manè apôi Boc Plinh ,haq doe: Kô joq mangai taq atoq joq qnàng! ⁴⁸ Dìq dǒng bài mangai lam ngan , wì hnoq qmang aih wì rai hlài rai tùc deh rada.⁴⁹ Mahaq bài mangai canau ka Chuaq Jesus xam bài mangai gucadri ma khoe tiaq haq enh gùng Galili , diq yòng enh hangai hu haqmiang ngan .

Catùh hanang Jesus....

⁵⁰ I mòeq ngai yiniq haq Jôsep , hadai broq cwan hadrah ,haq aih mangai taq atoq . ⁵¹ haq ùh mòeq manoh èh haq ùh wiang jò wì ma hadrah Chuaq Jesus .Haq oe ta Ari-mathê , gùng Judê ,toq tangèh ka diac Boc Plinh.⁵² Haq lam ta Philat bòch yǒc hanang Chuaq Jesus . ⁵³ Jò khoe qnoh hanang Chuaq Jesus enh long pagat , haq yǒc bai lòm hanang ,taqngùì hanang ta trom ralùng wì khoe pùng òeq tanòe hmo kàn .Ralùng aih qnhòq lah tah cabô. ⁵⁴ Hì aih hì padon , èh hì sabat khoe ten trùh . ⁵⁵ Bài mangai gucadri khoe lam tì Chuaq Jesus enh gùng Galili , tiaq Jôsep hu ngan ralùng rai ngan wì ta qngùì hanang Chuaq Jesus qmang leq . ⁵⁶ Wì haq wìh hlài ta hnim , padon diac jreo xam dầu xua thùm . Mahaq hì sabat , tiaq deh ranenh wì haq padài

Jesus rìh hlài ...

24.....

Hì baxèm tuàng lè ,buqngah bài mangai gucadri wê diac jreo xam dầu xua thùm wì haq ma khoe palauq aràng trùh ta ralùng. ² Wì haq hnoq hmo padit qngah ralùng khoe cadre taqnoeq. ³ mahaq ,mùt enh dalam ùh hnoq hanang Chuaq Jesus. ⁴ Wop jò wì haq qnang hamàih trong kô , i baiq ngai calô caxùnh eo tiah ka camlet ,loh yòng enh ngèa wa haq. ⁵ Wa haq qnang crè diq jaq, toq kùp hadrò ta haqneq , wa aih doe : Hagleq pì majah chaq mangai rìh tanòe mangai cachit ? ⁶ Haq pì oe tacô, haq khoe rìh hlài . Hmàng hlài beq jò oe ta Galili haq doe ka pì qmang leq ? ⁷ Haq khoe doe “Kon mangai mùt ta tì kǒng mangai yiniq lui , wì tiang ònh haq talong pagat , hì piq haq hì rìh hlài.” ⁸ Aih wì men hmàng hlài bàu Chuaq Jesus ma khoe anoe .

⁹ Jò wì haq wìh hlài enh ralùng hanang , wì haq anoe hlài yiniq kô ka mòeq jàt mòeq ngai tiaq cla , xam diq ka wì qnoeq . ¹⁰ Bài gucadri aih: Mari-madolén , Jano , Mari miq da Jaco xam bài gucadri qnoeq, ma hadai i lam ,wì aih anoe hlài yiniq kô am ka bài mangai tiaq cla Chuaq Jesus . ¹¹ Mahaq wì ùh lúi bàu bài mangai gucadri aih anoe, majah qmang aih bàu wì haq tiah taiq ka bàu tapoch hwang. ¹² Hnoq doe qmang aih,

Phiero yòng cadàu tùh loh ta ralùng , haq kùp chri ngan , hnoq toq bai lom hanang oe jang aih , khoe aih haq hi hlài rai hamàih ta manoh ka bìac aih.

Ti trong hlài ta Em mau.....

¹³ Hi aih raq ,i baiq ngai hadai tiaq hõc , qnang ti trong trùh ta plài Em-mau, enh aih trùh ta Jêrusalem tadràu jàt Êtađo (*) . ¹⁴ wa hatuàng ka dabau bài yiniq neo loh khoe toq leq hi kô, ¹⁵ Jò wa haq qnang ta anoe rai hatinh ka dabau ,cla Chuaq Jesus trùh rai lam ti wa . ¹⁶ mahaq mat wa haq ùh canau ka Chuaq . ¹⁷ Haq bòch wa aih “Jò chòp lam ti trong iq ,chòp qnang ta anoe ka dabau cleq?” wa aih hi yòng, hadrò wa mangò òiq jaq . ¹⁸ Ta wa aih i mòeq ngai yiniq haq Clê-oba , bòch haq: Ahiaq toq ìh kô raq qmòh ,mangai enh gùng hangai trùh ta Jêrusalem ma ùh dùh ka loq yiniq neo loh ta aih bu baiq piq hi kô? ¹⁹ Haq bòch wa “ yiniq cleq aih?” wa aih doe : Aih Chuaq Jesus ,mangai gùng Naxaret , haq aih mangai pajàu itai enh yiniq broq trùh bàu capoch ,enh ngèa Boc Plinh xam enh ngèa kon mangai . ²⁰ ùh qnì hagleq bài pajàu kàn xam bài cwan hadrah majah rùp haq am ka wì jêh đac , èh tiang đình haq talong pagat. ²¹ Nhèn ngèh haq aih èh raq mahu dèch mangai Isorali , nhèn oe ngèh ùh hnau ka aih hòm , yiniq kô loh khoe piq hi kô. ²² Taqne nhèn ,i bài mangai gucadri broq ka nhèn hamàih, sroeh sroq kô wì haq lam ta ralùng ²³ mahaq chaq ùh hnoq hanang haq . Wì aih hlài doe ka nhèn i bình plinh loh doe haq khoe rih hlài. ²⁴ khoe aih i bua nhèn lam trùh ta ralùng hnoq rìm yiniq tiah ka bàu bài gucadri khoe anoe , cla haq aih ùh hnoq. ²⁵ Chuaq Jesus doe ka wa haq “ Chòp kô joq ùh qnì , hagleq majah adia ka lùì òiq ka bàu wì pajàu ma khoe anoe ! ²⁶ ùh joq Mangai Mêsia ep xalep qmang aih ,khoe aih men jah deh kan ranhòm qmòh ? ²⁷ Khoe aih ,haq yõc qmòe enh Môise trùh òiq òngg bài pajàu hu anoe òq wa loq òiq òngg bàu ta hset hadròeh , aih òiq anoe trùh haq. ²⁸ Jò ten trùh ta plài wì haq ma ta-en lam , Chuaq Jesus tiah gleq enh lam tam yeo hangai .²⁹ Mahaq wa aih àu padràng haq ,wa aih doe : Ìh oe tacô ti ma , majah qmang aih trõc khoe ten clam. Qmang aih ,haq hi oe ti wa . ³⁰ Jò haq hangui acaq ti wa ,haq yõc bênh ,manè apôi , khoe èh goh axong ka wa . ³¹ Wa hi tapèch mat , canau ka haq , yàng aih haq khoe hnhung hnhaiq .³² Wa doe ka dabau : Ìq haq jò oe ti trong, haq capoch tuàng ti ba rai anoe bahloh hset Hadròeh, ma ùh joq manoh ba tôq tiah qmòe ka ùnh qmòh? ³³ Jò aih raq, wa drah yòng ,wìh hlài ta Jêrusalem , glàm mòeq jàt mòeq ngai tiaq cla xam bài mangai tiaq hõc maqnoeq qnang tagop ti dabau ,³⁴ wa doe : Hi loq ! Chuaq Jesus khoe rih hlài , haq khoe mahno rađeh ka Simôn . ³⁵ Khoe aih wa hi anoe yiniq wa khoe hnoq ti trong , qmang leq wa ma khoe canau ka Chuaq Jesus jò haq goh bênh .

Jesus òq mangai tiaq hõc hnoq rađeh...

³⁶ Mangai tiaq hõc qnang anoe ti dabau , cla Chuaq Jesus loh taqne wì haq rai doe “ Catèm am ka pì .” ³⁷ Bài mangai tiaq hõc haglènh ,tarit tariang , majah qmang aih wì haq xoh ðeh hnoq kiac chõc .³⁸ Haq doe “ Gleq pì majah yùq , gleq pì majah ùh lùì qmang qmat ? ³⁹ Ngan jènh tì au, joq au raq . Pì bèq au beq , ngan beq , kiac chõc ùh i ka xech akia, ùh i ka caxènh , mahaq au i .” ⁴⁰ Jò haq anoe qmang aih , haq patò ðeh xam tì xam jènh ka wì aih hnoq . ⁴¹ Mahaq bài mangai tiaq hõc lem bùi hrìn , wì loh ka hamàih qnhòq dai lùì ,haq hi doe ka wì “ Tacô pì i cleq acaq ùh?” ⁴² Mangai tiaq hõc qnèp ka haq haqnech ka bùh . ⁴³ Haq hi yõc acaq enh ngèa ka wì.

⁴⁴ Khoe aih ,haq doe “ Kô raq yiniq au khoe anoe ka pì loq jò au ma oe ti pì : Rìm yiniq ta ranenh Môise , xam bài pajàu xam hset calêu plình khoe achih trùh au ep waq ka gêh”. ⁴⁵ Khoe aih , haq pèh gàu ngoc wì , aih wì ma hi loq ka bàu Hset hadròeh .⁴⁶ Haq doe ka wì “ I bàu achih : Mangai Mèsia ep xalep qmang aih , trùh hì piq haq hi rìh hlài enh kan cachit . ⁴⁷ aih èh wì hi yõe Yiniq Haq hu lam anoe ka rìm ngai , rìm diac dōq wì loq raxach đòeq hujah caqnaih yiniq lui , patep enh Jêrusalem . ⁴⁸ Pì lam anoe hlài yiniq aih , kô èh Au am ka pì yiniq Baq au ma khoe tèu .,⁴⁹ mahaq pì ep oe gòm ta Jêrusalem trùh jò pì jah caxùnh cwìang itai loh enh qnhèq.”

Jesus tǒc taplình ...

⁵⁰ Khoe aih haq qnong bài mangai tiaq hǒc trùh nòe haten ka plài Bêthani , haq dèch tì am xōq ramot ka wì ⁵¹ Qnang jò am xōq ramot , haq hi talah ka wì rai jah dèch tǒc ta plình. ⁵² Mangai tiaq hǒc kùh waiq haq , khoe aih wì wìh hlài ta Jêrusalem rai lem bùi diq jaq.⁵³ Mangai tiaq hǒc oe yôt ta hnim kùh waiq , manè apôi Boc Plình

